

**EKALESIA FAAPOTOPOTOGA KERISIANO SAMOA  
CONGREGATIONAL CHRISTIAN CHURCH SAMOA**

**TUSI MO FAIA’OGA O A’OGA ASO SA  
SUNDAY SCHOOL TEACHERS’ TEXTBOOK**

**2019**

*(Pine Aoga Aso Sa)*

**VASEGA MATUTUA  
SENIOR CLASS  
(14 - 16 tausaga)**

**MATAGALUEGA O A’OA’OGA KERISIANO  
DEPARTMENT OF CHRISTIAN EDUCATION**

**UPU TOMUA.**

I le suafa mamalu o Iesu Keriso le Ao o le Ekalesia, e faatalofa atu ai i le paia o le Ekalesia Faapotopotoga Kerisiano Samoa i ona tulaga faalupeina. E faafeiloa’i faapitoa i Susuga Faiaoga Aso Sa o le Vasega Matutua; malo le molimau ma le galulue punoua’i mo le Alii ma le Tala Lelei. Ia silafia:

1. O lenei Tusi mo Faiaoga Aso Sa Vasega Matutua o le meatotino a le Ekalesia Faapotopotoga Kerisiano Samoa, mo ana Aoga Aso Sa. E avanoa foi mo le fa’aaogāina e soo se tagata e tusa o lea faamoemoe. Peita’i e faasāina faaletulafono ona toe lomina e se tasi, o se vaega po o le tusi atoa, mo le faamoemoe e maua ai ni ana faamanuiaga ma ni tamaoa’iga faaletino, e aunoa ma le faatagaga a le EFKS.

2. Ua maua ata o nei Tusi Aoga Aso Sa & Autalavou 2019 i le Upega Tafailagi (website) a le EFKS: [www.cccs.org.ws](http://www.cccs.org.ws). Faamolemole faafeso’ota’i mai lo tatou Ofisa i Mulinuu, telefoni 24340, poo le e-meli: [xtneduc@cccs.org.ws](mailto:xtneduc@cccs.org.ws) mo fesoasoani ma nisi faamatalaga.

3. O Mataupu o lenei Tusi Aoga Aso Sa Vasega Matutua 2019 o loo faavae mai le Tusi Faitau Aso (IBRA) 2019. E faamauina le faafetai i puna’oa ma upega tafailagi na maua mai ai nisi fesoasoani e pei o faamatalaga ma ata, mo le tapenaga o nei Tusi A’oga.

4. E leai se suiga i Auala ma Metotia e a’oa’oina ai mataupu mai tausaga talu ai. E tāua ai le teu faalelei pea o Tusi Aoga o tausaga ua mavae e silasila i ai pe a mana’omia. E maualuga le manatu o le Matagaluega i le tofa saili ma le tofa taulagalaga ma faama’ite o susuga i Faiaoga Aoga Aso Sa & Ta’ita’i Autalavou, e fa’aaogā ai taleni ma agavaa o meaalofa a le Atua ua ia i latou, i le faatinoga o le faiva faa-faiaoga.

5. O vaega masani o le Faatinoga o Mataupu e pei o Tatalo Amata, Faafeiloa'i le Vasega, Faamanatu Mataupu talu ai, Tatalo faapa'ia le foa'i, Tatalo Faai'u ma isi, ua lē o tusia i le faasologa o mataupu i Aso Sa taitasi. Peitai o vaega masani nei o le faatinoga o mataupu e tatau lava ona fai i Mataupu o Aso Sa taitasi.

6. Afai ua lape le faatinoga o lenei galuega, e matua atu i la outou tofā faaleAtua e magalo ai le aufaigaluega vaivai. Pe afai foi e i ai ni fautuaga mo le faaleleia atili o lenei galuega, faamolemole faafesoota'i mai lo tatou Ofisa i tuatusi o i luga, pe lafo mai i le Pusa Meli 163, Apia.

7. Ia faamanuia le Atua i le galuega o lenei tausaga, auā le a'oa'oina o alo ma fanau, ina ia popoto ma atamamai IA TUPUTUPU A'E IA KERISO.

Soifua ma ia manuia.  
O la outou auauna,

*Faitoaga Tolua*

(Faatonu A'oa'oga Kerisiano)

## FAASOLOGA O MATAUPU

Mafaufauga Faaleagaga mo Aso Sa taitasi 2019 ua faaliliuina faa-Samoa.....Itulau 1 - 47

### Mataupu Vasega Matutua 2019

|         |             |           |
|---------|-------------|-----------|
| Ianuari | .....Itulau | 48 - 50   |
| Fepuari | .....       | 51 - 70   |
| Mati    | .....       | 70 - 80   |
| Aperila | .....       | 81 - 91   |
| Me      | .....       | 92 - 108  |
| Iuni    | .....       | 108 - 122 |
| Iulai   | .....       | 122 - 129 |
| Aokuso  | .....       | 129 - 136 |
| Setema  | .....       | 136 - 150 |
| Oketopa | .....       | 151 - 154 |
| Novema  | .....       | 154 - 165 |
| Tesema  | .....       | 166 - 173 |

## **TUSI FAITAU ASO SA 2019**

Aso Sa: 6 Ianuari 2019  
Tusi Faitau: Luka 1: 1 – 17  
Manatu Autū: **O le Tala e autupulagā**

O aso nei ua tele Ekalesia latou te faamamalu le Tausamiga o le Epifano, e faailoga ai le oo atu o Makoi i le Pepe o Iesu, e iloa ai o le faaolataga a le Atua e mo nuu uma. I faitauga o lenei vaiaso o le a tatou amata vagaia ai le Evagelia a Luka, o loo faamau manino ai lena feau o le Tala Lelei mo tagata uma, ina ia maua e i latou e mulimuli mai i ulua'i molimau na vaai tino, le tala moni ma le 'faamaoni'.

Ua amata e Luka lana Evagelia i le tuu o i tatou i se taimi iloga ma se nofoaga maioio lelei, ma se tagata patino o Sakaria, e ta'u mai ai o le Tala Lelei o le a tatou tagofia o loo maua'a i nofoaga patino ma e a'afia ai tagata lautele. E tele se sao o le Agaga Paia i ulua'i mataupu – i le faamanaina o tagata lautele e tula'i atu latou te faia gaioga faigata ma tauave tiute faatupu ofo, i fuafuaga mamana a le Atua mo lana galuega faaola. Tatou te molimau a o oo mai le tasi lalolagi i le olaga masani e ala i agelu ma vavega. O perofetaga sa são mo le faitau selau o tausaga ua vaaia ma faalogoina. E ui ina o le Tala e autū ma ogatotonu ia Iesu, peitai o le aso nei tatou te vaaia ai mea na tutupu a o lumana'i lona fanau mai, ina ia faatulaga lelei le fola mo lona afio mai.

.....  
Aso Sa: 13 Ianuari 2019  
Tusi Faitau: Luka 4:31 – 44  
Manatu Autū: **Ua salalau tala!**

I le luka 4, ua tatou maua ai o le lalolagi, sa manatu faapea o loo pulea e Roma (Lk 2:1; 3:1), ae o loo pulea e Satani. O le

faamoemoe o le Atua mo le lalolagi ua fa'aalia: ia lavea'i ma faasaoloto o ia mai malosiaga ua faatu e tete'e i le Atua. O i ai le taua o loo fai ma a o goto ifo le la, e faailoga ai le uma o le Sapati, e toatele tagata manunu'a ua aumai ia Iesu.

I lenei vaiaso ua valaauina i tatou foi e mafuta ma Iesu - ma vaai poo fea ae faapefea ona ia galue i o tatou autafa. O nisi taimi o le upu 'faalelei' e fa'aaoga e faamatala ai le mea na tupu i luga o le satauro. Peisea'i o le Atua ua na faaleleia ma faatasia le lagi ma le lalolagi, ma faia ai i la'ua 'ia – tasi'. I le Levitiko o le aso o le togiola e osi ai taulaga ma ili ai le pu i le nuu atoa (25:9). O iinei i le Luka 4, ua amata ona ili o pu. Ua gaiogi Iesu e tusa ma lana anavatau, ina ia tino mai le faamoemoe o loo aumai e le Iupeli: o le tatalaina o e noatia, o le faasaolotoina o e taotaomia, o le faatoilaloina o malosiaga o loo tete'e i le pule a le Atua, ma le folafolaina o le tala lelei o le malo o le Atua (f.43). O lana galuega o le a tauluga i luga o le satauro, le nofoaga o le a faatoilalo mulimuli ai loa le fili, ma ili ai le pu ia logo le nuu uma i le aso o le togiola. Ua malo le taua!

.....  
Aso Sa: 20 Ianuari 2019  
Tusi Faitau: Luka 6: 27 – 42  
Manatu Autū: **Penu'ili ma utupoto**

O le galuega faa-puluvaga o le taumafaiga ina ia maua se fofō e talia lelei e itu e lua o loo a'afia. I le amataga o le galuega faapuluvaga, e taofiofi mamau itu e lua i a la'ua mau e manatu o le mea moni lea, ma e talitonu soo se faai'uga e fai e tatau ona faamalieina ai lona finagalo. A o faagasolo le puluvaga, o le a taumafai le tasi itu e iloilo mau mai le isi itu, ma ia faamaulu ona aao i seevae o le isi. E ma'eu le faafuase'i ona sui le manatu ma o le a amata ona soloia i lalo pa vaeloto. O le a ese le itu e silasila atu ai, ma o le a amata ona manino, e i ai le tonu i le finauga a le isi vaega. O le aano moni o le mataupu, o le auala lenei e amata ai ona iloa e le vaega lava ia ona ave ese le

‘utupoto’ o i lona mata, ma amata ai ona malamalama, ua na o se fasilaau o loo i le fofoga o lona tuaoi.

E i ai taimi tatou te oo ai i tulaga ia, o le manatu ifo ua na o loo tatou taofi e sa’o ma o le mea moni lena. Se’i vaganā ua faamallosia i tatou e vaai atu i le isi itu, ona amata lea ona manino la tatou vaai ma loo tatou taofi ua aunoa ma se faanenefu. Pe afai e a’oa’oina i tatou ma faamasani e silasila atu i le isi itu, o le a sili atu ona manino ma lē faaluafesasi la tatou vaai. O lenei faiga e i’u atu i le fausia o faiā ma sootaga faa Kerisiano e maumaututū.

*(Ia silafia o mataupu o lenei vaiaso sa saunia e le Faletua o Michiko Ete-Lima, EFKS Fairfield).*

.....

Aso Sa: 27 Ianuari 2019.  
Tusi faitau: Salamo 140:1 – 13  
Manatu Autū: **Tausiga a le Atua.**

O le vaaiga sauā o le Salamo 140 e manaia mo se ata tifaga ta’uta’ua o le tau mafanafana. O mailei ma matāsele ua sauni; o malala ola ua mu; ma le fili ua lafo i le lua – e mana’omia se inisinia tusiata faa-komipiuta atamai e na te tuufaatasia uma! E faafeagai ma nei vaaiga mata’utia le sauā, o i ai le autū masani: o le Atua e tausi mai. O le Atua o le au faisalamo ua na lagona mai a latou talosaga, ma la latou alaga mo se fesoasoani ma le alofa. I totonu o se lalolagi o loo saili ai le vevesi na te umia le pule, o loo tu malosi ai le Atua o le fai salamo e lagolago ma faamallosia le alofa ma le amiotonu mo le au matitiva ma puapugatia.

Ua amata nei le 2 vaiaso o le faasologa o le ‘Tusi Paia i Tifaga’. I lenei sosaiete o le 21 senituri, o totonu o ata tifaga o loo fa’aalia ai vaaiga o le olaga, i se tulaga soona faatele, a o tatou matamata ai i tifaga. I le faasolo mai o tausaga, e tele taumafaiga e fa’aali tala o le Tusi Paia i tifaga, ae o manatu autū faale Tusi

Paia o loo fa’ailoa foi i tala faalelalolagi – auā o autū ia o le lalolagi a le Atua.

A o tatou vagaia le faasologa o manatu autū e ala i le Tusi Paia ma tifaga, e tasi le mea e ao ona tatou malamalama lelei i ai e sili atu nai lo se isi: e tausia i tatou e le Atua.

.....

Aso Sa: 3 Fepuari 2019  
Tusi Faitau: Galuega 17: 22 – 28  
Manatu Autū: **E i ai le Atua i mea uma?**

O se tasi aso sa ou matamata ai i le ata *Tamaloa U’amea* o le faalima ai lena ma sa fetalai mai le Atua, ‘O le tala lava lenei ia Paulo ua toe faamatala!’”. I lo’u te’i, na ou tago faavave loa i la’u Tusi Paia ma se tasi tusi o Su’esu’ega i le Tusi o Galuega, ma iloa ai nisi o vaega e tulaga tutusa ai le tala ia Paulo ma Tony Stark, le toa magafagafa na fausia le suti u’amea e mafai ai ona ia lele. E pei o Paulo, e faapena foi Stark o le tagata e i ai ona vaivaiga ae na ia faia le mea e sa’o. E pei o Paulo, o se mea na tupu faa-Tamaseko na suia lona olaga e faavavau.

Sa ou faia se saililiga ma ou maua ai le tupuaga faa Tusi Paia o le tele o a’u tama autū ou te fiafia i ai. O le tele o a’u ata tifaga lauiloa ua na o ni tala silisili ua toe faamatala. O le aso lenei, o Paulo o le a ia laugaina le Atua lē iloa, e lē mai tusitusiga i luga o faatagata faapaupau, ae mai faatagata o Holiutu. Ou te faamoemoe i lenei vaiaso o le Atua o loo e silafia, o le a ia faaosofia oe ma fetalai e ala i a matou tifaga i auala e le’i taitai ona oo i ai se manatu!

E pei o Paulo ma le aofia i Atenai, o outou ma au uo ma ou tuaoi o le a tofu ma talitonuga eseese, ae tutusa i le aganuu e tasi. I lenei vaiaso, matamata i ata tifaga i mata o le Tusi Paia, ma tala’i atu i au uo le Atua e lē iloa!

.....

Aso Sa: 10 Fepuari 2019  
Tusi Faitau: Filipi 1: 1 – 12  
Manatu Autu: **Galuega fa'aauau.**

O le Tusi ia Filipi na tusia mai le falepuipui, le nofoaga sa faalagolago ai Paulo i isi tagata e ola ai. O lana faafetai e ta'u mai ai o le 'galuega lelei' atonu o se meaalofa tupe na auina atu e Filipi. O loo faauiga e Paulo lenei galuega alofa o se molimau i le Atua ua na aumaia se siitaga i la latou faatofalaiga ma la latou faamuamua. O le faatatau lautele atu o lenei mea mo le galuega a le Atua i o tatou olaga e faatupu malosi. Pe afai e faigata ona lagona se malosi e fa'aauau ai ona ola e pei o Keriso, o lenei fuaiupu ua na tauanauina malosi i tatou e pipii i le faamaoni o le Atua ma faatumauina se mataala i le mana o le Atua na te faia ai suiga. O upu Eleni o loo faaliliu mai ai le 'amata' ma le 'faai'uina' o ni muagagana e fesoota'i ma osiga taulaga faaletapuaiga, o loo faamanatu mai ai o le galuega a le Atua i o tatou ola e paia ma o nisi taimi e faamisiterio.

O le a tatou faitau ma vaايا i lenei vaiaso le tele o lu'itau e fetaia'i ma Paulo. Peita'i e lē uma lona faamoemoe, auā o loo taula'i pea lana vaai ia Iesu. Na te toina mai faamalosi'au loloto mai la latou mafutaga, poo le latou faiga paaga, ma le au uso i Filipi – ua na iloa e ui ina latou valavala i nofoaga ma faatinoga, ae o loo latou faatasia i le galuega a le Atua. O i tatou foi tatou te mana'omia ni tagata o e latou te talia ma le fiafia le galuega o loo fai e le Atua i o latou olaga, ma uuna'i ai i tatou e saili lona faai'uga.

.....  
Aso Sa: 17 Fepuari 2019.  
Tusi Faitau: Filipi 3:1 – 11  
Manatu Autu: **O uiga e sili atu.**

I lenei tusi faafaifeau faamomoiloto, ua faasaga atu nei Paulo e tali i lu'itau o tete'e mai fafo atu o le Ekalesia faapea ma fevaevaeaiga i totonu lava o le Ekalesia. Ae ua muamua lava ona ia tausisi atu i Kerisiano i Filipi ina ia latou olioli. O se loto e olioli ma se agaga e fiafia na te faafeiloai i faiga lē pulea lelei ma osofaiga ma e lē faatoilaloina e ia mea. O le olioli e maua i le iloa o Keriso ma le faasoaina o le faamoemoe i le mamalu faaeaina, o se vailaau malosi e foia ai fetauaiga faaletulafono. O le 'olioli i le Alii' o se autu faifaipea o lenei Tusi. O le mauaina e Keriso e olioli, o le ola ia Keriso e olioli, o le taliaina ma faatuatua i le faaolataga ua faia e Keriso e olioli, e matagofie ma e atoatoa. Ua fa'aaoga e Paulo se faatusa laulologo faa Eleni, ua ia faamalosi'au i lana au faitau ina ia faautauta i uli (taifau), o le aufaigaluega leaga ma e ua tipi fua le tino. O i latou o 'taifau' auā e pei o taifau i le vaai a Iutaia i lena taimi, o nei tagata e lē mamā auā latou te teena le agaga o le tulafono; o i latou o faigaluega leaga auā faamamafa galuega o le tulafono, e tipi fua le tino e ala i le peritome, ae le peritomeina le loto. Ua ta'ua e Paulo isi mau mea lelei uma sa ia maua ma sa ia ausia, o 'otaota' – o 'topalega' i isi faaliliuga. E leai se isi mea e mana'o i ai ina ia tu atu i le va o lona iloa o Keriso ma le malosi o le mana o lona toe tu.

.....  
Aso Sa: 24 Fepuari 2019.  
Tusi Faitau: Salamo 120  
Manatu Autū: **Tatalo mai le loto.**

Mai lava anamuā, o alii ma tamaitai Iutaia sa fai malaga i le malumalu i Ierusalema i Tausamiga o le Paseka, Vaiasosa ma Faleapitaga. Ona o Ierusalema o se aai e tu i luga o se mauga, latou te savavali a'ea'e ina ia oo i ai, ma pe a mae'a se ta'elega faaletausamiga, ona a'e lea i fasitepu e oo ai i le Malumalu. O Pese ma e o a'e o loo i ai le manatu e faasino i pese sa usu i luga

o le auala faapea ma luga o fasitepu. O nei salamo e lavea ai le tele o laasaga ma lagona, o faaleoina ai e le au malaga a'e tatalo o latou loto. I le tele o seneturi sa faapea foi le au Kerisiano ona latou fa'aaoga nei Salamo e tatala ai le faitoto'a o tatalo faamaoni.

O le Salamo 120 o loo lauina e se tagata ese ua vaivai mai le taua. Tatou te manatunatu i nei upu mai laulaufaiva o tagata sulufa'i sosola. E faamanatu mai ai le faigata ona tautala i se upu o le filemu pe afai e si'omia i tatou i matagi o taua. O le ita ma le loto tiga e sagatonu e faaosofia ai mafaufauga; o le fefe na te faatupuina le faasologa sauaga. E pei ona sa i ai i na aso, o loo faapea lava e oo mai nei. O le tele o Salamo o le O A'e latou te faamatala le naunautaiga mo le filemu ma le malu puipuia, o se faanaunauga mai lava i le vavau. Ia alofa le Atua faatamaoiga le tataloina o nei Salamo i le lalolagi.

.....

Aso Sa: 3 Mati 2019.  
Tusi Faitau: Salamo 131  
Manatu Autū: **Malolo ma toe fuata'i**

Mafaufau o oe o se tama itiiti, ua maona, o loo moe i le fatafata o lou tina. Lagona le to'a filemu, ua aunoa se fefe poo se popole i se mea e mana'omia. E i ai se isi faatusa o le loto ua malolo, ma ua mautū i le alofa, e sili atu nai lo lena?

O le itu e sili ona ou mata'ina i lenei faitauga o le tusitala: *o a'u* na ou fifilemu ma ou faalologo. E lē *o le Atua* na ia faafilemu ma faalologo i lo'u loto. Tatou te to'a filemu ma talitonu i le alofa o le Atua, peitai o i tatou e faia le filifiliga e faatino. O le agaga o le tusitala o loo faatusa i se tama ua te'a ma le susu – o se tasi e lē o toe fafagaina sa'o mai le tino o lona tina, o se tasi e lē o toe faalagolago i se auala faapena.

O le gagana faatusa lenei e iloa ai lo tatou matutua ae maise le tatau ai o lo tatou malolo mautū i aao o se matua alofa. O le

tama itiiti e si'i i luga ma afisi, ae mana'omia lo tatou savavali atu ma nonofo i luga o vae o tatou tina. O i tatou e faia le filifiliga e mafai ai ona tatou malolo ma le saogalemu i le alofa o le Atua.

O tagata uma e manaomia taimi e matua malolo ai. E manaomia mo tatou tino ma tatou agaga. O lo tatou lē amanaia o lo tatou lē lavā ma le naunau pea, e faaitiitia ai lo tatou ola maloloina, ma lo tatou tulaga na faia ai i tatou e le Atua. Tatou te manaomia foi le toe fuata'i, le lagona o loo iloaina ma alofagia, e amanaia ma tausia lelei... e pei ona lagona e le tamaitiiti pe a sii e lona tina. O se meaalofo lea tatou te maua mai le Atua ma e mafai foi ona tatou avatu mo se isi. Ia faamanuia mai le Atua i lo tatou malolo, ma le aveva o i tatou o se nofoaga e malolo mai i ai ma toe fuata'iina ai nisi tagata. O i tatou ua alofagia, o loo taofi i aao malu ma le silasila toto'a alofa a le Atua.

.....

Aso Sa: 10 Mati 2019.  
Tusi Faitau: Salamo 27: 1 – 14  
Manatu Autū: **Faatali i le Taimi o le Atua.**

Ua uma atu faitauga o nai aso muamua ma Iesu i le toafa, ae o isi faitauga mo lenei manatu autū e mai le Feagaiga Tuai, auā mo le Isaraelu tuai, o le toafa o se nofoaga faapitoa mo latou, sa taitaiina ai i latou e le Atua e ulufale atu i le nuu fou ma fausia ai i latou e aveva ma malo. O se nofoaga foi na latou faa-aao-gagase ai mo se taimi umi ma fai ai nisi o amio matavale, o lona uiga o se nofoaga foi o le toilalo ma a'oa'iga. E tele taimi na fouvale ai ia Mose ma le faigamalaga faalevaleva; na latou toe mafaufau ma toe mana'ona'o i tua i Aikupito, na latou taumafai e tapuai i se tupua - le povi auro, na muimui ma tomumu. Ae pe latou te mana'o i ai pe leai, e leai se isi a latou gaioiga e fai vagana lo latou faatali, se'ia taunuu i le i'uga o la latou faigamalaga i le Nuu Folafolaina. O le toatele o i tatou e faalē lelei tele i le

faatali; pe a tatou i ai i toafa o faafitauli, o puapuaga, a foliga mai ua tuulafoaiina, ona tatou mana’o loa lea e fai se gaioga.

A o o’u nofo ai i Aferika i Saute i le 1980s, sa i ai se vasega o faiaoga uli o le mataupu silisili na latou tusia se tusi e ta’ua o le *The Kairos Document: A Challenge to the Church*, o tagofia ai le soifuaga lelei ma le faapolokiki o le atunuu i se vaaiga faale Tusi Paia ma faa-mataupu silisili, e avea o le taimi lea o le Atua mo suiga. O le upu Eleni o le *kairos* o lona uiga ‘o le taimi sa’o, ‘o le taimi o le mea moni’. O le mea lena o loo ta’u atu e le fai Salamo i lana au faitau ina ia faatali i ai: o le taimi o le Atua, o le taimi o le a ia gaioi ai, e faafelavei, e ta’ita’i, e faatonu, e lavea’i. E mana’omia le malosi ma le loto tele e faatali ai i se taimi e foliga mai e faigata ona onosa’ia. Faatali! Faatali mo le *taimi* a le Atua. E mautinoa lona oo mai.

.....

Aso Sa: 17 Mati 2019.  
Tusi Faitau: Failauga 3: 1 – 8  
Manatu Autū: **Taimi mo mea uma.**

Talu ai nei o ma’ua ma la’u avā o Sally, faatasi ma nai a ma’ua uo o Wayne ma Jenny, na alu le matou savaliga i le Camino Frances, o se ala savali o anamua. Na matou savalia le 800 kilomita i le 33 aso mai St Jean i saute o Farani e oo i Santiago i matu o Sepania. O le lesona e tasi na ou maua mai lenei savaliga o lo’u iloa ai e sa’o lelei nei fuaiupu. E i ai le taimi mo mea uma. O le taimi e savali ai ma le taimi e malolo ai. O le taimi e tautala ai ma e taimi e sālō ai. Pe a savalia lenei ala savali anamua, e i ai le taimi e tautala ai ma le taimi e filemu ai. O le tele o le Camino e fa’aalu i le filemu, e ui ina si’omia oe e le tele o tagata i le aso atoa. O le valu i le sefulu itula i le aso e fa’aalu i luga o le auala o lona uiga mo se vaega tele o le aso e te toatasi na o oe ma ou mafaufauga ma e mafai ona e talanoa i le Atua ma lagona atu o Ia fetalai mai ia te oe. E ui ina e lē o tagata uma e maua le avanoa e savavali ai i le Camino, ae o tatou uma e

mafai ona fa’aalu le taimi e sālō ma filemū ai ma faalogo pe se a le mea o fetalai mai ai le Atua. O le asō, a o e faalogo, o le a se mea mata o fia fetalai mai ai le Atua ia te oe, i le taaligoligoa ma le filemū?

.....

Aso Sa: 24 Mati 2018  
Tusi Faitau: 1 Nofoaiga Tupu 28:9  
Manatu Autū: **Aisea e te saili ai le Atua?**

I le faitauga o le asō, ua tuuina atu ai e Tavita le tootoo mo le ta’ita’iga o le malo i lona atalii o Solomona. I lana saunoaga lenei, ou te manatu ua fai si ona faavalivali teisi. Ou te faia lea manatu ona o le tulaga o le fai atu o Tavita i soo se tasi, afai e te lafoa’i le Atua, “o le a ia lafoa’iina oe e faavavau”, ua fai lava sina tamaoaga. O ia lenei sa ia fasioti lana auauna faamaoni ina ia mafai ai ona gaoia lana avā (2 Samuelu 11). E iloa lelei e Tavita e mafai ona salamō faamaoni le tagata, toe foi i le Atua ma suia lona loto i lea taimi ma lea taimi; o loo i ai le Atua i taimi uma pe a sailia.

O le uiga atoa lena o le Leni, a ea? O le iloilo, salamō ma toe foi i le Atua. O le taimi e tuuina atu ai le vaega tele o tatou tagata ma o tatou olaga mo le Atua. I lenei vaiaso o le a tatou mafaufau ai pe se a le uiga o le “saili” i le Atua. Po o a ona foliga, ae faapefea ona tatou faatinoina i se auala maualalo faaletagata. Ou te lē mautinoa o ia te a’u se tali i nei mau “o a?” ma nei “faapefea”, ae e i ai nai a’u fesili mo i tatou e mafaufau i ai ao tatou aga’i malie atu i le Vaiaso Paia.

.....

Aso Sa: 31 Mati 2019  
Tusi Faitau: Sapakuka 3: 17 – 19a  
Manatu Autū: **Faamoemoe ua maua.**

E faapefea ona avea le tau o le Leni o se taimi o maumautaiaga i le vao? O le tele o tatou faitauga o lenei vaiaso o loo tusia ina ia usuina, ma o le tatou lautusi mai le perofeta o Sapakuka o loo ta'u mai e mo le 'Faatonu o Musika'. O loo tusa ma le tatou autu, ona ua tele pese i o tatou taimi e faasino i le 'sailiga' o se mea – po o le alofa, amiotonu pe faamoemoe i taimi o puapuaga. E i ai nisi taimi ou te matamata ai i ata tifaga o tagata pepese o le 1920s ma luma mai o loo fa'aalia ai alii ma tamaitai o nofonofu i fafo o latou faleo'ou tuai ma le pefua ma o latou aiga, o loo uu le penisiō, o usu pese faatatau i taimi o latou ola ai. E ui ina o latou upu e atagia ai le lē tutusa ma tauiviga o loo latou feagai, e masani ona i ai se filo o faamoemoega o loo lalaga faatasi ai, ua na o se laasaga lē tumau lenei, o latou vaavaai a'e (i le Atua) mo taimi e sili atu ona lelei o mulimuli mai.

E taua tele le faailoa pe faapefea o tatou lagona. I totonu o solo ma pese a i latou na matuā ola olopalaina i totonu o puapuaga, tatou te maua ai upu o faamafanafanaga ma faamoemoega i se tasi o loo malamalama lelei i le mea o o'u i ai, na te faalauiloaina o'u lagona ma mafaufauga e sili atu nai lo a'u. O le pese a Sapakuka e lē taumate sa tusia a o manatunatu i osofaiga a Papelonia, ma lona faamoemoe o le Atua na te aumaia le faaolataga. O le a la tatou pese? O fea o le a tatou maua ai se faamoemoe i lenei vaitau?

.....

Aso Sa: 7 Aperila 2019  
Tusi Faitau: Luka 20: 1 – 19  
Manatu Autū: **O le ma'a ua tuulafoa'iina**

O le tala i le pule o le togavine na auina atu ana nauauna e maua mai se seleselega, o se tala faamamaoiloto. Na agaleagaina auaua ma tuli ese. Ona auina atu lea o lona atalii ma le faamoemoe o le a ese se tali mai, ae leai.

E i ai taimi o le avea o tatou ma Kerisiano o le a teena ai i tatou e i latou tatou te fesoota'i. Ou te manatua se taimi a o o'u galue i

se kamupanī tau fesoota'iga, na siitia ai tulaga o le au inisia uma i la matou vaega. Na fesili mai lo'u pule pe aisea ua lē faia ai sa'u talosaga e siitia ai lo'u tulaga? Na ou tali atu faapea, "*O oe le tagata e faia le faai'uga pe fai so'u siitaga pe leai*". Na ia tali mai e tataua ona ou faia e pei ona fai e isi o'u uso faigaluega. "*O le a lena?* o la'u tali atu lea, "*o le tui faapō o a'u uo i le tua? Soia laia, ou te lē taitai ona faia lena mea.*"

Ui i lea, na poloa'iina a'u mulimuli ane ina ia ou alu e vaai le faauluuluga o le matagaluega lea na ia fai mai, "*Delroy, ua ou faalogo e i ai ni ou agavaa faaleaganuu.*" Na ou tali atu, "*Ioe, e i ai.*" Na siitia a'u i si isi vaega mo se galuega e leai se tasi e mana'o ai, ae sa ou fiafia i ai.

E oo lava i taimi o le teena e tataua ona tatou taofi mau i o tatou faasinomaga. I lenei auala, e fausia ai i tatou foi e fai ma maa tulimanu (f 17) i o tatou afioaga ma galuega o galulue ai.

.....

Aso Sa: 14 Aperila 2019  
Tusi Faitau: Luka 22: 24 – 38  
Manatu Autū: **O lē e auaua**

I le amataga o le Vaiaso Paia e aogā le mafaufau i manaoga. O i latou sa faatasi ma Iesu a o faasolo mai lena vaiaso faigata sa tofi ma taofi eseese i mea o le a tutupu ma pe aisea foi. O Taitai o le tapuaiga sa latou matua maumaututū o Iesu ua fai ma faalavelave i le afio mai o le Atua, e le o le mataupu autu lea. O le toatele o i latou sa mulimuli ia Iesu mo le tele o tausaga sa i ai lo latou faamoemoega o Iesu e avea ma Mesia o a latou miti. O mea o le a tutupu i le vaiaso o le a lē tusa ma ni o latou moomooga. Afai la e faaososoina i tatou i lenei vaiaso e i ai se manatu o le a afio mai Iesu, e ala mai i faatinoga e manatua ai, o musika leo tetele po o sauniga lotu mananaia, o i tatou foi ua manaomia le faalatele la tatou pupula. O Iesu o loo ia i tatou o se tasi e auaua. E mafai ona ia tosina la tatou vaai ma faamaite le taofi o la tatou manava, i auala e aupito sili ona filemu ma



nofoaga aupito lē mafaufaaina. O se faiga atamai le fausia o se avanoa i totonu o i tatou ina ia mafai ai e lenei vaiaso ona fa'aali mai i se auala e mamao ese mai o tatou manatunatuga, ina ia faataga ai Iesu e fa'aali mai o ai tonu lava Ia, e matuā ese lava mai ni o tatou naunautauga ma talitonuga.

.....

Aso Sa: 21 Aperila 2019 (Aso Sa Toetu)  
Tusi Faitau: Luka 24: 1 – 12  
Manatu Autu: **Faamoemoe ua puna a'e.**

O le leo o le tina ua leiloa lana tama e lē mafai ona ia tuua oe, O le faavauvau e lē pei o ata tifaga. O le tagi a le fatu nuti momoia e sau pea i aso...vaiaso...masina...mulimuli mai. Ae o le a avea ma taufaafefe masani. O le liligi o le ti...o le gasēsē o solosolo...o le faaola o le sikareti...Ae le'i matuā gasecina le faanoanoa, e i ai nisi fuafuaga e tatau lava ona muamua faatino. E tatau ona mauiua muamua ua i ai le tino o le tagata maliu...e tatau ona logo aiga...o toe sauniga e tatau ona faatulaga...

O le vaega tonu lea e faatasi atu ai la tatou faitauga i nai tina, a o latou o atu e faatino tu ma aga o falelauasiga. Peitai e i ai se mea o loo matuā sesē; e lē o i ai le tino! Vagana ai taulele'a e to'a lua na i o la'ua tafatafa, ma la'ua tau memumemu ane upu e suia atoa lo tatou lalolagi – “E le o iinei o ia: ua toe tu o ia!” O Iesu o loo soifua!

I lenei vaiaso o le Eseta, o le a tatou maumautai ai pe faapefea, ona oo lava i taimi aupito pogisa, e ati ai pea le susulu o le faamoemoe. O le Aso lenei e silisili ona maua le fiafia o lona faamamaluina e le Ekalesia i le lalolagi. Ua faatoilaloina le oti. O loo soifua Iesu!

O le mea lea, po o e maua se aso e tumu i le olioli, po o e tauivi e fia iloa atu sina malamalama i le pogisa...

IA MANUIA LE ESETA!

.....

Aso Sa: 28 Aperila 2019  
Tusi Faitau: Iosua 6: 1 – 20  
Manatu Autū: **Valaau mata'utia.**

O le leo o le sofao, le pu e fai mai le seu o le mamoe po'a, e tele sona taua i le Tusi Paia Eperu. O loo muamua ta'ua i le Esoto 29:16 o se faailoilo o le auai o le Atua i luga o le Mauga o Sinai, ma o lona fa'aogaina ua fai ma faatusa o le si'ufofoga o le Atua ma ana faatinoga mamana.

E faamanatu mai ia i tatou, talu mai anamua o le leo o musika na ia tau'ave faatasi le faalogoga paia, le faalogoga faamisiterio. Na te faamaite mai se malosi ese e lē gafataulimaina e le mafaufaou o le tagata. I le tala faasolo, o lona manatu faatū o le mana lilo i totonu o musika, e mafai ona fa'aaoga mo le lelei poo le leaga. O musika sa taua tele i le faaalualuina o le fiafia ma le tutū faatasi i le tele o tauiviga mo le saolotoga, ae sa fa'aaogā foi i savali a Siamani! E lē faapea o le musika na o ia e i ai le uiga lea, ae na te momoli atu le feau ma faapooopo le mamafa faaleagaga.

O le musika o se meaalofo silisili. E o'oo'o o ia i tulimanu uma e lē mafaia e isi mea, ma e na te tatalaina atu le toatele i le Paia, le Siufofoga o le Atua. Peita'i, ona o lona malosi tele, e tatau ai lava ona tatou faautauta.

Mata o le siufofoga o le Atua na solo ai i lalo pa o Ieriko i pu, pe o le fa'aaogaina o musika na taumafai e tuu le pule mamana i gaiioiga a le tagata?

.....

Aso Sa: 5 Me 2019  
Tusi Faitau: Salamo 96: 1 – 13  
Manatu Autū: **Na i ai le musika i le amataga.**

O talitonuga tau musika o le lalolagi o loo maua'a i le tele o aganuu mai anamua, aofia ai ma latou e faasino tonu i Amerika Latina. Mo meleniuma, o musika sa fesoota'i i mafaufauga

faasino i le lalolagi, i le itu tau faasaikolosi, faaleagaga ma le faaefika. E foliga mai e i ai se malamalamaga o le tagatasi faalelalolagi; o se ulua'i leo o loo lotolotoi i le lalolagi ma o loo ia tuufaatasia le lagi ma le lalolagi.

I Salamo, o loo i ai le talitonuga lea; o se pese o viiga o loo aofia ai le lalolagi atoa. O se valaaulia mo i tatou ia faalogo i musika lenei e lē na o se ituaiga musika masani ae o se pese aoao o viiga! O mafai ona tatou faalogo? Ae a pe a tatou faatasi atu i ai ma pepese ai viiga i le Atua faatasi ma le foafoaga, le lalolagi atoa? Soo se leo e i ai le tele o ituaiga o pā'ō fegaoioia'i e faamatalaina 'o leo mālie ina ua tuufaatasi'. Ina ia faatupulaia lo tatou malamalamaga i le faia i le va o tagata ma le natura, e tatau ona tatou mata'itūina le 'leo mālie ina ua tuufaatasi' i o tatou olaga ma lo tatou lalolagi.

O i tatou o tausitama o lo tatou lalolagi fa'aauau, ma o le musika na te faaleoina lo tatou fesootaiga i ai. I lenei vaiaso o le a tatou tagofia fesootaiga i le va o musika, o a tatou pesega, ma vaega uma o le lalolagi a le Atua. E pei ona fai mai Shirley Murray i lana tusi 'Earth Prayer', "O le Atua lo tatou mataisau: 'aua le faafitia le Atua, lu'i, tete'e le Atua, faafefe lenei nofoaga: o le olaga ia faapelepele, tausi lelei, po o le tatou fano!"

.....

Aso Sa: 12 Me 2019.  
Tusi Faitau: Tanielu 1: 1 – 20  
Manatu Autū: **Tanielu, o le atalii o le tafeaga.**

O Tanielu o le tala o tatou taimi. O se tala o tafeaga, e faamatala ai faiga filifiliga e feagai ma i latou e fou le taunuu atu i se malo: o le faatasia po o le faaeseese? O igoa fou poo igoa tuai? O taumafa fou poo taumafa masani? O le tala ua faafia ona faatino i le faasolo mai o senituri. O le filifiliga i le va o nei itu e lua (o nisi taimi e faamalasia se tasi o nei itu i luga o tagata sulufa'i fou ua taunuu e i latou e talia mai) e i ai ona tuatuagia

maoa'e. Ua talia lautele lava, o tagata Isaraelu o Tenemaka na latou sao mai le Fasiotiga a Siamani, ona mo tagata Tenemaka, e leai se 'matou' ma 'latou' i le va ma Isaraelu, ae na o le 'matou'. Ia, o Tanielu ma ana uo sa 'faatasia' pe sa 'faaeseese'? O le upu moni e pei lava o sina vaega o itu uma e lua. Na latou talia a'oa'oga faa Papelonía (o tu ma aga) ma le suia o latou igoa, ae na latou vase le laina i le oneone ina ua oo i mea'ai a le malo (fuaiupu 8). Aisea ua faapea ai i taumafa? Mata o se mea e faasino i le avea o i tatou e fua i mea tatou te aai ai? Pe leai lava se mea e afaina ai taumafa, ae ona o le mana'o e fa'aali atu o i latou e lē o i lalo o le pule a le tupu, ma o lo latou fa'aaloalo atoatoa e ave lava i lo latou Atua?

.....

Aso Sa: 19 Me 2019.  
Tusi Faitau: Tanielu 7: 1 – 18  
Manatu Autū: **Fa'aaliga o le mana o le Silisili ese.**

O nisi vaega o le Tusi o Tanielu – e pei o le vaega lenei – e faasino i le ituaiga tusitusiga e ta'ua o 'apokalifa'o lona uiga o le 'natia'. E faapea foi le Tusi o Fa'aaliga i le Feagaiga Fou. Na te fa'aaogā le gagana faa-faatusa e faamatala ai tulaga moni o tutupu ma mea o le tutupu i le lumana'i. E felanua'i ma mata'utia, ma na saunia ina ia faafefe ma faatupu le mata'u. O i latou na ulua'i faitau ai pe faalogo ai, e sili atu lo latou malamalama nai lo i tatou, i le faatatau ma faasino i faiga malo o lena taimi – o Papelonía, Peresia ma Eleni. Peita'i e lē avea le tuana'i o le taimi na tutupu ai nei mea e manatu ai ua na o se tala faasolopito ua uma. O se mea moni lava o tupu i le taimi nei. O loo i ai pule sauā ma malosiaga pi'opi'o o loo galue i le lalolagi. O loo tatou ola i taimi mata'utia. O le Tusi o Tanielu – e pei o le Tusi o Fa'aaliga – e lē tau ina faailoa le lalolagi e pei ona sa i ai, ae faatatau i le lalolagi o i ai nei – ma o le lalolagi e i ai manu feai ma o latou nifo ma mai'u'u.

Peita'i, a uma ona tatou fefefe i nei fa'aaliga, o loo i ai le isi. O loo ti'eti'e le Atua i le mana ma le viiga. O lana pule aoao e pulea atoa ai ma manu feai. Ma e na te tuuina atu lea pule i le 'tasi e pei o le atalii o le tagata', o lē talia le 'malo e faavavau'. E sa'o pe afai e faasino lenei faitauga ia Iesu Keriso, ae i le aotelega o le 'atalii o le tagata' e faasino i le nuu atoa o le Atua o Isaraelu. E faataunuu fuafuaga uma a le Atua e ala ia i latou – ma ala mai ia Keriso.

.....

Aso Sa: 26 Me 2019.  
Tusi Faitau: Kenese 32: 22 – 32  
Manatu Autū: **O le tamapi'i o Iakopo.**

Ou te le'i mautinoa e tumau le galuega na tofia i ai a'u. I ni nai vaiaso itiiti na suia atoa ai le pulega o le kamupani ma sa le'i manatu le Ofisa sili ou te talafeagai. I se faatalatalanoaga na ia fesili mai ai ma le fa'aaloalo, pe ua faatau lo'u fale. "*O loo tapena i ai le aulotu,*" o la'u tali atu lea. "*Oi, ia ua lelei la. Ae vaai oe, toe foi mai i le isi lua vaiaso ma faamatala mai ni mafuaaga lelei e tatau ai ona matou talia oe.*" E le'i lelei sa'u moe i le po i aso na sosoo ai, a o fai la'u tauiviga poo le a se tala ao le a se tali atu i lenei faafitauli ua tula'i mai. Na tauia lelei la'u tauiviga i lena mataupu.

O le aso a o lumana'i le tapenaga a Iakopo e toe feiloa'i ma lona uso, sa le'i maua sana moe. O le a se ituaiga feiloa'iga a fai? A o ia lagona le fememea'i, na alu le po o ia tauivi ma na iloa ai o loo ia fagatua ma le Atua. O Iakopo, lē na ia gaoia le faamanuia a lona tamā ma sa faamoemoe mo le faamanuia a lona uso, ua ia manatu o se avanoa lelei foi lenei na te maua ai ma le faamanuia a le Atua. Na manu'a Iakopo i lana tauiviga ae na ia maua le faamanuiaga a le Atua. O Iakopo, finau ma sogasogā, ua ia tuua le fagatuaga i se tulaga e manu'a ma faamanuiaina! A o tatou alo atu i mafaufauga i tauiviga i lenei vaiaso, mata o le a avea Iakopo ma o tatou faasinoala – o se tagata na ia iloa o

faamanuiaga a le Atua e maua mai i le fetaiaga ma tauiviga, ae lē o le 'alo ese mai ai.

.....

Aso Sa: 2 Iuni 2018  
Tusi Faitau: Galuega 1:1 – 11  
Manatu Autū: **Afio A'e: o Iesu i le tino ua afio a'e i le lagi.**

O le ulua'i Ekalesia ma ulua'i tagata o Iutaia sa masani ma tala o le aveolaina i le lagi mai le olaga o Enoka ma Elia, o e na aveolaina i le lagi. Peita'i i le tete'e atu i faiga lē amiotonu a le Malo Roma, na toe faatuina ai e le Atua Iesu mai le oti, ma folafolaina ai le faamoemoe mo i latou uma e feagai ma ia ituaiga faamasinoga lē amiotonu ma sauaga mata'utia. I le tuana'i ai o le Toetu, na fa'aali Iesu i la le tino i ona so'o ma aai faatasi ma i latou a o i ai i lona tino, ona afio a'e lea i le lagi i lona tino. O le tino gauia-faasatauroina-toetu lenei ua afio a'e i le lagi, auā o le tino gauia ua avea ma le vaaiga o se tino liliueseina, ua nofo i le itu aao taumatau o le Tama o le Tolu Tasi Paia.

O le sagatonu o faiga malo, e pei ona faatinoina e sauaga, latou te saili e faatama'ia tino e ala i le fasioti, e faataapeape tino e ala i le faatupu faalavelave, e faasatauro lē amiotonu tino, e faaleiloloa tino e ala i le faatigaina, ma ia soloia atoatoa le ola. E tuu faafeagai ma nei faiga, o le alofa o le Tolu Tasi na te faafoa o latou talia ma opoopo tino i totonu o latou lotoā, ma o le afio a'e o Iesu i la le tino o se tofo lea i le ituaiga faafeiloa'i e taliaina mai ai tino faaletino. O i latou e faafeiloai e le alofa o le Tolu Tasi ua valaauina ina ia latou talia e ua loto mafatia ma auai i le faamalologa o latou tino manu'anu'a.

E pei o i latou ulua'i soo na mulimuli ia Iesu, o gafea e ono faafoina ai i tatou e le Atua i a tatou faitauga o lenei vaiaso?

.....

Aso Sa: 9 Iuni 2018 (Aso Penetekoso)  
Tusi Faitau: Kalatia 5: 22 – 26  
Manatu Autū: **Alofa**

O loo tautala Paulo faatatau i lenei lisi o se mea atoa e tasi, o se fua e tasi. Ma o le mea moni, o le fua ua faamoemoe e fafaga ai tagata ua galala i le fia 'ai, ma e luluina foi le fua mo le lumana'i. O le fua e tosina gofie i ai le vaai – tatou te fe'a'ei i luga o aupā e tau mai pe a pula, ma tofogi le taugata e faatau ai e ui ina ua afifi i pepa iila. E peisea'i o loo fai mai Paulo, '*...ia mapu ma malolo i le alofa tunoa o le Atua, o la outou taumafataga lenei, ma ia outou faasafua atu e fafaga ai isi tagata o outou tuaoi*'.

O le aso lenei o le Penetekoso, o le aso e faamanatu ai le afio ifo o le Agaga Paia i luga o uluai aposetolo, 'o se agi malosi o le matagi' a o latou tapuai i le Atua. O le aso na aumaia ai le maopopo mai le salalau solo, o le malamalama mai le fenunia'i. O lenei fua o loo avea pea mā tatou mo la tatou taumafataga, ma o loo suamalie pea.

Ua masani ai le au Kerisiano ona tatou avea lenei faaputuga o fua faaleagaga e peisea'i o se lisi 'o mea e tatau ona fai', ma foliga mai ai e mafai ona tatou togi a tatou amio e sefulu togi pe a sa'o ona faatino. Ae leai! E le o se faasologa o ni faamoemoega, poo se faiga faavae mo ni amio. O lenei le taunuuga o le mapusaga i le alofa tunoa o le Atua, ae lē o se lisi o galuega e fai ina ia maua mai ai. O fua, ae lē o galuega.

.....

Aso Sa: 16 Iuni 2018  
Tusi Faitau: Esoto 1: 8 – 12  
Manatu Autū: **Valaau le faatosaga**

O a'u e fiafia tele e matamata i le ata faasolo o le *Valaau le Faatosaga* i le televise a Peretania. Ona o a'u sa avea o se tamaitai tausi ma'i, o lea e faigofie ona ou iloa lelei tulaga uma e oo i ai le au faatosaga: o lo latou olioli i le fanau mai o se tagata fou i le lalolagi, o lo latou faanoanoa tiga pe a lē ola se pepe, o lo latou naunauta'i e glulue mo le soifua maloloina ma le manuia o le nuu atoa. E silafia lelei e faatosaga mea o loo tutupu i totonu o le nuu. Latou te vaaia aiga i o latou taimi e sili ona ma'ale'ale ma taimi aupito sagisagi fiafia ai.

Mo Seepa ma Pua ma a la'ua uo, o le faatonuina e fasioti pepe e fananau mai o se mea matuā mata'utia tele. O la latou faatautaiga ma le faatuatuga i lo latou valaauina, e tele sona aafiaga, e le gata mo le nuu, ae mo i latou lava. Pe na o le to'a lua lenei na la'ua tete'e, pe ua fai i la'ua ma sui o le faapotopotoga a faatosaga atoa, na latou tete'e faatasi i le poloaiga a Farao? Pe na o i la'ua, pe na fai ma sui o i latou uma, o le gaioiga faapolotiki a nei fafine e to'alua, ua na lu'iina le paoa sauā o le tupu fou ma le lē alofa o Aikupito.

O lenei vaiaso tatou te faitauina ai tala o gaioiga faapolotiki a fafine. O le to'atele lava e faaosofia i le vaai alofa mo le manuia lautele o tagata. O tala o aso anamua e fesootai lelei ma tala o fafine o le luasefulutasi seneturi, i soo se itu o le lalolagi.

.....

Aso Sa: 23 Iuni 2019  
Tusi Faitau: Luka 2: 21, 36 – 38  
Manatu Autū: **Ua na o si olomatua lava o Ana**

I le tele o aganuu e itiiti lava le taualoa o fafine, ae maise pe afai e leai sana fanau, e leai sona to'alua, ua maliu lana tane pe leai se aiga, se galuega poo se tofi. Pe a fua i nei tulaga, o lona uiga e leai se lauiloa o Ana le perofeta fafine i le sosaiete na ola a'e ai. Afai e i ai se tasi na iloa o ia, atonu sa maitauina se olomatua

sa nofonofono solo i autafa o le malumalu i aso fai soo e leai se mea e alu i ai.

Peitai o Ana o le fale-eketise, sa faaputu lona tamaoiaiga o ona taimi ma lona faatuatua i lona tapuai i le Atua ma faasoa le alofa tufa mai o le Atua i soo se isi e fia faalogo ia te ia. O le lē faalavelaveina o lona faasagatonu i le Atua na ia iloa gofie ai le taunuu ane o se ulugalii talavou matitiva, na savali ane ma le usitai i tulafono a Mose e ala i le aumaia o la la'ua ulumatua i le malumalu e ofoina atu i le Atua. Na iloa e Ana e lē na o se isi pepe lenei (o lo'u toalua fai mai e foliga tutusa uma pepe), ae na ia silafia lelei o le faaola folafolaina lenei o le lalolagi.

E tulaga ese mo se tasi e ta'ua i le Tusi Paia o le perofeta, le leai o ni faamaumauga o upu ma tala a Ana. E pei Ana o le tele o isi fafine i Tusi faitau o lenei vaiaso, e lē faailoaina o latou talaaga – o auupega faalilolilo i le itutaua a le Atua! Atonu e lē o faamatalaga e taua i le olaga faaperofeta, a e o le loto faamaulalo ua tatala atoa i le Atua. Tatou faafetai i le Atua mo perofeta e pei o Ana!

.....

|              |                      |
|--------------|----------------------|
| Aso Sa:      | 30 Iuni 2019         |
| Tusi Faitau: | Luka 8: 26 – 39      |
| Manatu Autū: | Tutumau i le filemu. |

O nai tausaga talu ai sa i ai la'u uo na ia a'oa'oina lona afafine mai lona laitiiti, afai e fetaia'i ma faafitauli o le olaga ma tupu ai lona ita, e tatau ona ia taumafai e 'tutumau i le filemu'. O se faiga lelei lea e sui ai le auala faalogogatā o le fia nofo toatasi ma nofo ese.

O Evagelia ua latou tatala atu i tatou i le faatasi agalelei mai o Ia na afio mai e aumai le filemu, o le faaleleiga ma le toe faafoisiaina – o le faatasi mai o Keriso. O totonu o lenei faatasi mai e taliaina ma opoopo, tatou te mafaia ai ona faafetaia'i o tatou nofoaga aupito pogisa, o nofoaga tiga, o olaga inosia tau nānātia o loo tauave, o lo tatou ita, o naunautaiga, o talitonuga

tuai ma mea uma o latou noanoatia i tatou i le fefe ma amioga o le tuana'i. E lē faigofie le fa'aalu o le taimi e faagalo ese atu mea uma na tatou tauave mai i le olaga umi atoa. Mo le toatele, o se mea taufaafefe tele lenei faiga pe a mafaufau i ai.

O le taule'ale'a ua tatou faitau ai i le asō, ua na maumautaia le faatasi mai o Keriso o se auala lea e aumai ai le filemu – o le faatasi mai na te toe faafoisia o ia i lona mafaufau lelei, ma tosina ai o ia i se fesootaiga vavalalata ma le Atua.

O le 'tutumau i le filemu', o se filifiliga e fai i aso taitasi, i taimi uma ina ia tumau ai pea i le mafutaga faatasi ma Keriso o Lē na te faamālōlō, faafoisia, ma e pei ona o le a tatou faitau ai i lenei vaiaso, na te faamallosia i tatou.

.....

|              |                                |
|--------------|--------------------------------|
| Aso Sa:      | 7 Iulai 2019                   |
| Tusi Faitau: | Luka 10: 17 – 24               |
| Manatu Autū: | Mata e vaai, taliga e faalogo. |

O le au soo o Iesu, i lo latou mafuta ai mo se taimi umi, na o atu e pei ona faatonuina ai i latou ma toe foi mai ma le fiafia i le i'uga o la latou feau. Sa faatumulia Iesu i le fiafia ma vivii i le Atua. Ona ia ta'u atu lea i le au soo o lo latou tulaga faamanuiaina, e le gata o mea uma ua latou faia, ae faapea foi i mea ua latou vaai ma faalogo i ai faatasi ma ia.

E faigofie ona faagaetia i tatou e sili atu ona o mea mata'utia, e aunoa ma le mafaufau loloto i mea tatou te faia e sili ona taua i le Atua. O se taimi puupuu talu ai nei, sa ou manatunatu ai e vaai mea o loo faia e le Atua i o'u autafa, o mea e lē taia ai la'u vaai. Sa ou filifili e tusi ma faamaumau lelei i la'u api. I le faai'uga o lona vaiaso, na ou iloa ai ma le ofo le tele o mea na faate'ia ai a'u. O tatou mata e vaaia mea e tele, ma o tatou taliga e faalogo i le tele o mea, ae lē o faamauina e o tatou loto, vagana ua tatou taumafai e fai. E mua ona tatou naunau e vaai mea mata'utia, e misia ai i la tatou vaai ma le faalogo mea o loo faia e le Atua i totonu ma autafa o i tatou.

O oe ma a'u ua faamanuiaina. O loo faia e le Atua mea silisili ma ofoofogia i o tatou autafa. Mata e faamauina e lou fatu ma lou loto nei mea uma, a o e faitauina Luka i lenei vaiaso?

.....

Aso Sa: 14 Iulai 2019  
Tusi Faitau: Luka 12: 1 – 12  
Manatu Autū: Ia mata'alia.

O le fefe o le tasi lea faalogoga aupito sili ona malosi o le tagata! E mafai ona avea ma malosiaga na te saisai le toatele o tagata – pe o le popole ne'i leiloa le ki poo le maumau o le soifua. O le oti o le auala lea e ui ai mea uma na faia e le Atua, ae o le naunautaiga o le natura o le tagata o le taumafai lea ia ola pea. O le fefe i le oti e faaosofia i tatou e fai gaioiga, e fai tapenapenaga o aso taitasi, e pei o le vaai o le foma'i poo le tolopō o faigamalaga ma popole e tuua le fale.

Peita'i, o le fetalaiga a Iesu i ona soo ina ia mataala i e fasioti i latou, e lē o le oti o le tino, ae o le oti faaleagaga: o le motusia ma vavae ese mai le Atua e faavavau. E finagalo Iesu ina ia tatou mata'alia i le mata'utia sili o loo lamatia ai lo tatou ola, ma o lena mata'utia o le tevolo, o loo teu faafoliga mai e pei o le malamalama. O loo molimau le Tusi Paia o ia o le fasioti tagata, o lē lamalama ma o le fili sauā e sili ona mata'utia o le Ekalesia. Pe afai e te iloa o loo i ai le fasioti tagata o loo faasaolo ma ta'a saoloto i lo outou pitonuu, mata e te lē tapena ma sauniuni e puipui mai oe? E faapena le tulaga o loo apoapoa'i mai ai Iesu ma ia 'aua ne'i alu aunoa ma le amanaia: 'ia fefe i ai', 'ia mata'alia'!

.....

Aso Sa: 21 Iulai 2019  
Tusi Faitau: Iopu 19:20  
Manatu Autū: **Avanoa itiiti ua sao ai**

O lenei vaiaso o le a tatou faamamafa ai nisi o faamatalaga ma fetalaiga masani mai le Feagaiga Tuai. E ui ina o fetalaiga ma saunoaga masani, ae toatele i latou e lē iloa lelei lo latou ulua'i tupuaga – ma o nei foi saunoaga atonu e lē masani ai le tele o atunuu, ma e eseese lona faauigaina e tusa ma le siosiomaga e fai ai.

O le saunoaga o lenei aso e faasino i le upu a Iopu o lē na fetaia'i ma puapuaga i lona olaga, na leiloloa ana mea uma e oo lava i lana fanau totino. Na fetaia'i ma se gasegase mata'utia i lona pa'u, ma na ia talitonu na sao ma le pa'u o ona nifo, o lona uiga, atonu na toe lava o sina pa'u manifinifi o loo pipi'i ai ona nifo. O aso nei, o lenei saunoaga poo lea faaupuga e faasino i le sao mai se faalavelave mata'utia.

Na ou matamata i se ata i le televise faatatau i se misionare na malaga i fafo ae 'ave faamalosi ai e nisi. Na ia vaai atu a o fasiotia se tasi o ana uo misionare, ma sa faatalitali o ia e sosoo ai. Na uma atu aso faigata e sefulu, ae alofagia o ia e se tasi o tagata leaga, ma mafai ai ona ia sola ese i le po. Na ia lagona ua ia sao ma le pa'u o ona nifo.

I le lalolagi o aso nei, e toatele tagata ua sosola ese mai faalavelave tutupu, ma toetoe lava na o latou ofu e pipii i latou papatua. E toatele ua sosola ese mai taua, o sauaga, o le oge ma tuulafoa'iina. E toatele e maliliu i le ala, ae o nisi e iloa ua latou sao ma le pa'u o latou nifo.

.....

Aso Sa: 28 Iulai 2019  
Tusi Faitau: Mataio 5: 38 – 40  
Manatu Autū: Mata i le mata

O lo'u talavou sa ou fialia i faaupuga lauiloa mai le Feagaiga Fou ma o lenei vaiaso o le a tatou mafaufau ai i nisi o nei faaupuga. Tatou te amata i le faaupuga ua leva o le 'tulafono o le tau ma sui' (Esoto 21:23-25), o lona ta'u i le faa Latina o le 'lex talionis'. O le faatinoga faavae o le tulafono e afua mai

faamasinoga. O le fuafuaga tatau a faamasinoga o ia ona aso, ia i ai se faasalaga e fetau lelei ma ia tutusa lelei ma le soligatulafono ua fai.

O le toatele o i tatou, pe o tatou uma foi, ua faamanu'alia e o tatou fili, poo se uo, poo se aiga poo se tasi tagata. O nisi ua latou faaleagaina o tatou igoa ma le loto i ai, ua latou faalēaogaina lo tatou ta'u leleia ma latou faasalalau tala pepelo e uiga ia i tatou. E faapefea ona tatou tali atu i nei tiga ma mea leaga? E masani lava o lo tatou ulua'i mana'o o le tau ma sui, e saili ina ia faatutusa ma faapaleni le mea ua fai mai.

O le tali atu i lenei faiga, ua afio mai Iesu, e lē ina ia aveese le tulafono ma perofeta (Mataio 5:17), ae ina ia matuā fai se suiga tuufaafegai ina ia aumai mo i tatou se laasaga fou, se laasaga amiotonu, ma se laasaga e sili atu ona lelei tau le faamasinoga – ina ia 'alofa atu' i o tatou fili ma tatalo mo i latou e faasauā mai ia i tatou (Mataio 5:44).

.....

Aso Sa: 4 Aokuso 2019  
Tusi Faitau" Iakopo 3: 1 – 12  
Manatu Autu: **Afi mu saesae**

O le tau mafanafana i Niu Sila e tele tapu e fai mo afi e susunu - e leai ni afi e fai i tafaoga, o faapa'u poo le susunuina o otaota. Na o sina aloiafi, poo se muli sikareti ma se savili, ae le umi vaaia se afi mu saesae e le mafai ona taofi. E seasea ona tatou vaaia i se tulaga maoga e le tele o mu ma faatamaia ai mea totino i Kalefonia poo Ausetalia, peitai e i ai aso e tutupu ai ma sosolo ai le afi e faaleagaina ai aiga ma tagata soifua.

E faapena tutusa le leaga o le mea e fai e le afi e faaumatia ai vao ma laau, o vaomatua, maota ma laoa ma soo se mea i lona sosolo, e fapea le leaga o se upu ma se tala lē alofa i luga o soo se auala o faasalalau lautele na te faasalalau se tala.

I lenei vaiaso o le a tatou faitau ai pe faapefea ae o a foi faasalalau ma fesootaiga tatou te fai faasino i sisi tagata, pe fai

i o tatou laulaufaiva poo piano poo a lava metotia o oo tatou maua. E faamanatu mai foi le auala o tatou fesootai ai, o le ituaiga gagana tatou te fa'aaoga, o upu ma tala, latou t eta;u maia le ituaiga tagata o i ai i tatou. O le laulaufaiva lava e tasi e mafai ona fa'aaoga mo le lelei poo le leaga.

.....

Aso Sa: 11 Aokuso 2019 (Aso Sa Tama)  
Tusi Faitau: Teuteronomie 1: 6 - 11  
Manatu Autu: **Mulimuli i le taitaiga a le Atua**

Ua toe tapena foi ato a le nuu o le Atua ma ua sauni e toe malaga. O le a le mea ua na faaosofia le malaga? O le uluai laina o loo ia aumaia le tali, "*O le Alii le Atua ua fetalai mai ia te i matou i Horepa*" (f.6) O le amatamea o le Atua ma ana folafolaga o loo i ai le faamuamua i le Teuteronomie ma i totonu o faitauga o lenei vaiaso.

E ofoina mai e lo tatou lalolagi le tele o filifiliga mo i tatou. O se tasi aso sa ou tu ai ma sisila i le faleaiga a o tau saili se mea'ai a lo'u afafine. Pe a ma le 30 ituaiga mea'ai e filifili mai ai: o se filifiliga faa oso ma'i. O le upu moni e i ai filifiliga e sili atu le tāua nai lo mea'ai. O le aano o le mataupu, o le mamafa o le filifiliga e masani ona pa'ū mai i o tatou tau'au. O le a tatou fesiligia o tatou tofi, o tatou faiā ma le auga o aga'i i ai lo tatou ola. I se lalolagi aunoa ma le Atua, o a tatou filifiliga e nofo lava ma tatou.

Ua valaaulia i tatou e Teuteronomie ina ia tatou vaai i le olaga i le malamalama o folafolaga a le Atua. E suia atoa e le tulaga lena le taaloga. E afio atu le Atua e muamua i luma o tagata ma na saunia le auala; o la latou tali atu o le usita'i i le Atua.

O le olaga lenei e lē na o le sailiga o lo tatou faamoemoe, ae o le faalogo pe faapefea ona tatou fetau i le faamoemoe o le Atua i lenei lalolagi. Ua valaauina i tatou e Teuteronomie ina ia tatou mafaufau faapei o tagata o loo ola e tusa ma le folafolaga a le

Atua. Ina ia faia lena, e manaomia lo tatou usitai ma faalogo i le taitaiga a le Atua.

.....

Aso Sa: 18 Aokuso 2019  
Manatu Autu: **Isaraelu e, faalogo mai (*Hear, O Israel*)**  
Tusi Faitau: Teuteronome 5:1-5

O le faitauga poo le tusi faitau o lenei aso e puupuu, ma e na o le ono fuaiupu, ma o loo faagata le faitauga, i luma mai o le molimau a Teuteronome i faatonuga poo tulafono e sefulu e pei ona fa'aaauina i le fuaiupu e luasefulu tasi (21). E lelei ona faitau i nei fuaiupu e ono. Faapei o fuaiupu uma i totonu o le Teuteronome, o le vaaiga muamua o loo latou manatu ai o se u'amea faapuna (boilerplate), faapei o fuaiupu sa o tatou faitauina i soo se nofoaga. Peita'i, ia latalata lau silasila. O loo manino lava Mose, o le feagaiga, o se meaalofa faamaoni i le vaaiga a tagata. "E le o tatou tamā na osi ai e le Alii lenei feagaiga ma i latou, a o i tatou lava, o i tatou atoa uma o ola mai iinei i le aso nei" (f3). Peita'i i totonu lava o le Teuteronome, o loo fai mai ai Mose, na faia e le Atua le feagaiga ma le ulua'i augatupulaga, o i latou ia na o ese mai Aikupito i le 40 tausaga talu ai, (e pei ona faamauiina i le Teuteronome 1:34-40). O loo faailoa e Mose, o le fanau a le augatupulaga muamua, ae le o le augatupulaga muamua. O loo manino lava i le feagaiga a le Teuteronome le aofia uma o augatupulaga i le lumana'i, ma e faamaoni lava, o augatupulaga uma lava o le lumana'i o Isaraelu. O loo fa'aaau lava ona fetalai le Atua i nei upu, ma le faamoemoe o le a fa'aaogaina e ona tagata. O loo fa'aaauina lava ona ta'uina mai e le Atua i latou mo oe ma a'u, ma i latou uma o loo faalogo.

.....

Aso Sa: 25 Aokuso 2019  
Manatu Autu: **Faasologa o malo (*Table of Nations*)**  
Tusi Faitau: Kenese 10:1-5, 21-32.

A'o i ai i se asiasiga i Aialani i Matu, sa ma nonofo faatasi ma lo'u uso, ma talanoa mai ia te a'u e uiga i le gafa o le aiga, i le itu o lo matou tama. O le mea na maitauina e foliga e laititi ae sili atu nai lo o igoa o se kolisi ma laina ma le faatupula'ia o uiga, a'o o'u fesili e uiga i le faasologa o igoa ma amata ai se talaaga. Ia ma e faatatau lava i le talaaga o le tagata. Filifili so o se igoa mai le gafa o le aiga o Noa, e pei ona i ai i le Kenese e 10, ma o loo i ai se talaaga i tua atu o lena igoa. E le ua na o se uiga ua aumai i igoa ta'itasi, ae mai le olaga o loo olaina i tua o le igoa. O Peleko o se tasi o igoa o loo ogatotonu i le Kenese lenei e 10, ma e na o le pau lea o le igoa o loo faamatalaina. O le uiga o lona igoa, o le "vaevaeina" auā o ona aso na vaevaeina ai le lalolagi. O se fuaitau ua faigofie ona faapasi, peita'i ua o se laina ua faamaite se vaevaeiga ua mafai ai ona malamalama. I le vaega o le faitau aofa'i o tagata i le taimi o le Olo i Papelu, poo le vaega o faafanua i le taimi o Pangaea ma Gondwanaland? Ma afai o nei igoa e ta'uina mai ai anamua, mamao ma mata'utia ia i tatou, o Peleko e fesoota'i ai tatou i lena taimi, ma e moomia ai le galue e ala atu i le vaevaeina i le toe faaleleia.

.....

Aso Sa: 1 Setema, 2019.  
Manatu Autu: **Ia pepese le lalolagi uma!**  
(*All the Earth – sing!*)  
Tusi Faitau: Salamo 100.

Salamo 100: 1 – 2; *Ia alalaga i le Alii le lalolagi uma. Ia outou auauna atu i le Alii ma fiafia; o mai ia outou i ona luma ma le alaga fiafia.*



I se lalolagi o i ai le malosiaga e ave ese ai tagata mai o latou faasinomaga, o le faailoga lanu, ma le taaviliga o le tamaoaiga ua mafai ona faamanuiaina ai se toaitiiti, peitai e le tineia ai le mea e aupito sili ona taua i tagata o le malosi e faailoa ai le olioli, o le viiga ma le faafetai. O tagata o Haiti, o le tasi lea o faata'ita'iga mai le tele o faata'ita'iga, i le luitauina ai o faafitauli nei e faamaonia ai lea soifuaga.

E peiseai o le tagata e i ai le fai-salamo, o loo i ai le mautinoa ma mauaa lona faamoemoe. i se vaaiga lautele, o loo valaau ai le fai-salamo i tagata uma taitoatasi, i soo se nofoaga ina ia avatu le faafetai, o pesega ma le tapuaiga e tatau mo le Atua. Ioe, o le valaau mo le lalolagi uma, e le mo na o ni nai tagata latou te faaleoina lea leo o le olioli. A o le fesili; pe mafai e nei faaupuga ona tuleia i tatou taitoatasi ma atunuu e talai o tatou pa puipui ina ia mafai ona tatou tutu faatasi?

O mafai ona e lagonaina le ta'alili o le fiafiaga i le valaau e vivii, e ese mai i le tele o mau o loo molimauina i la tatou vaai i fete'enaiga o loo tutupu? E mafai ona tatou vaai foi i le taua o le fa'aaogaina o veape e pei o le fai, auauna, o mai, iloa, ulufale, avatu le viiga ma ia faamanuia. O loo lotolotoi ai i totonu o nei veape le leo o le olioli. A tatou mafaufau atili ai, pe a tutu faatasi tagata uma i lea matafaioi o le vivii; aua lava nei o tatou melea le malosi o le ola vivii mo i latou o loo taumafai e tauina lea faamoemoe.

.....

Aso Sa: 8 Setema, 2019.  
Manatu Autu: **O vai o le Fofoaga.**  
(*The waters of Creation.*)  
Tusi Faitau: Kenese 1: 1 – 10, 20 – 22.

Kenese 1: 6 -7; *Ua fetalai mai foi le Atua, i ai i le va o vai le va nimonimo, e va a'i isi vai ma isi vai. Ua faia e le Atua le va*

*nimonimo, ua va a'i vai i lalo o le va nimonimo ma vai i luga o le va nimonimo; i le ua faapea lava.*

I le amataga ma le faaiuga o le Tusi Paia, o loo faataoto mai ai talaaga ma faamatalaga e faatatau i le vai – ola o le suavai. Tatou te i ai i lenei vaiaso mai lava i le vai o le fofoaga, Kenese 1; I le vaitafe o le vai o le ola o loo i le Fa'aaliga 22. I le amataga, sa i ai se faapotopotoga tele o vai. I le fofoaga a le Atua na Ia vaevaeina ma tuu eseeseina ai vai mai le soona nunumi i se tulaga talafeauga ma lona finagalo. O le uluai aso na Ia tuueseeseina ai le malamalama ma le pouliuli. I le lona lua o aso na Ia faia ai le va nimonimo; e va a'i vai i lalo ma vai i luga. O loo i ai le mafaufauga mo vai i luga; o se faapotopotoga o vai o loo ta-aofai i se mea se tasi i le nofoaga o loo i ai le la, masina ma fetu; ma o vai ia o loo afua ai uaga. I le aso tolu na faapotopoto ai e le Atua vai i lalo ma ali a'e ai le eleele matutu. A o le aso lona lima na tupu mai ai le ola i nei vai. O lo tatou malamalama faasaienisi o le lalolagi o loo faatuputupulaia pea, peita'i o nei mafaufauga o loo tata logo mai pea ia i tatou i le faatulagaga o le lalolagi ma le natura o mea. O le fofoaga a le Atua ua lelei ma atoatoa. O le vai ma lona tulaga tatau e taua lava mo le ola. Ae peita'i, e tatau ona tatou iloa, i totonu o faamatalaga a le Tusi Paia, o loo i ai lava ma toe faatumauina pea le malosiaga faaumatia o le suavai, e faapa'itau pea ina ia toe faafoi ma manumalo i le lalolagi ua uma ona fofoaina. O le malosiaga o faitioga o loo tumau pea e fai ma lapataiga.

.....

Aso Sa: 15 Setema, 2018.  
Manatu Autu: **Valaau Iesu i e Fiainu.**  
(*Jesus calls the thirsty*)  
Tusi Faitau: Ioane 7: 37 – 39.

Ioane 7: 37b – 38; “*Afai e fia inu se tasi, ina sau ia ia te au e inu ai. O se faatuatua ia te au, e faapei ona fai mai o le Tusi, E tafe mai o vaitafe mai totonu ia te ia, o le ola lava.*”

E le mana’omia se faailoga tikeri i le saienisi ina ia iloa ai o le vai e aoga tele mo le soifua o le tagata. E le manaomia foi se faailoga tikeri i le mataupu silisili ina ia iloa o le fiainu o se upu faatusatusa a le Tusi Paia mo le naunauta’iga ina ia maua le ola. I la tatou tusi faitau mo le aso lenei, fetalai ai Iesu, o loo Ia uumauina mea nei e lua, o le mea e tatau ma le mea e mana’omia mo le taumasuasua o le ola.

O se faafitauli na molimauina mai i le femalagaa’i mai lea nofoaga i le isi i le lalolagi ua i ai nei o le faateteleina o le eseesea i le va o le tagata mativa ma le tagata mauoloa, o loo fesiligia po o le a le uiga o fuaitau nei e lua; o le “mea ua iai” ma le “ua lava.” I le malaga ese mai ai ma Mozambique ae agai atu i Amerika, na ou vaaia ai meaai ua totoe i luga o le ipu po o se ponaivi moa nai lo se ipu ua salusalu mamaina ua aunoa ma se meaai o totoe ai. Ua le toe faateete ma faaititia foi le fa’aaogaina o le vai na alu ai le taimi e amo mai i se vaieli mamao, o se vaitafe po o se vaitoa, ae ua faalagolago i le paipa mo le vai vevela ma faasusuina ai le lumafale. E le o o tatou aia tatau ma o tatou saolotoga lea e fetalai i ai Iesu, a o e o loo faitauina faatasi ma e ua alofaina e Ia. Ua valaauina i tatou ina ia ola faapei o e o ola i mea ua lava ma faasoa le anoanoa’i o le ola o le na foafoa. Mo le leleiga o le lalolagi na afio mai ai Iesu e lavea’i.

.....

Aso Sa: 22 Setema, 2018.  
Manatu Autu: **Fanau i le vai ma le Agaga.**  
*(Born of water and the Spirit)*  
Tusi Faitau: Ioane 3: 1 – 15.

Ioane 3: 5 – 6; “*Ua tali atu Iesu, “E moni, e moni, ou te fai atu ia te oe, afai e le fanau se tasi i le vai ma le Agaga, e le mafai ona sao o ia i le malo o le Atua. O le ua fanau mai i la le tino, o le tino lea; o le ua fanau foi i la le Agaga, o le agaga lea.*”

I le suesuega tele mo isi paneta pe maua ai se ola, na tu’u tasi ai lava le sailiiliga ma suesuega a saenitisi pe maua ai se okesene ma le hydrogen – H<sub>2</sub>O. Na faia ai le mau a saenitisi, pe afai e maua ai se vai, o le mua’i faailoga lea mo le ola i ia paneta.

O le a lava so tatou manatu mo lea avanoa, e le o se mea tupu fua le tele o matafaioi a le vai o loo faatino i totonu o le Tusi Paia, i lona uiga sa’o o le vai ma lona uiga faatusatusa. I le talalelei ia Iesu Keriso na faamauina e Ioane o loo faaaogaina ai le vai e fai ma faatusa ina ia faailoa ai Iesu. Peita’i, o le faiā i le va o le vai ma le Agaga o le Atua na amata mai i le amataga o le foafoaga, o i na sa ufitia ai le moana i le pouliuli ma fegaoioia’i ai le Agaga o le Atua i le fogatai. (Kenese 1:2)

A o sailiili Nikotemo mo se tali na afua i lona pogisa tele, na toe faafoi ai e Iesu i le amataga, faailoa i ai e tatau ona ia toe fanaufouina i le vai – ia talitonu ma talia Iesu o le Keriso, o lona Faaola – ma le Agaga – ia tumau i le finagalo o le Agaga Paia o le Atua, ia avea ma ona faamafanafanaga ma ona leoleo.

Mo tagata soifua, o le vai o le ola. E 60 pasene o tatou tino o le vai. O lenei vaiaso, ia tatou su’esu’e ma sailiili pe faapefea e le tafe o le vai ma le tafe o le Agaga ona le mafai ona tuu eseeseina ma le tagata soifua.

.....

Aso Sa: 29 Setema, 2018.  
Manatu Autu: **O le Valaau Lautele.**  
Tusi Faitau: Luka 14: 15 – 24.  
*“Amuia le ‘ai i le malo o le Atua.”*

I ni nai aso i le mavae ai o le amataga o le pau maulalo ai o le tamaoai/tupe, na faateia tagata nofo taulaga, i le faatumulia ai

o magaala i tagata solo tete'e, o nisi o taimi e fifilemu, a o nisi foi o taimi e pisapisao. O ai ea i latou? O foliga vaaia o loo faailoa mai ai, e pei e fia ni aso e lei ta'e'ele, e palapala seevae ma tino ua matapala. Pe na valaaulia ea e se tasi i latou e omai i le taulaga? Po o ni tagatanuu moni ea i latou o Argentina? I le taimi tonu lea o loo matou vevesi i le taumafaiga o teugatupe ina ia malu puipui, po o le puipui mai o matou meatotino mai le aafia i le tamaoiga ua faaleagaina, po o le ave o lo tatou faamuamua i mea o lo o tatou mananao ai, ma le manatu maualuga e le aafia i le pau maualalo o le tamaoiga.

O lo tatou tausama'aga e le o so latou lea. O i latou ia e le'i i ai i lo tatou faafanua i tausaga e tele, tatou te le'i su'esu'e lava ia te'i latou, tatou te le iloa o latou foliga, o latou leo, o mana'o e le faamalieina. O ai e feagai ma ia mea? O ai e feagai tonu ma lea matafaioi? Pe le mafai ona tatou tapenaina ma saunia se isi tausamiga? Pe ua tatou sauni ea e aumai i totonu i latou ina ia tatou mafuta faatasi, i le alofa, ma le faamasinoga amiotonu?

O le upu a le Alii, "aumai tagata i totonu, ina ia faatumulia ai lo'u fale." Se'i o tatou faatumulia loa le fale! Pe faapefea? I lo tatou iloa sa tatou mulimuli i atua sese ma ua tataua ona tatou talia le valaaulia a Iesu mo lona tausama'aga, ae mo nei tagata, ua uma lava ona aofia ma valaaulia ai.

.....

Aso Sa: 6 Oketopa 2019.  
Manatu Autu: **Fa'asaogalemuina le tagata.**  
Tusi Faitau: Luka 17 : 20 – 37.

O le a le ola? E fai lava si lavelave o lenei mataupu. O loo si'omia foi i tatou e meaola eseese. O nisi meaola e tāua; o nisi tatou te lē malamalama ai a'o nisi e leai tele se eseese ma tatou. Peitai a agai loa i olaga o tagata, ua lofia lava i tatou i tū ma aganu'u eseese o loo fafauina o tatou talitonuga e fa'ataua i se olaga e sili ona tāua.

E fou atu-falega o loo o'u nofo ai i tua atu o le taulaga. I le aualea lea 'ou te nofo ai e iloa atu ai le anoanoa'i o ata-fa'atusa, o

fa'ailoilo ma igoa 'eseese o loo tusia i laupapa e fa'alauiloa ai le tamāoiga ma le saosaoa o mana'oga eseese e ao ona fa'amalieina o lenei seneturi. O le feau lava o loo momoli mai i le fe'ilafi mai o le anoanoa'i o nei oloa fou : o le ola o le maua o mea!

E matuā eseese lava ma le taofi o le au Faresaio, o ni tagata sili ona mapo lotu ae lē ola ai ma le amio fa'afoliga. Ua latou fesiligia Iesu pei ona i ai le faitauga o lenei aso: o le ola o le usita'i lea i tulafono a le Atua. A fua atu i le olaga o tagata i le vaitau o Noa ma Lota pei ona ta'ua e Iesu, e ese foi: o le ola o le fiafia!

O fa'apefea mai le olaga o e ola ai? O atagia ai le o'o mai o le malo o le Atua pei ona talitālia e Faresaio po'o le fiafia manū o maua le ola e ui ina fa'amalumalu mai le Fa'amasinoga a le Atua pei ona iai i aso o le lolo? O le vala'au mai a lo tatou Alii o Iesu; ia lafoa'i o tatou mamalu ma le mana'o lasi auā ua na o IA lava e maua ai le ola moni.

.....

Aso Sa: 13 Oketopa 2019.  
Manatu Autu: **Faatasi ma a'u.**  
Tusi Faitau: Salamo 104: 1 – 9

A o tau faamae'a ai le tapenaga o mau o lenei vaiaso, o lea ua ou o'o mai la'u malaga i le taulaga i Roma – o le a'ai e masani ona fa'aigoa e nisi o le 'fa'avavau.' O le a fa'atūtū le savaliga i nofoaga sili ona tāua i le Talafa'asolopito o le Lotu Kerisiano e ui o lea malaga e mautinoa o le a toe manatua ai le sauāina o ulua'i Kerisiano. Roma o se a'ai o loo fausia i luga fa'avae ma atu-falega 'ese'ese e fa'amanatu mai ai le alualu pea i luma o le poto o le tagata e ui ina lē tumau ma ma'ale'ale mea na faia e lima o tagata. E leai foi se mea na tatou faia e fa'avavau pe tumau pea. O lea lava foi le feau o loo atagia i talafou a televise i nei aso: o mafui'e, o afā ma matagi malolosi, o ē ua maliliu ma meatotino ua fa'aleagaina. O le lu'i tele o loo feagai ma ē o ola pea o le toe atia'e, toe fa'alelei ma toe fausia.

O mau uma o lenei vaiaso o lo'o si'i mai i le Tusi Paia Eperu. O le tala o le Fa'aolataga a le Atua o loo ta'avili i le talafa'asolopito o ni tagata maumau solo ae na avea ma malo nofo a'ai; mai fale'ie i fale mautū; mai le fale fetafa'i i le malumalu tapua'i. O le ata manino lea o se malo ua fa'avaeina ma fa'atūina. O le fa'avae papa lea o lenei malo e ui e iai taimi na fa'aleaga ma susunuina ai, na fa'atāfea foi i nu'u ese ma toe fo'i ane, e mautinoa le tumau pea o le alofa lē mavae o le Atua i ona tagata ma lana foafoaga tusa lava pe lelei pe leaga.

.....

Aso Sa: 20 Oketopa 2019  
Manatu Autu: **Atiae e le o le talepeina**  
Tusi Faitau: Ieremia 24: 5 – 6

I lou tamaitiiti, sa ou fiafia e fa'aaoga laupapa e fai ma mea taalo. Ou te fa'aaogaina e fausia ai fale tetele ma fale maualuluga ma maota, sei vagana alva ua ou leiloa se isi ituaiga fale, poo ua le lava foi laupapa faatoa ou malolo. Ua mavae le tele o tausaga, a ou le faigaluega pe o aso malolo mai galuega. Ou te malaga asiasi i nisi o taulaga ma nofoaga tetele, e matamata i le tele o fale ma fausaga eseese o loo fausiaina ai. O le galuega atiae poo le fausia oloo faatauaina i tusitusiga a le Tusi Paia aemaise lava i le vaaiga faaletino, o le malumalu i Ierusalem na fausia ma toe fausia i le tele o tausaga. O le ata vaaia lea o le Atua o loo galue pea mo le fausiaina o ona tagata, ma valaau e o mai e galulue faatasi ma ia. E ui i le tele of aigata ma faafitauli. E faamaoni ma atoatoa fausaga a le Atua e oo mai lava i le aso nei.

I o tatou nofoaga ma fale o loo iai i o latou fausaga eseese e mafai ona aumaia lagona o le vaivai i o tatou loto, po o le siitia o o tatou mafaufau ma loto i le Atua. I ia vaaiga matagofie, ua faatusaina i se malumalu e iai sona ala i le lagi. E mafai ona ou

ataie e o loo pele ia te au, ae mafai foi ona ou talepeina i latou i se upu po o le filemu. I le faitauga mo lenei vaiaso, o loo luitauina ai tatou, ina ia atiae faavae ua uma ona faataoto e le Atua.

.....

Aso Sa: 27 Oketopa 2019  
Manatu Autu: **Malosi e lē mā** (*Unshamed power*)  
Tusi Faitau: Roma 1: 16

E faapefea ona tatou ola ma malamalama ma i lo tatou sootaga ma le Atua e ala i le faaolataga a le Atua ia Iesu Keriso? O le fesili lea o loo aafia i totonu o le tusi a Paulo i Roma, lea na tusia i le 55 TTM (Taimi Tuanai le Mesia). Na iloa e Paulo iloa i lona ola, o le Tala Lelei o le malosi o le Atua e ala i le faaolataga ma ua manao e faasoa atu lona iloa mo isi.

E mafai e lenei faaupuga “malosi o le Atua” ona toe aumai taimi pulega malosi, sootaga malepelepe, o le lē faamaoni o e sa pulea i tatou? Faamata o loo gagana i le amanaia ma le lē amanaia? Na tupu ma ola Paulo mai le uiga o lea ituaiga malosi, ae ua ia iloa le malosi ua suia ai lona ola e ala ia Iesu, o le Alo o le Atua, o le malosi e puipui ma fafaga e pei o le matuamoa, o le malosi na te faamalosi sootaga faaleuo, e pei o le tala i le tagata tino gase lea na tuu ifo e ana uo mai le faalo o le fale ina ia faamalolo e Iesu, o le malosi e faamagalalo ma maua le olioli, e pei o le tala i le tamā ina ua tamoe e faafeiloai le toe foi mai o lona atalii faamaumau oa. O le malosi lea o le Atua, e suia ai le ola i le lelei.

.....

Aso Sa: 3 Novema 2019  
Manatu Autu: **Oti i le agasala, ola i le Atua**  
(*Dead to sin, Alive to God*)  
Tusi Faitau: Roma 6: 1 – 14

Ua tatou iloa lenei mea, na faasatauroina faatasi ma ia lo tatou tagata tuia, ina ia faaumatia ai le tino o le agasala, ina ia le toe faapologaina i tatou i le agasala. Aua o le ua oti, ua tu'u saunoa ia nai le agasala. Afai foi ua oti faatasi i tatou ma Keriso, ua tatou taofi, tatou te ola foi faatasi ma ia (f 6 – 8)

Talu ai nei lava, sa aumai ai i le tusi foliga se fuaitau, sa ou matua fiafia lava i le mafauauga sa aumai ia. E tupu so'o a le mea lea, a'e tele foi ina le sa'o. Peitai o le taimi nei, ua ou iloa ai lo'u vaivai, ma lo'u lava faaletonu. "Koleni lou mafauau ina ia matua loto atu ma fiafia i manaoga lelei, o le mea lenei e sili ona lauiloa." Lelei! O ai e le manao i lenei mea? Ona fa'aauau ai lava lea o la'u faitau.

O si taumafai laitiiti lava, na iloa ai; Ou te mafai lava ona alu ese mai lo'u moega i le taeao, i le taimi tonu e tatagi ai le faailoilo; Ona o a'u ua matua fai ma a'u mea-fiafia, le fautu'u i le mea ou te malie lava a'u iai. O le itu faanoanoa la, ona e le mafai e lo'u mana'o fia faamalie lea, ona aumai mo a'u, pe suitulaga i le tele o taui maua faafuasei, i taimi faasili ia e mafanafana ma faamalie ai la'u moe.

O loo faamatala e Paulo iinei, ma isi mataupu o soso'o atu, le fete'enaiga tonu lea, i le va o manaoga lelei ma manaoga leaga; le va o le taui e faamalieina ai i le taimi nei, ma le ola o loo i le Atua. Na pau a lenei o le mataupu, e tele atu ona itu faaletonu, nai lo le naunau i se lelei e amata ai le aso. O loo faamalosi tatou e le Aposetolo, e teena mea tatou te fiafia iai, ae faaleagaina ai i tatou, o isi, ma lo tatou va nonofo ai ma le Atua. E le gata ina fai ai sina suiga lelei i o tatou ola, ae mo se lelei foi mo isi aso; ae lafoaia ai foi manaoga agasala, e foliga e leai se atua; e ono mafai ai ona tatou faapea ane; "oti i le agasala, ma le ola atoatoa i le Atua."

.....

Aso Sa: 10 Novema 2019  
Manatu Autu: **Suamalie nai lo le meli**  
(*Sweeter than honey*)  
Tusi Faitau: Salamo 19: 1 – 14

O faamasinoga foi a le Alii e moni ia ma tonu uma lava. E silisili ona lelei i le auro, o le auro e sili ona lelei e tele; e sili foi ona suamalie i lo le meli, o le meli ma sisina ifo. Ua apoapoa'iina mai ai foi lau auaua; e tele foi le taui pe a tausi iai." (f 9b – 11)

O le auro lelei; Sa ou tusia le mea lea (auro lelei) i le tasi aso lagi lelei, o le vaiataua ua uma le taumalulu, ae ua amata le taumafanafana (Autumn). Na fa'aalia mai ai le anoano o lanu matagofie eseese o laulaau mamago, o fetina'iina solo i luga o le papa, ma susulu mai i luga, o le vaito'a. E maoa'e lona matagofie, ona sa lē mafauauina ae na oo mai i le tuanai o le afa, ma e mautinoa o luma mai o nisi foi tau louloua e oo mai. O atu motu o Sikotilani, matou te taua lea mea, "O le aso ua aumai." (a given day)

Na ou matauina lava e a'u, le taimi muamua faatoa tofo ai se tasi o a matou fanau i le meli (honey). E le taua lea mea i le taimi nei, o se auala mo le tausiga o tamaiti, ma tatou te lei faia foi o se masani, e faanofofilemu ai o ia i lea auala. Peitai, e foliga mai ia te a'u, tatou te tumau lava ona faamanatu, o meaalofa a le Atua, e peiona tofina o le meli; ae le o se mea na tei lava ua tupu. O le mea moni ma malosilava; ua na suia mai le amiotonu, faamautinoa mai le paleni o le ola, o le alofa ua na tuu tatou i le ofo tele.

.....

Aso Sa: 17 Novema 2019  
Manatu Autu: **Ia auiliili ona mātau**(*Thoroughly to hold*)  
Tusi Faitau: Salamo 27: 1 – 14

“.... *Ia ou nofo i le fale o le Alii i aso uma o lo’u ola, ina ia ou iloa atu ai le matagofie o le Alii, ma ou saili i lona malumalu (f 4)*

Manatu i le lagoto, ona ou fesili atu lea ia oe, ina ia e vaai i ai. E faapefea ona e vaai i le lagoto? Toe manatu i ai i le lagoto, ona ou toe fesili atu lea ia te oe, ia e iloa le lagoto. E tasi le auala na e faia ai mea ia e lua? Sa i ai se suiga? E foliga mai i la’u vaai, e matua eseese valaauina sa ofo mai i le “iloa,” pe a faatusatusa i le “vaai i ai.”

O le iloa, e sau mai le gagana Peretania tuai lava, o lona uiga; auiliili ona matau (taofi); ma o le upu auiliili, o loo ataata mai ai se gaoioiga loloto, o se mea o gaoioi ma saveu, e le gata o o tatou mata, a’o o tatou mafaufau, tino, lagona, fatu, manava, e oo a i o tatou tagata i totonu. O se mea e taofi, ua mauaina.

O le salamo o le aso, o le matagofie o le Alii, ua na mafai ona mauaina i tatou, ma na taofia i tatou, ma ua tatou loto atu e nonofo ma inu i mea uma lava ua tosinaina i tatou. Manatua lava, o le iloina (matauina) o le Alii, o le matagofie e le na ona faasee-pau, peitai e o’oo’o lava i nofoaga o agai iai le Agaga, ma galue ai i totonu o tatou. (o tatou loto ia). O le ola lona ua atoatoa ma mea uma.

O le vaiaso lenei, ua tatou tuuina atu o tatou mafai ma manatunatuga, o ni auala o faafeiloai ai le Alii i o tatou tagata atoatoa, ina ia iloaitino i tatou i le Atua.

.....  
Aso Sa: 24 Novema 2019  
Manatu Autu: **Tapu e le Agaga**  
(*Forbidden by the spirit*)

Tusi Faitau: Galuega 16: 6 – 15  
*Ua iloa foi e Paulo le fa’aaliga i le po; o le tasi tagata Maketonia ua tu mai, ma aioi mai ia te ia, ua faapea mai, “Sau ia i Maketonia nei, ma fesoasoani mai ia te i matou.”*

Sa masani ona ou fiafia i tusitusiga malie (cartoons), o le ala o tulagavae tauta’ua i le oneone. i totonu o lea ata, na o le tasi a le seti o tulaga vae, na olaina fekolosiai faataamilo i le itulau. i le ogatotonu o le ata, o le tamaloa sa autilo i le lagi, ma tautino atu, o le mea moni lava, sa matua taumafai malosi le tamaloa e mulimuli i le ala o le Atua.

O le ala tatou te pikiina mai i la tatou malaga faa-Kerisiano, e ala atu i le ola, e le masani ona manino e pei ona sa tatou manatu iai. O le ola lenei na te tuu tatou i le tele o filifiliga, o nisi o le matua faigata lava. Tusa lava pe tatou te tuuina atu i lumao le Atua i le tatalo, o le matua faigata lava ona tatou iloa tino le tali. O nisi taimi, o a tatou filifiliga e i le va o mea o mea e tutusa lelei taua. O ia mea e foliga o ni galuega a le malo o le Atua. O nisi taimi, tatou te fai ai mea tatou te manatu, o finagalo iai le Atua, ae le o lona. Masalo ua tatou faaletonu i mea sa manao ai le Atua mo tatou i le taimi ua tea, ae le o le taimi nei.

i lenei tala, o loo i ai le lagona lelei o Paulo ma ana uo,. Ae le o mafai ona tino mai. O le gagana sa fa’aaoga e le logo lelei mo tatou, ae o le malamalama e le o lona. E le o latou o ni tagata faatupu faavaivai. E finagalo le Atua ia i latou, ao se isi mea. Ae mo tatou, e le o mea taitasi uma e lelei, o faapogai mai le Atua mo tatou, poo le lalolagi i le taimi nei.

.....  
Aso Sa: 1 Tesema 2019 (Aso Sa o le Afio mai)  
Manatu Autu: **Moe ese...o le a?**  
Tusi Faitau: Mika 2:1-11

*“Oi talofa i ē mafaufau i amioletonu, ma latou saunia mea leaga i o latou moega; pe a malama a’e le taeao ua latou faia, aua ua mafai ia te i latou. Ua latou manana’o foi i fanua, ma latou fao ai fa’asauā, atoa ma fale, ma latou aveā; ua latou sauā atu i le tagata ma lona aiga, o le tagata ma lona tofi”.*  
(f.1-2)

O se tasi o mea ou te manatua pea a'o o'u la'ititi, o le matou tafaoga na saunia e le matou Ekalesia. Na le maua sa'u moe lelei i le po lea a'o lumanai ai le aso o le tafaoga, ona o le alu o lo'u mafaufau i ni mea mananaia o le a tutupu i lea aso. Na ou lagona le fiafia ona o le tafaoga lea ua tāpena, 'ae o le lagona lava lea e tasi a'o tāpena atu ai mo le suega a le aoga, e ui e le o ta'uta'uina.

Pau le mea ua mātauina, pe tafaoga, pe su'ega, e tutusa lava fa'alagona mo le tapenaga mo ia fa'amoemoe. O le vaitau o le afio mai (advent) o le vaitau o tapenaga. Ua vala'auina i tatou ina ia tatou iloa ma mautinoa po'o fea tonu tatou te iai, ina feso'otai ma le soifua mai o Iesu, le fa'aola o le lalolagi uma. O le faitauga o lenei aso, o lo'o fa'aauauina ai pea ona fa'amanatu mai ia i tatou, o le lalolagi e le'o i ai le fa'amasinoga tonu ma le ta'ita'iga a le Atua, e si'itia ai lava le faigata o le olaga mo e matitiva. O se mea tatou te le'i mafaufauina, o ō tatou talitonuga fa'a-le-tapua'iga, ma ā tatou fa'atinoga, e su'esu'eina mai ai i tatou e le Atua, po'o feso'otai ma le olaga o tagata matitiva ma e o lo'o mana'omia moni se fesoasoani. E o'o fo'i i fa'aāta i o tatou mafaufau, o mafaufauga i le po ma fōfō o fa'afitauli o le taeao, o lo'o tu'u fa'atasi pei ona faimai ai le perofeta o Mika i le faitauga o lenei aso. Pe a uma, ona iai lea o lapata'iga, o lo'o aumai ai le atoa o le feso'ota'iga ma le fa'aleleia o auala e avea ai i tatou ma itu tino o le filemu ma le fa'amasinoga amiotonu a le Atua. O le vaitau o le afio mai, o le taimi lea mo i tatou e sauniuni ai le ala mo le Atua e afio mai ai i le lalolagi ae le'o le fa'aleagaina o le ala.

Le Ali'i e, ia atagia lau Afio i o matou mafaufauga pe a matou momoe. Ia matou mafaufau ia te oe pe a matou momoe, pe a alafa'i foi. Amene

.....

Aso Sa: 8 Tesema 2019  
Manatu Autu: **E taugata le fa'amasinoga, pei o le alofa tunoa.**

Tusi Faitau: Hosea 6:1-11  
*"Efaraima e, se a se mea ou te faia ia te oe? Iuta e, se a ea se mea ou te faia ia te oe? Auā ua pei o le puao i le taeao la outou amio lelei, e pei o le sau fo'i i le vaveao ona mavae atu"*  
(f.4)

O le fa'amasinoga o se mea ua le fetau i le lalolagi o nei aso. Tatou te lē fiafia i lea upu o le agasala-o lo'o tusia fo'i le to'atele o tagata malolosi ma le popoto ua maua a latou amio leaga, ona fa'aaoga lea o lō latou malosi e ufiufi ai le leaga o latou solitulafono, ae ua lē fa'asaga ai i le māasiasi o a latou agasala.

O lo'o manino mai i le Tusi Paia, le mea sa'o ma le mea sēsē. Na fa'ata'oto mai e le Atua le ālafua, ae sa o tatou pa'ū'ū ai lava. Ae peita'i, o le faia'ina e lē mo na'o se mauaina lea o se maka maualalo i se su'ega; e fa'atupu ai lagona fa'anoanoa, fa'aleagaina ai mafutaga ma maualalo ai le va'aiga a tagata lautele i lou tagata.

I le Tusi a Hosea, o le agasala, o se mea e faia to'atasi, ae e mafai foi ona fa'atupu e le to'atele. O lo'o fa'aāta mai i le tala i le perofeta ma lona to'alua lē fa'atuatua, o ia sa tu mo le Atua ma ona tagata lē fa'atuatua. I le natura o mea, o tala fa'apea e ono tupu mai ai fevesia'iga matuiā. i le Tusi a Hosea, o le naunauta'iga o le Atua o le salamō ma le fa'amalōlōga o agaga. O le leo o le fa'anoanoa, ae le'o le ita. "O le a se mea oute faia ia te outou?" o le fesili lea a le Atua o tagata ua o latou tu'u lafoa'i ma lē amanaia lona alofa. E le'i uma ai le alofa o le Atua.

O le malosi o Hosea o lo'o fa'amatala pe fa'aāta mai ai le loloto o le alofa fa'amagalo o le Atua. E le'o se alofa tunoa taugofie. Sa lagonaina le fa'anoanoa, ita ma le tiga o le Atua, ona o le mea na fai e ona tagata ia te Ia. O le fa'amasinoga o le mea e fai to'atasi, auā o le agasala e fai to'atasi.

Le Atua e, ia e fesoasoani mai ia te a'u ina ia ou iloa le loloto o lo'u ola agasala, ou te iloa atu ai fo'i le loloto o lou alofa mutimutivale ia te a'u.

.....  
Aso Sa: 15 Tesema 2019  
**Manatu Autu: O Fa'avae**  
Tusi Faitau: Isaia 51:1-3

*“Va'ava'ai ia i le papa na tofitofia mai ai outou, ma le gutu o le lua na elia mai ai outou”*  
(f.1b)

O lenei vaiaso o lo'o fa'aaau ai pea ona tatou fa'alogologo i Perofeta. Na tatou fa'alogo i lapata'iga ma fa'amasinoga: ae o le a tatou liliu atu i 'upu fa'aamalosia'au na tu'uina atu i tagata o le Atua, se'i toe avatu ai se fa'amoemoe mo o latou olaga ua malepelepe ona o aafiaga o le tafeaga. Ina ia manino la latou va'ai i le lumana'i, o loo tauanauina e le perofeta le nuu o Isaraelu ina ia vaai muamua i tua, ina ia latou toe manatua o latou matua ma ia toe manatua ai le alofa ma le fa'amaoni o le Atua na faia mo i latou. Mai i nofoaga ma tagata sa leai se fa'amoemoe, ua tulai mai ai se malo matautia.

O lo'o vala'au le perofeta i tagata ina ia mataala ma fa'alogo. Ua ta'utino mai e le Atua na te aumaia le fa'amafanafanaga, ola ma le sa'olotoga. O toafa o le a avea ma nofoaga ola, e iai le 'oli'oli ma le fiafia, o taimi o pesega ua lata mai lava. O aso fiafia aga'i atu i le Kerisimasi, o le a tatou toe faitau ma fa'alogo i le fiafia o le ola fou o lo'o finagalo le Atua e aumai i ona tagata, ma le naunau mai o le Atua e toe avatu le tagata se'i toe fa'alelei le la mafutaga.

E pei ona tatou fa'alogo atu i le vala'au a le Perofeta ina ia sauniuni le ala o le Ali'i, ua fa'amanatu mai ia i tatou ina ia sauniuni e fa'afeiloai le pepe o le Kerisimasi, ma ia fai lona auai mai ma mea moni mo i latou e asiasi i aulotu ma aiga e fa'amanatu ai lea Aso.

Le Alii e, fesoasoani mai ia te a'u e ala i lau 'upu i lenei vaiaso, ina ia 'ato'atoa ai ona tapena lo'u loto mo 'oe i lenei Kerisimasi.

.....  
Aso Sa: 22 Tesema 2019  
Manatu Autū: **Aiga: Ua alofaina, lē afaina po'o le a.**  
Tusi Faitau: Mataio 1:1-17

*“O lenei, o tupulaga uma e afua mai ia Aperaaamo e o'o ia Tavita, e sefulu ma le fa ia tupulaga, e afua fo'i ia Tavita e o'o i le tafeaga i Papelonia, e sefulu ma le fa ia tupulaga, e afua fo'i i tafeaga i Pappelonia e o'o i le Keriso, e sefulu ma le fa ia tupulaga”*  
(f.17)

O le tala'aga o se aiga o lo'o ta'u mai ai ia i tatou le galuega faitele a se 'aiga. E tataua ona ona ou iloa le to'atele o tagata i 'aiga, o fafine ua oti a latou tane ma nai tamaiti laiti. E tataua foi ona ou feso'ota'i atu ina iloa le 'ese'esega o olaga o tagata ma a latou masani. O le mea e tasi sa le mafai ona ou iloa, o le ituaiga tagata, tala'aga ma le fa'asinomaga o tagata o loo i totonu o le ata. Peita'i, pe 'a ou fia malamalama atili i lo'u tulaga, oute mana'omia se mea e sili atu nai lo foliga ma igoa.

O le 'umī (ma le 'iva) o le tala'aga o lo'o amata mai ai le Tusi a Mataio o loo ta'u mai ia i tatou se mea aogā: O Iesu e tāua, ma o Iesu fo'i e mata'utia! O nisi o mea e faigofie ona tatou fa'agalo ia Iesu, o Iesu e i ai lona tala'aga, o lona gafa ma lona 'aiga i le lalolagi nei ma o lona fa'asinomaga fo'i lea. O lō tatou iloa o Iesu i lea ata lautele e faigofie ai ona tatou malamalama i lona liu-tino-tagata ma, o tagata o ona aso, o Iesu fo'i e lavea i lalo o le laina o Perofeta, ositaulaga ma Tupu . E tataua ona o tatou fesili ifo ia i tatou lava, “O le a la tatou va'ai ia Iesu?” –I le malamalama o lona mamalu, o le a la tatou va'ai ia i tatou lava?

I lau va'ai fa'a-le- mafaufau, o le a se silasila a le Atua ia i tatou? Taumafai e manatua pea o i tatou na faia ma le fa'aeteete ma le 'ato'atoa e le Atua.....



Aso Lulu: 25 Tesema 2019 (Aso Kerisimasi)  
Manatu Autū: **Le Aso ua ‘ula!**  
Tusi Faitau: Mataio 1:18-25

*“Fa’auta, e to le taupou, ma fanau mai lana tama tane, latou te fa’aigoa fo’i ia te ia o Emanuelu; o lona uiga pe a fa’amatalaina, ‘Ua ia te i tatou le Atua’.*

(f.23)

O nisi o tagata, e faimai a latou ia, ia ia te oe le paoa mata’utia e te fa’amalamalamaina ai le potu pe a e alu atu i totonu! Peita’i na fa’amalamalamaina e Iesu le lalolagi i lona afio mai. I le Tusi a Isaia, o lo’o tatou fa’alogo ai i tagata na savavali i le pogisa, mulimuli ane ua latou iloa atu le susulu o le malamalama o lo’o susulu mai i o latou luga. O le Keriso, le ua igoa ia ‘Emanuelu’, o se tagata e sili atu nai lo o se pepe fou ua fanau mai. Ia Iesu, o le ‘ato’atoa o le Atua ua aumai ma fa’atumulia ai i tatou- tatou te ola ai, ma tete’e a tu i mea fa’avaivai, ma o tatou lē popole ai i le tau fa’afefe a le oti ona o lo tatou iloa o lo’o i ai le Ola e Fa’avavau.

O le Kerisimasi o se Aso tāua i le olaga o tagata o le lalolagi, auā fo’i o le Aso tatou te manatua ai le Alo o le Atua, ma lona afio mai i le lalolagi e ala i lona fanau mai, ae lē o le iuga lea o lea tala- ae o le amataga. O le avea o tatou ma tagata ua iloa atu le malamalama, o le avea lava lea o tatou ma tagata ua iloa le ala fou-o le malamalama, ola ma le alofa na afio mai ma Iesu e lē fa’atagaina ai lo tatou tumau i le ola tuai. Ina ua afio mai Iesu ia i tatou, sa fa’apea ona ia fetalai mai ia i tatou, ina ia tatou taumafai e fa’aleleia mea uma tatu te mafaufau ma iloa ma malamalama i ai, ma ia fa’ataua. Ina ua afio mai Iesu ia i tatou, na ia a’oa’o mai ina ia tatou malamalama ia i tatou o tagata ua fa’amamaina, e pei foi o i latou na afio mai ai le Atua.

O le asō, ua afio mai ai Iesu i le lalolagi. E mafai ona tatou talia o ia mo se taimi muamua, po’o se mea fou, ma ia fanau mai ma avea o tatou loto e fai ma fale e afio tumau ai lo tatou Ali’i.

Le Alii e Iesu Keriso. E pei ona fa’amanatuina i le Asō lou aso soifua, ua matou tatalo atu, ina ia avea o matou loto mou aiga, ma nofoaga tumau e te afio ai e fa’avavau.

.....

Aso Sa: 29 Tesema 2019  
Manatu Autū: **Iesu le Taiala**  
Tusi Faitau: Mataio 3:13-17

*“Ua papatisoina Iesu, ona maliu a’e loa lea o ia nai le vai, fa’auta foi, ua fa’aavanoaina le lagi ia te ia, ua ia iloa atu le Agaga o le Atua ua afio ifo e peisea’i se lupe, ua o’o i ona luga”*  
(f.16)

O le papatisoga, o se tasi o fa’amoemoe sili ona taua i le Ekalesia. E o’o mai i le aso lenei, e le mafai ona galo ia te a’u le ulua’i papatisoga na ou faia-o le tosina mai o le va’ai a se pepe teine la’itiiti i la’u va’aiga, o le vai ma tagata sa i totonu o le falesa. O se fiafiaga ua tupu a’e i lo’u loto, e molimau i lenei Kerisiao fou ua avea ma tagata atoa o le aiga o Keriso. O le fiafia na tupu a’e ina ua va’aia se tasi ua ia la’asia le isi la’asaga o le olaga, po ua ofo atu i le Atua e ona matua, ma e tautalatala ai pea i le alofa tunoa o le Atua, e ola pea ma galue pea e o’o mai i nei ona po. O le fiafia na afua mai i le usita’i – o le malamalama’aga i le papatisoga, ua lē na o le fa’aailoga o le mulimuli i ala o Iesu, ae o le ata lava lea o le usita’i i le finagalo o Iesu ina ia papatisoina.

O le papatisoina o Iesu, e le tutusa ma mea uma ua fa’atinoina i a tatou foi papatisoga. O Iesu e leai sana agasala, peita’i o lona papatisoga, o le ata manino lea o lona tu’uina o ia lava i totonu o le malamalama’aga o le tagata soifua, ma lona auai i lenei sakalameta a le Ekalesia, e pei foi o le talisuaga a le Ali’i lea na ia fa’ataoto mai. O Iesu lava ua ia ta’ta’i le ala e ala i auala ‘ese’ese, peita’i o lona finagalo lava ina fa’aailoa mai ia i tatou pe fa’afefe ona tatou ola i le fa’atuatua ma galuega. Tatou te mana’omia le vai o le papatisoga, ina ia mafai ai ona tatou ola e pei o Iesu. E tataua ia i tatou, aua na faia e Iesu, ma i le

papatisoina o Keriso, ua fai lea ma fa'ailoga o le amataga o lana galuega ma tapena atu ai o ia mo le fa'ailoina atu i le lalolagi. Le Atua mamana e, o nei lava aso paia, ia ou toe faalogo atu i lou fa'aaogaina o au. Fesoasoani mai ina ia ou ola tau lava o lau Afio, i tausaga o lumanai ai, e ala i le faamalosi mai o lou Agaga. Amene.

.....

## **MATAUPU VASEGA MATUTUA 2019**

**ASO SA:** 27 IANUARI 2019

**MATAUPU:** TAUSIGA A LE ATUA (*God's care*).

**SINI:** Ia a'oa'o ma fa'amanatu i tamaiti e le tu'ulafoaina lava i tatou i le tausiga alofa a lo tatou Atua. Na te lavea'i ma fa'aola i tatou pe afai tatou te talitonu ma fa'atuatua moni i lona mana lavea'i.

**TUSI FAITAU:** Salamo 140: 1-13

### **FESOASOANI MO FAIAOGA:**

O le Salamo lenei e 140 e lavea i Salamo ua faaigoaina o Salamo o auega. O le Salamo o loo fa'atagisia ai e le fai-salamo lona Atua ina ia alofa mai ma lavea'ina lona ola mai tagata o loo lamalama e fa'aoo le leaga ia te ia. O ona fili, o i latou o loo fa'asaua ma tauemu ia te ia.

O loo atagia mai i le sa'i a le fai-salamo, o ia o se tagata e malamalama lelei i le Atua. O se tagata e foliga mai e matua vavalalata ma mafanafana le la mafutaga ma lona Atua. O se tagata fo'i e faamaoni ma alofa moni i lona Atua.

E mafai ona vaevaeina le Salamo lenei i ni vaega se tolu.

**Muamua:** I le fuaiupu muamua e oo i le fuaiupe e 5, o loo atagia ai le valaau atu a le fai-Salamo mo se fesoasoani, ina ia alofa mai le Atua ma laveaina lona ola mai tagata amio leaga. O loo talanoa fo'i le fai-Salamo e uiga i ona fili. O tagata o loo manana'o e fa'aoo le leaga ma le oti ia te ia. O tagata fa'asaua, o ē e leaga o latou loto ma fa'atupu vevesi i aso uma, o e tautatala i upu pepelo ma le faifai, o e fa'amaualuluga ma taulamalama ia te ia.

**Lua:** I le fuaiupu e 6 seia oo i le 11, o loo atagia ai le molimau ma le fa'atoga a le fai-Salamo i lona Atua. I upu a le fai-

Salamo; o le Alii le Atua, o lona Atua ma lona fa'aolataga malosi. O lē e malu ai, e fai o Ia ma ona talipupuni e puipui ia te ia i taimi o puapuaga. O loo valaau fo'i i le Atua ina ia aua ne'i manumalo tagata amio leaga i a latou togafiti ma a latou upu leaga ne'i maua i latou i le manatu fa'amauauga ma le fa'afefeteina. O loo taua fo'i e le fai-Salamo le iuga o le tagata e faufau leaga. Poo a lava togafiti ma taupulepulega e taumafai i ai tagata leaga e faatino, e le i'u lelei lava. Na o le malaia lava i le afi lo latou taunuuga. E lē faia fo'i mo o latou tofi le nuu ae tuliloaina ia e le leaga se ia oo i lona faafanoina.

**Tolu:** I le fuaiupu e 12 ma le 13, o loo tautino ai le mausali o le ola talitonu ma le tumau o le ola fa'atuatua o le fai-Salamo i lona Atua. Ua mautinoa lelei e le fai-Salamo o lona Atua, o se Atua malosi, e faamaoni ma e le tuulafoaina lona ola i taimi o puapuaga. O le Atua e tonu ma atoa'atoa ana faamasinoga uma. O le Atua e alofa i e matitiva ma puapuagatia.

E ui lava i le mafatia ma le pagatia o le fai-Salamo ma fefe i ona fili ma le latou tau fa'amatau mai, ae o loo tumau pea lona talitonuga e le tu'ulafoaina o ia e lona Atua. O loo mauauga pea i le manatu o le fai-Salamo lona fa'aeaina ma lona fa'asaoina mai ona fili. O le mea lea e tatau ai i tagata amiotonu uma ona viia ma fa'amanūina le suafa o le Atua aua e moni ma fa'amaoni lona alofa mo ē e matatau ia te Ia ma faia lona finagalo. Ua mautinoa fo'i i lona loto o ē uma e sa'o ma lelei a latou amio, latou te mau ma le Atua i o lona malo e faavavau.

**GALUEGA FAATINO:** Fa'aaliga manatu:

1. Fesiligia le vasega poo a ni fa'afitauli o loo tutupu ma vaaia i lenei vaitau o le soifuaga o loo atagia ai lagona o le fai-Salamo e pei ona taua i le tala sa faitauina. O a ni faafitauli o tula'i mai ma vaaia i nei aso o loo atagia ai le sauaina ma le ola taotaomia o tagata?

**FESOASOANI MO LE TALI:**

E tele ma anoanoa'i fa'afitauli o loo vaaia pea ma fa'atupula'i i nei aso ae maise o lenei vaitau o le soifua ona o le saosasaoa fo'i o le poto salalau ma le mao'ae o le alualu i luma o mea tau oloa gaosi. Ua tóatele tagata ua taumafai e o fa'atasi pe taumafai ia maua ni mea se tele e fa'alelei ma fa'amalieina ai le soifuaga o aso faisoo. I le taumafaiga e fa'atino lea vaega ua alia'e mai ai ma le tele o le mau fa'afitauli: o le sauaina, fa'apologaina ma le puleesea o meatotino, tagata ma le talitonuga faa-Kerisiano. Faataitaiga: tele ina fa'atama'ia ma fa'aleagaina le laueleele, vai ma le sami i kasa ma vailaau oona mai le gaosiga o oloa ma auaunaga. Sauaina o fanau ma le fa'aoga sese o tamaiti e fa'atau oloa e maua ai tupe i taimi le talafeagai ae le o i le aoga e saili le poto ma a'oa'oina lelei aua se lumana'i manuia. Tele le fasi tagata, pule lē uma (amio mataga), ma le fa'atupu misa ona o le malosi o le inu ava oona ma le lē fuafua tatau. Lē lelei ma lē lava le a'oa'oina, sēsē le fa'amuamua ma le fa'amamafa a matua. Tele le taimi ua alu i faiga o telefoni ma isi mea le aoga (Bingo), ae itiiti i le ola tapua'i ma le ola vivii i le Atua. Toatele fo'i tagata ua taotaomia ma sauaina e le au maumea i a latou faiga soona fai; faaoga lo latou malosi ma le ola ae le lava ma lelei tupe o loo totogi ai. O nisi na o nai faataitaiga mai le tele o mea o loo tutupu i lo tatou siosiomaga o loo atagia ai le ola taotaomia, pologa ma le sauaina o tagata, ae fa'aupopo ane e lau susuga i le faiaoga nisi mea o e silafia e talafeagai ma le mataupu.

**PESE:** Pese ma Viiga – 180  
(E lelei mea uma ua ia Iesu...).

**A'OA'OGA:**

1. E le tu'ulafoaina e le Atua le tagata e fa'alogi, usita'i, ma tumau ia te Ia.
2. Aua le ola soona fai, a ia ola ma le alofa. Fa'amuamua le isi uso e manuia ma lelei ai mea tatou te fai.
3. Aua le mapu le ola mafuta i le Atua e ala i le tatalo.

.....

**ASO SA:** 3 FEPUARI 2019

**MATAUPU:** E I AI LE ATUA I MEA UMA  
(*God is everywhere*)

**SINI:** Ia malamalama le vasega, e silafia e le Atua mea uma tatou te fai, auā e afio o Ia i so o se vaipanoa o le ola.

**TUSI FAITAU:** Galuega 17: 22 – 28

### **FESOASOANI MO FAIAOGA:**

O le malaga faamisionare lona lua a Paulo, na manatu ai le Aposetolo, e toe asia aai na faasopolia i le uluai malaga ma saga tatala atu pea le galuega talai o le Tala Lelei i nuu ma aai na le ausia muamua. O le malaga foi lea na faataoto ai e Paulo se faavae mo le lotu i Eleni.

Ina ua taunuu Paulo i Atenai, na ta'ita'iina o ia e tagata Atenai i Areopako, i le fale tele ua i ai le fono mo le au popoto i mafauauga. Ua ia faapea atu foi ia i latou – “O outou Atenai e, ua ou iloa i mea uma lava ua sili la outou tapuai i atua ....” O Paulo, o se misionare saunia lelei i lana galuega talai. O ia o se faiaoga i le lotu Iutaia, na a'oa'oina i se taimi umi e Kamalielu le faiaoga potu. Sa maua lona potu e a'oa'o atu ai lona talitonuga i auala eseese, ina ia gauai loto o tagata i le uiga o le Tala Lelei. O le tele o le a'oa'oina lelei i le Tala Lelei, o le tele foi lea o e gauai mai loto i le talaiga.

Na iloa e le Aposetolo, o ē ua talai atu i ai, o i latou o loo tapuai i atua sese. Ma e ao ina a'oa'o atu i se auala filemu e faamalamalamaina ai o latou loto pogisa, ma aveesea ai o latou lagona mai lo latou talitonuga sese o i ai. O le ui ane o Paulo i totonu o Atenai e matamata ia latou mea paia, na molimauina ai e le Aposetolo upu ua tusia i luga o se tasi fata faitaulaga – MO LE ATUA E LĒ ILOA. O iina na amataina ai e Paulo se talaiga e a'oa'oina ai i latou i le potu ma le iloa atoatoa o le Atua moni

e toatasi. O le mea moni, ua na ona tusia, ae ua lē malamalama i ai i le natura o le Atua ua latou lē vaai i ai. Pau lava le talitonuga o tagata Atenai ua latou fausia ai le faatusa o le atua e lē iloa, ina nei misia faamanuiaga mai ia te ia, po o le faasalaina foi o i latou i le lē tapuai i ai.

Ua faailoa atu e Paulo, o tagata Atenai ua sili lo latou tapuai i atua, ma toaaga i lotu. O i latou o tagata atamamai ma a'oa'oina lelei, ae latou te lē malamalama i le Atua e lē iloa, o loo tapuai i ai. Ua faapea foi le au Kerisiano o nei aso. Toatele pea foi tagata o loo le iloa pea le Atua. Fiafia e ta'uta'u le suafa o le Atua, ae mamao ma amioga faale-Atua. O le manatu lava lea sa i le Aposetolo, e ao ina faailoa atu i tagata o Atenai le Atua moni e toatasi mo le lalolagi ma tagata uma. O Ia o le foafoa ma le pule o mea uma i le lalolagi, atoa ma tagata. O Ia e tatau ona malamalama i ai tagata uma, auā na Ia faia i tatou i lona faatusa. O lana galuega o le foafoaga ma lana tausiga i mea uma na Ia foafoa, e tatau ona fai ma a'oa'oga maumaututu i le tagata, o le Atua soifua moni e toatasi, o le tumutumuga lea o lana tapuaiga. O Ia le puna o le potu ma le taitai sili i le tagata. E ui ina le vaaia e mata, ae ao ina talitonuina pea i lona malosi tumau faale-Atua, oi le natura o mea na Ia faia. O lona uiga o le Atua e i so o se mea o lenei olaga o tatou ola ai. E ui foi i le maoa'e o le potu ma le a'oa'oina ua i le tagata i mea o lenei olaga, ma mea ofoofogia foi ua latou faia, e ao lava ina mua'i iloina, o loo i ai lava le Atua i so o se tulimanu o o tatou olaga ma mea ua tatou fai. E afio lava o Ia i mea uma.

O le talaiga o le Tala Lelei i le Faaolataga a le Atua mo le tagata agasala, e le gata ina faailoa atu le alofa tunoa o le Atua, ae ao foi ina galue e faafouina ma ia toe fuata'iina le olaga o tagata oi le pogisa. O faasinoga lava ia o loo tuliloaina pea e Paulo, pei foi ona oo mai i Atenai, ma molimau i le tapuai le malamalama o tagata i le Atua e le iloa. O lona faailoa o le Atua na faia le lagi ma le lalolagi, o le faavae lea o mea uma ua faaoloina ai le ola o so o se tagata. E le gata ina ola ma le talitonu i le Atua, ae ia manatua foi le potu, ma meaalofa e tele oi le ola, o lana tausiga, ma le anoano o mea mo le tagata. O le tagata, e tatau

ona ola mo le Atua. O Ia tatou te maua ai mea uma tatou te mananao i ai. O le Atua e lē mafai ona suia i se tupua. O i tatou o lana fanau, le Tamā o o tatou agaga, e i so o se vaipanoa o lo tatou ola. O le agasala lo tatou ifo i tupua, auā ua tatou faaseseina lona agaga, ua i totonu ia i tatou, o e ua taua o lana fanau. Ua faamalamalama atu foi e Paulo i tagata Atenai, o le Alii e le afio o Ia i malumalu e faia e lima. O lona uiga, e le o i le malumalu le latalata mai o le Alii ia i tatou, po o le faaumiumi foi ona i ai mai tatou. O le malumalu, ua fetau mo i tatou e omai faatasi i ai e tapuai i le Atua. E le finagalo o Ia i se nofoaga e malolo i ai ma fai ma ona afioga matagofie ua teuteuina, auā e le tau faamatagofieina e le tagata le mamalu o Ia. O le tuuina atu o le loto o le tagata i le Atua, o le malumalu lea e le faia i lima, auā ua taitai ai le Agaga o le Atua. O iina e fia afio ai o Ia ma le fiafia i o tatou tagata (1 Tupu 8: 27; Isaia 66: 1 – 2). E oo foi i le auaunaga a le tagata e fia silasila ia i le Atua, e le o lima o tagata e auauna ai ia te Ia, peiseai ua le maua e le atua ni mea. Afai o mea uma ua tatou maua e mai le Atua, tatou te le tau saili foi la i ni mea e avatu mo Ia, auā o ia te Ia le lalolagi ma mea uma ua tumu ai (Salamo 50: 12) Pau lava lea, ia atoatoa i o tatou loto le agaga lelei oi le auaunaga. Ia fai ma le talitonu alofa moni i le Atua ma usiusita'i ia te Ia.

O le a'oa'o atu o Paulo i tagata o Atenai, o le feau lea i ē ua le iloa le Atua soifua e toatasi. O nuu uma o tagata, ua toto e tasi mai le Atua. E ui foi ina i ai tuaoi ua nonofo ai fanau a le Atua, ae o le faamoemoe lava o le Alii, ia saili atu ma mafuta pea le tagata ia te Ia, ina ia saga iloa pea o Ia, auā e le gata o le puna mo faamanuiaga i tagata, ae i ai pea o Ia e le aunoa i mea uma o le ola. O le maoa'e o le poto i suesuega ma mea ua faia e tagata, e lē tatau ona manatu o sona lea ma'ema'e ua ausia e lona ola. O le faamaualuga foi o tagata Eleni na i ai, i sailiiliga a le au atamamai, sa punitia ai lava i le latou vaai, le Atua moni e toatasi, e ana le malosi, le poto, ma le sogasoga na suesue ai. O le ala foi lea na latou ifo ai i tupua na latou faia, auā ua leai se isi e sili atu ma le poto ua ia i latou. O le faatusa ua i ai le Atua e lē iloa, o le malamalama mai le Feagaiga Tuai, e pei ona mua'i

talaiina e le au Iutaia oi ia nuu ese, ma ua latou fai ai lea tupua ma faatusa o lea atua.

O le i ai o le Atua i mea uma, o le lē mamao lava lea o Ia ma i tatou taitoatasi. Na te silafia mea uma tatou te fai, auā e le lilo ia te Ia o tatou manatunatuga. O le natura o lana foafoga, o mea mamana lava mai lona poto i le vaai atu a le tagata (Salamo 139: 13 – 15). O ona fofoga ua i luga ia i tatou i taimi uma, ma e sili foi lona silafiaina oi tatou nai lo i tatou lava. O le mamao o le Atua ma le tagata, ona o le tagata ua ifo i tupua ma fai le agasala, pei ona i ai foi tagata o Atenai. O lea foi ia i tatou uma, o le inosia o le agasala i fofoga o le Alii, o le mamao foi lea o i tatou ma Ia. Peitai e tuliloa pea lona alofa aua o i tatou o lana fanau.

O le salalau atu o le Tala Lelei i nuu ese, o le finagalo lea o le Alii, i ona tagata i le lalolagi. O le faamoemoe ia iloa e tagata uma, e i ai le Atua i soo se tulimanu o lana foafoaga, ma ia salamo ma liliu atu ia maua le mafutaga ma Ia i aso uma.

O le a'oa'oga foi lea mo i tatou le fanau. Poo fea lava e oo i ai le maoa'e o se poto ma se atamai tatou te maua, ia 'aua nei galo ia i tatou lo tatou Atua. O Ia lava i so o se mea o lau sailiiliga. Ua tatou molimau i le poto maoa'e i nei ona po, ala o fesootaiga, ala o femalagaiga, ata tifaga mata'utia, meatau alu mamao ma le tele o mea ua faia e tagata, ona tatou iloa ai lea e le se poto mai le tagata, ae o le atamai o le Atua. E oo foi pe a maua i tatou i puapuaga ma mailei o lenei lalolagi, e ao ina manatua lo tatou Atua e i ai i so o se mea ma silasila mai ia i tatou.

O Iesu i taimi o ona puapuaga, e lei aveesea ai fofoga o lona Tamā. E ui ina tigaina i ona manu'a, faasatauroina, ae na a'e malo lava le faatautaiga. Na toetu manumalo mai le tuugamau, na afio ae i le lagi, ona auina mai lea o lona Agaga Paia e fai ma fesoasoani, fai ma faiaoga, fai foi ma taiala i lo tatou ola faatuatua. O le Alii e ia i tatou i so o se taimi o le ola.

### **Upu Faamalamalama:**

- i) Atenai - o se aai ta'uta'ua i le lalolgi, ua i le itumalo o Akaia, i Saute o Eleni. E ta'uta'ua lenei aai, aua sa totonugalemu i ai a'oa'oga ma sailiiliga eseese o le poto maoa'e i le taimi o pulea e Roma le lalolagi. Na a'oa'oina i Atenai le au popoto tautaua, e pei o Aristotole, Socrates, Plato, Epicurus, Zero ma isi.
- ii) Areopako - o le fono e faatasia ai le au faitulafono mo le suesueina o iuga o faamasinoga. Ua i ai foi i lea nofoaga, aoga o le au popoto e tuu faatasia ai iuga ua autasi i ai o latou manatu. O Areopako e tu i luga o le mauaga i Atenai i totonu o Eleni.

**GALUEGA FAATINO:** Taliga fesili.

Tali mai i fesili nei:

1. O ai le Atua e lē iloa, e pei ona tusia e tagata Atenai i luga o a latou fata faitaulaga?
2. O le a le uiga o faaupuga ia:-
  - a. e lē afio o Ia i malumalu e faia e lima
  - e. e lē o lima o tagata e auauna ai ia te Ia.
3. Ta'u mai ni mea se lima, ua e iloa ai i lou ola, o loo i ai le Atua i mea uma?

(silasila le faiaoga i galuega a tamaiti, ia po o le talanoa faatasi le vasega mo tali o nei fesili)

**PESE:** 2 (Pese maViiga) Ina vivii i tatou nei

**A'OA'OGA:**

1. O le Atua le pule aoao o mea uma.
2. O le poto ma le atamai e mai le Atua.
3. E silafia e le Alii o tatou manatu.

.....

**ASO SA: 10 FEPUARI 2019**

**MATAUPU: GALUEGA FA'AAUAU**  
(*Work in progress*)

**SINI:** Ia malamalama le vasega o le galuega lelei na amataina e le Alii mo i tatou, e tatau ona tatou fa'aauauina i lo tatou ola, se ia toe afio mai o Ia.

**TUSI FAITAU:** Filipi 1: 1 – 12

**FESOASOANI MO FAIAOGA:**

O le faamatalaina lava o le mataupu mo i tatou le fanau o lenei Aso Sa – 'Galuega Fa'aauau'. E mafai ona tatou malamalama i ai, pe afai tatou te lagonaina fuafuaga poto a o tatou matua ua naunau i ai mo i tatou i le taimi nei, ma le vaavaai atu i le lumanai, mo o tatou aiga. Mo matua lava ia e sogasoga mo le faatumauina o aiga atiae, e tauivi faatasi ma fanau i galuega lelei, e faataoto itu uma e mautu ai le fanau, pe a mavae atu i laua. Ia aputiputi fanau i a latou mea totino, ma fa'aauau galuega lelei na faia e matua mo so latou foi manuia.

O se ata faapea, ua fa'aali mai mo i tatou le au faatuatua, i le mataupu o lenei Aso Sa – *GALUEGA FA'AAUAU*. O le talaiga o le Tala Lelei na faia e Paulo i Filipi, na faaosofia ai le lagona fiala loloto o tagata i le Aposetolo. O le faamoemoe lava oi le finagalo o Paulo mo tagata Filipi, ia mautu lo latou faatuatua; ia

latou faamalolosi e savavali ia maua le Tala Lelei a Keriso; ia puipuia i latou ma tetee atu i faiaoga sese, ma ia faailoa atu le loto faafetai i tau'i faa-Kerisiano ua latou maua. O le faatumutumuga lava o i nei faamoemoega. O le mafai lea ona latou fa'auau i ia galuega lelei na vaai, faalogo ma latou punoua'i faatasi ai ma le Aposetolo.

O le tusi a Paulo i le au Kerisiano o i Filipi, sa tusia i le tausaga Atua (T.A) e 63, ao faa-falepuipuiina o ia i Roma. O le malaga faamisionare lona lua a Paulo i le TA 52, na ia mua'i oo ai i Filipi ma nofo ai mo le taumafaiga o le talaiga (Galuega 16). E ui ina feagai Paulo ma Sila ma sauaga i lea aai, ae o iina lava na atia'e ai le mafutaga mafanafana a Paulo ma le au Kerisiano o Filipi. Na tupu lona fiafia ui ina feagai ma puapuaga, i le fesoasoani mai o tagata o le Ekalesia i meaalofa, na faamalieina ai o latou manaoga i le ola. E oo lava foi i le taimi na tuua ai Filipi ma faasolo atu le galuega i Tesalonia, na agalelei lava le au Kerisiano ia te ia i mea uma na mativa ai.

Le galuega ma le auunaga lelei fa'auau lea, na faia foi e le au Kerisiano i Filipi ia Paulo, ao i le falepuipui i Roma. Ma o le loto faamalieina lea o le Aposetolo, ua ia fa'aalia i lana tusi leni Filipi. Pau lea o le tusi a le Aposetolo mai ana tusi uma, e le o aliali mai ai pe faamatalaina ai se faitioga po o sana faasea i le Ekalesia ma tagata.

I le vaega amata o le tusi ua fai ma tatou mataupu o leni Aso Sa, ua fia faamauiina ai le loto faafetai o Paulo i le au faatuatua mo la latou fesoasoani ao saisaitia o ia i faigata. O lona loto faafetai o fia ta'u atu ia i latou, e le gata i lo latou agalelei i meaalofa mo le faatumauina o lona ola, ae sili ai lava lona maua pea o le fiafia ui ina puapuagatia. O le faatinoga agalelei ua latou fai, o le agaga lea o le Alii ua i totonu ia i latou e faatino ai le alofa. O le musumusuga mai le Atua tatou te faamalolosi ai e fa'auau ma faia pea auunaga lelei mo e na fia maua le fesoasoani. O le fiafia foi lea i le au paia uma i Filipi, latou te manatua ai ma le loto faafetai le Aposetolo i taimi na a'oa'o ai ma tatalo ai mo i latou. O le auunaga atu ia Paulo, o lea foi mo le Alii e afua mai i o latou loto ua faafouina ma feliuaina e le

agaga. Le agaga lea ia faatumauina pea ia i latou. Ia tumau i le loto maulalo ma ia loto e tasi (unity) i taimi uma, e le gata e faigofie ai ona fa'auau i feau lelei, ae toilalo ai foi faafitauli ma a'oa'oga sese o taufaasalaveia le mafutaga ma Keriso.

I le manatu o Paulo mo le au paia i Filipi, o galuega lelei ua faaosofia ai i latou e faataunuu, o le Atua lava na amataina ma faamaite i o latou loto. O Ia foi lava e fa'aatoatoaina e oo atu lava i le aso o Iesu Keriso. O galuega o le faatuatua e fa'auauina pea e le Kerisiano i lona olaga atoa, e le iuvale ma faailoga fesili le taunuuga. E tini lava i le atoatoa pe a oo ina faafesagai le tagata ma lona Atua i lona iuga. I lona manatu, o le olaga o so o se Kerisiano, ua fapei o se taulaga ofo atu ia Iesu Keriso. E faapea foi lana aioiga i le Ekalesia i Roma i amio e ao ina ola ai – “... , ia outou tuuina atu o outou tino i le Atua, o le taulaga ola, ma le paia ma le malie, o le mea lea e tatau ai ona outou faia.” (Roma 12: 1). O lona uiga so o se galuega ua tuuina mai tatou te faia, ia faia ma le faamaoni i ai o le loto. Ia tuu ese lo tatou iloa, ae fai le finagalo paia ua ta'u mai e le Alii. O iina e finagalo malie ai o Ia, ma faamagalalo ia tatou agasalala ma na feliuaina i tatou i le ola fou ia Keriso. Pe afai e oo i le aso e toe afio mai ai Iesu o Ia lava o le Tupu alofa i e faamaoni, na te tau'i atu ia i latou. Pau lava le meaalofa o naunau mai ai ia i tatou, ua na o i tatou lava ua faafouina le ola e ofo atu mo Ia. Ma na o le alofa tunoa o le Atua e mafai ai ona liliuina i tatou ina ia salamō ma faatuatua i lona maliu ma lona toetu.

O le tatalo lea a Paulo i le Alii mo le au faatuatua uma o i Filipi. O lona manatu alofa e fia mafuta pea ma i latou, o se lagona taua lea ia te ia, ui i ona puapuaga. Ma o le alofa o Iesu ua faaoloina ai lo latou ola faatuatua lea ua fiafia ai e fa'auau i galuega lelei o leni ola, aemaise feau o le Tala Lelei. Le faamalosi'u lea o loo goto ifo i lagona mafatia o le Aposetolo, mai le mafutaga soosoo taua'u faatasi ma le au faatuatua i Filipi. E ui lava ina valavala i latou i nofoaga, ae o auunaga ua faia, e feso'otai faatasi i le Atua.

O le faamalosi'au a Paulo mo le au Kerisiano o Filipi, o le saunia lelei lea o i latou i le toe afio mai o Iesu ma le faamasinoga a le

Atua i le lalolagi. O lo latou fa'aauau i feau lelei o lo latou ola faatuatua, o le faia lea i le faautauta lelei, ma le alofa moni i le Alii. Ia afio mai le Alii, ao loo faapea ona fa'aauau i galuega, i le faamaoni ma le lē tauleagaina. O lona uiga ia tutumu i latou i fua o le agaga, e ala i le manatua pea o le Alii o Iesu i lona alofa mai ia i tatou i le maliu ma le toetu . O le unai lava lea a Paulo i le au Kerisiano i Filipi ma le au Kerisiano uma e faitau i lenei tusi. E ao ina galue ma auauna pea le tagata ia maua le sini ma le faamoemoega moni faa Kerisiano, e ala mai i se viiga ma le faaneetaga tuuina atu i le Alii. O le lelei ma le faamaoni faa-Kerisiano, e le o se tauiviga e tauia ai e le tagata ia lava, peitai ia manumalo ma faasilisili le viiga mo le Atua. Ia malamalama ma molimau le Kerisiano, e le o sana lava taumafaiga ua iu manuia ai le galuega, peitai na alatasi mai lava le fesoasoani mai le alofa tunoa o le Atua.

O se faasinoga foi lenei mo i tatou le fanau. O a ni feau ua tauina mai e o tatou matua, faiaoga, faifeau tatou te faataunuu, ia tatou faia lava ma le faamoemoe i le fesoasoani mai o lo tatou Alii. Aua foi tatou te faia ona ia maua se tau, pe viia ai tatou e tagata. O lo tatou Atua na te tau i tatou i galuega lelei, peitai ia maua se viiga o le Atua i mea na faia. O le feau foi lenei ua talanoa atu ai Paulo i le au faatuatua uma i Filipi.

**Upu Faamalamalama:**

- i) epikopo - (Bishop) o le ta'u lea o le faifeau (pastor) i isi lotu o i ai nei.
- ii) tiakono - o le auauna i talisuaga a lo tatou Alii o Iesu, i le tatou Ekalesia. Fai tonu ma le faifeau i totonu o aulotu mo galuega a le Ekalesia.  
(mo le silafia o agavaa ma tiute fai o le epikopo ma le tiakono silasila i le 1 Timoteo 3: 1 – 13; Tito 1: 5 – 9)
- iii) fua o le amiotonu- (fua o le agaga) o lagona ma amioga ua i le tagata ua maua le feso'otaiga ma le Atua. O le

galuega e fesoasoani ai le Agaga Paia mo le tagata ua talia Iesu ma ola ai i le natura faa-Keriso (Kalatia 5: 22, 23)

**GALUEGA FAATINO:** Taliga Fesili

Tali mai i Fesili nei:-

1. Ta'u mai galuega e tatau ia i tatou le fanau, ona faia ma fa'aauau pea i o tatou aiga, ina ia tumau ma mautu ia mea totino mo i tatou i le lumanai?
2. O ai ua faatatau i ai e Paulo le fasi-fuaiupu lea? "... o ia na amataina le galuega lelei i totonu ia te outou, ...."
3. O le a ua faatatau i ai upu ia – "i le aso o Keriso"
4. O le a le tausaga na faatuina ai e Paulo le aulotu lenei o Filipi?

**PESE:** Pese maViiga 177 (Galue ia se ia uma ai)

**A'OA'OGA:**

1. Ia faamaoni i so o se galuega tatou te fai.
2. Ia faafetai i le agalelei o isi tagata.
3. E faia lava e le Atua mea lelei i lo tatou ola.

.....

**ASO SA:** 17 FEPUARI 2019

**MATAUPU:** O UIGA E SILI ATU  
(*Surpassing Value*)

**SINI:** Ia malamalama le vasega, e le sili atu lava se isi mea o lenei ola, nai lo le talia ma le



fiafia e le Kerisiano o Iesu Keriso ma faia lona finagalo paia.

**TUSI FAITAU:** Filipi 3: 1 – 11

### **FESOASOANI MO FAIAOGA:**

O le amataga lava o le vaega lenei o le tusi a Paulo i le au Kerisiano i Filipi, ua ia avatu ai se lu'itau ia i latou, ina ia tumau ma mausali lo latou olioli i le Alii. Poo ai fili mai fafo atu o le Ekalesia, po o ni eseesega foi i totonu lava o le mafutaga, ia tutumau pea i le fiafia ma le olioli ma manatua le Alii i taimi uma. O le olioli faa-Kerisiano e le mafai ona faatamaia ma aveesea e se isi malosi, mai le Kerisiano ua soifua i uiga, amioga ma le iloa moni o Iesu Keriso. O totonu o lona olaga faa-Kerisiano, e tupu ai pea le olioli i le loto, aua ua silisili ese mea ua faia e le Alii i le ola Kerisiano. Sa fetalai Iesu i ana upu taumavae i ona soo “... e le aveeseina foi e se tasi lo outou olioli.” (Roma 16: 22). O le pogai lona e fiafia ai le Aposetolo e toe tusi pea ma saga faamanatu pea i tagata i le ola moni ia Keriso ua soifua ai, ina ia tumau lo latou saogalemu, mai faaosoosoga o siomia latou. Ia malamalama lelei i le talaiga a Paulo, ua na o le alofa tunoa o le Atua e maua ai le faaolataga o le Kerisiano. O le meaalofa foaifua mai le Atua mo tagata uma, o e saili atu ia te Ia i le loto salamo ma le alofa moni ia te Ia.

Le faasinoga lea e tasi ua lapatai ai e le Aposetolo le Ekalesia i Filipi, ina ia mataala i ai, ao taumafai faiaoga o le lotu Iutaia e faasese a'oa'oga a Paulo, ma faamalosia le latou tulafono faapea o le faaolataga, ua na o Iutaia latou te maua. Fai mai Paulo “*Ia outou i uli; ia outou i e fai galuega leaga; ia outou i e ua tipi fua o latou tino.*” O le uli (taifau, maile) o se manu tatou te tasi ma alolofa i ai, ae le faapena i nuu i Sasae i le taimi o Iesu. O se manu e fealuai solo i magaala ma saili i lapisi ma manu mamate latou meaa. E leai se tagata na te fia faalataina, aua e maimau i ai mea lelei ona e ola fetauai ma osofai atu i tagata feoai i galuega ma feau taua. O le ala lea ua faaigoa ai e Iutaia

nuu ese o uli. Peitai ua liliuina e le Aposetolo le uli, faatatau ia i latou auā ua le gata ina faasese i le Tala Lelei ia Iesu Keriso, ae e le mama latou a'oa'oga mo se taunuuga manuia o le Kerisiano mai la latou tulafono.

Ua lē gata ina ta'ua i latou o uli e le Aposetolo ae ua ia taua foi o tagata faigaluega leaga. E manatu lava latou o i latou o tagata galulue o le amiotonu i le tausia o le latou tulafono. Peitai ua faailoa e Paulo, pau lava le amiotonu ia iloa e tagata uma, ua na o lea ina ua lafoai le ola agasala, ae ofo atu e talia le Alii ma lona alofa tunoa. O iina e saoloto ai le tagata ma iloa ai ona tetee atu i le agasala ma le tiapolo. O le tipi fua foi o latou tino e tusa ma le tulafono faa-Iutaia, ua na o se faailoga i le tino faapea ua maua ai le feso'otaiga a le Atua ma lea tagata. O lona uiga, o le peritomeina i le tino, ua lava lea e iloa ai le tagata ua vavaeseina mo le Atua. Peitai i le a'oa'oga a le Tala Lelei tusa ma le manatu o Paulo, o le peritome moni, o le ofoina atu lea o le loto, le mafau, ma le ola i le Atua. Ua tatou tapuai atu i le Atua i le Agaga o le Atua. . O le tapuaiga faa-Kerisiano, e le o le tausisia o le tulafono, ae o le loto, ia ofoina atu ma le faamaoni moni i le Atua i lona alofa. Pau lea o le mitamitaga o le Kerisiano i lona ola, e lē o le mitamita ona o se mea ua faia e le tagata mo ia lava, peitai ia mitamita i le mea na faia e Keriso mo ia, e ala i lona maliu mo le tagata. O le ala lea e le tatau ai ona tuuina atu lo tatou talitonuga i uiga faa-le-tagata, pei o le faailoga o le peritomeina i le tulafono faa-Iutaia. O le Kerisiano e tatau ona filifili tatau i uiga e sili atu nai lo le tulafono manatu faapito a Iutaia. E tatau ona ola faapaiaina i le taitaiga sili o le alofa mutimutivale o le Atua e ala i a Iesu Keriso.

Le suiga sili lea ma mautinoa lona manuia ua soifua ai le Aposetolo, ua ia fiafia ai e talai atu ma faasalalau atu i nuu ese. O lona tupuaga ma ona tiute faa-lotoifale Iutaia, na fiafia i ai, aua na maelega i le tulaga maualuga ma le lagona faasilisili o tagata, ia Iutaia. Na peritomeina o ia i le po valu, tusa ma le tulafono tumau a Israelu (Levitiko 12: 3). O ia o le aiga o Israelu na tulaga ese le feso'otaiga ma le Atua, ina ua uma le tauiviga a le Atua ma Iakopo ma faaigoaina ai Iakopo ia

Israelu. O ia foi mai le ituaiga o Peniamina, le ituaiga e tupuga mai ai le uluai tupu o Israelu o Saulo (atonu o le igoa lea na faaigoa ai Paulo i lona igoa muamua o Saulo). O se ituaiga foi e fa'aaloologia lona tulaga ia Israelu. O Paulo foi o le Eperu, aua o ia o le tagata Iutaia lava, ua tautala i gagana e lua. Na a'oa'oina foi o ia i le faiva faa-Faresaio Iutaia, o e ua vavaeese mai le olaga masani ina ia tausia ma suesue auiliili i le tulafono a Iutaia.

Le olaga maelega lea o Paulo i uiga ma aga faa-Iutaia, na oo ai lava i le Ekalesia lona ma'ema'e i sauaga i le au Kerisiano. O sauaga ina ia tafi esea so o se vaega e tetee atu i le talitonuga faa-IUTAIA. Le laasaga lea o le olaga faa-Iutaia o Paulo e le mafai ona galo ia te ia. E tautala pea i ai i ana molimau ma ana tusitusiga pei ona faamauina (Galuega 22: 2 – 21; 26: 4 – 23; 1 Korinito 15: 8 – 10; Kalatia 1: 13). E lē mā e faailoa lona maasiasi ma ta'u atu i tagata lona inoino i le Keriso, lea ua alofa i ai, aemaise le Ekalesia ua faagaetia e auauna i ai. O le mea moni, e leai se manaoga o le tulafono a Iutaia e lei faataunuaina e Paulo, pe mata'uleagaina ai foi o ia. Na pa'i tumutumu lava le auaunaga i mea uma. Peitai, ua molimau Paulo, o nei mea uma ua matuā lē aoga lava ia te ia, ina ua na maua Keriso. E foliga o sana aitalafu mataga lea i luma o le Atua, i le vaega leaga o le ola na soifua ai. E ui foi ina sa viia ai o ia e tagata, ae ua lē aoga lava. O taumafaiga faa-le-tagata ua ia tuu ese uma ina ia atoatoa lona taliaina o le alofa tunoa o Keriso. E lē mafai foi e se tasi o ia mea na fiafia iai, ona faatusa mai i lona olioli ua ofo mai e Keriso ia te ia. E le gata i lena' o le filemu ua i ai ina ua talia le alofa tunoa. O le mea moni, o le olaga fou ma uiga matagofie ua maua e Paulo, o le taiala silisili foi lea mo Filipi ma i tatou uma, o ē o faasaga pea i le lalolagi.

O le faaleagaina e le tagata o uiga o lenei lalolagi ae talia Keriso, o se laasaga pito taua lea na i lo se isi lava mea. E ui o se faafitauli i le ola ona saili le mafutaga ma le Alii, peitai afai ua manatu ua silisili ese le iloa o Keriso na i lo se isi lava pote, e talia lava e le Alii le tagata faafouina i le mafutaga faa-le-uo ma Ia i lona filemu. O lona uiga ua ola le tagata i le amiotonu a le

Atua, auā ua faafouina le olaga, le agaga ma amioga i totonu ia te ia, pei ona moomoo i ai le Alii i se olaga sili atu mo ia. Le fesootaiga tonu ma sa'o lea a le tagata ma le Atua, pei ona faasino mai e Paulo, ina ua otaota mea uma ia te ia. Ua lē o le tulafono ma galuega ae o le faatuatua ia Iesu Keriso, i mea uma ua na ofo mai i le tagata faamaoni ia te Ia.

O le saili ma le faatuatua o Paulo ia iloa le Alii ma lona Toetu manumalo, o lona fia iloa lava lea o le mana ma le malosi na toe faatuina o Ia mai le oti. Na ia iloa ai i lona faatuatua, o le mana uiga ese lava lea o le a fesoasoani foi i so o se tasi i le ola faafouina, e toe galueaina le ola. O le toe galueaina o le ola salamō o le tagata mai le agasala, o le talia lava lea o le toetu o Keriso i lona mana ia ola i totonu ia te ia. Ia faasoa atu i isi ala e savavali tonu ai; faasoa atu le oti na maliu ai, aemaise ia faasoa atu le ola na Ia soifua ai. O le iuga foi o lea olaga fou i le Kerisiano, e toe faatasia lava ma Iesu i le ola fou tumau ua Ia saunia mo le au faatuatua uma.

## **GALUEGA FAATINO:** Taliga Fesili

### **Tali mai i fesili nei**

1. O a ni uiga ma ni amioga ua e manatu e sili ona tatou fa'aa'oa'o i ai ia faia i ō tatou olaga faa-Kerisiano? (Tau mai na o se 5 – 6)
2. A o lei avea Paulo ma Kerisiano e talai le Tala Lelei, pe sa lelei ona faataunuina tiute na galuega ai?
3. E te iloa, o a ni mea ua ta'uleagaina ma avea ma otaota ia Paulo ina ua na maua Keriso? (Silasila le faiaoga i tali a tamaiti ma faasao)

**PESE:** 77 (Pese & Viiga)

### **A'OA'OGA:**

1. Fa'aali uiga lelei i tagata.

2. Taumamao ma talaiga ese
3. Ia viia le Alii i le ola.

.....

**ASO SA: 24 FEPUARI 2019**

**MATAUPU: TATALO MAI LE LOTO**  
*(Prayer from the heart)*

**SINI:** Ia malamalama le vasega, e fia silasila le Alii i le tatalo a le Kerisiano ua faia ma le faamaoni, ma ua ofo atu ma le loto atoao ia te Ia.

**TUSI FAITAU:** Salamo 120

**FESOASOANI MO FAIAOGA:**

O le tatalo, o le ala lea ua mafai ai ona feso’otai le tagata ma le Atua. O lona uiga, e ao lava i le Kerisiano ona fiafia ma toaga i le tatalo, auā o le Atua o le puna o mea lelei ma fesoasoani aoga mo le soifua o tagata, e le gata i le tino ae silisili lava i le soifuaga faa-le-Agaga. So o se tatalo lava e faia, e tatau lava ona ala atu i le suafa o Iesu lo tatou Alii. ‘Aua foi nei faia le tatalo ao e ita, auā e fia silasila le Atua i le loto mama ua feso’otai atu ai le tagata ia te Ia. O ō tatou manaoga, o le fia maua o se fesoasoani mai tauiviga o tatou fesagai pea i aso o le ola, e tatau lava ona faaleo atu le tatalo i le Atua, mai o tatou loto. Ia lē na o upu e alu atu, ae ia tatalaina atu lou loto atoa i le Atua ma le faamaoni, ina ia alofa o Ia ma fesoasoani mai.

O le Salamo e 120 na tatou faitau i ai, o le tatalo a le fai-Salamo i taimi o faigata. O le valaau i le Atua a le tagata faatuatua ua puapuagatia. O le salamo lenei ua i le vaega o Salamo e ta’ua o ‘Salamo o le ō a’e,’ poo ‘Salamo a ē ō a’e,’ O le upu ō a’e (ascent), o lona uiga o laasaga agai a’e i luga. Ma e 15 Salamo

ua i lenei vaega o Salamo, e amata atu i le Salamo lenei (120) e oo atu i le Salamo 134. Ua ta’ua nei Salamo o Salamo a e o a’e, ona o nei salamo, e pepese ai tagata Iutaia ao agai a’e i Ierusalema i taimi o a latou sauniga, aemaise lava i masina tonu o a latou tausamiga tetele, e pei o le ‘aiga o le Paseka, tausamiga o le Penetekoso ma le Talisuaga o Faleapitaga. Ua le gata i lena, ae ua i nei foi Salamo lagona faagaetia e mapu’e ae i loto ao usuina ma taulagi upu o salamo. O pese ua tumu i mafaufauga matagofie, e uigā mea o faamatalaina ai aemaise le poto paia e lagonaina e tagata malaga. E ui lava ua fia seneturi talu ona tusia nei Salamo, ae na faapea lava ona fa’auau ma faataua pea e le au Kerisiano i le taimi o Iesu. O lona uiga na pese ai foi le Alii i nei pese faatasi ma ona matua ao agai atu i Ierusalema i le Paseka (Luka 2: 41 – 42)

Afai o le Salamo e 120, o le valaau ma le tatalo a le tagata ua puapuagatia i lona Atua, o lona uiga ua moomia moni e lona loto le fesootaiga ma le Atua, ina ia feiloai ma Ia i ona lagona mafatia ma ia mautinoa le auai mai o lona Atua ia te ia. Ua ia moomoo ia tini manuia lana savaliga faale-Agaga i lona Atua ui i tiga oi lona ala. O le mea moni, o le finagalo foi lea o le Atua mo i tatou le au Kerisiano, i ala tatou te muai savalia agai atu i lo tatou Alii. E ao ina muai faafetauia e le tagata faafitauli, auā o i totonu o lona ala matuitui ma gaoa lo tatou latalata atu i le Alii. E le fai mo le Kerisiano le lalolagi nei. O lo tatou aiga ma lo latou nuu moni ua i se isi nofoaga fou.

O lenei Salamo, ua amata lava i le valaau a le fai-Salamo e ala i le tatalo, auā e leai lava se isi ala e fesootai ai ma le Atua, ua na o le tatalo. O le tatalo, e ao ina muamua ma ogatotonu i le tagata o malaga faatasi ma le Atua i lenei ola, auā o le Atua na te fa’aali mai le ala sili e ui ai i taimi o puapuaga. Fai mai a ia – “Na ou valaau atu i le Alii i lo’u puapuaga, na ia tali mai foi ia te au.” E faafofoga le Alii ia te oe ma a’u pe a tatalo. O Ia na faia mea uma, e faafofoga mai i mea uma ua tatou ole atu ai. O le Alii ua fa’aalia e le Feagaiga Fou ia i tatou, o Ia – O le TAMA, LE ALO, LE AGAGA SA, le Alii e toatasi ua tatou

tatalo atu i ai, e ala atu i le suafa o Iesu le Alo o le Atua pei ona fetalai ai Iesu i le Ioane 16: 23 – 24.

O puapuaga (distress) ua feagai ma le fai-Salamo, o saisaitiaga ia ua luitauina ai lona ola mafuta i lona Atua. E ui i lona fememeai ma le lē mautonu ina ua siomia ona lagona e faafitauli, ae tatalo pea ma ole atu ma le loto atoatoa i lona Atua, o Ia lava e tali mai ma tatala noanoaga o noatia ai ona lagona. Fai mai Iakopo 5: 13a “Ua tigaina ea so outou? Ina tatalo ia.” O le fafagu foi lea mo i tatou i puapuaga o siomia ai le ola, e ao ina tagi atu i le Alii e faaola mai. O laugutu pepelo ma laulaufaiva faa’ole’ole, o fili ia o taumafai e faaleaga le fai-Salamo i ona tiute. E foliga suamalie a latou upu i folafolaga malu mo ia, ae o upu lava e faataga faafiafia ia te ia, ae o loo maua ai le tetee ma le inoino, ma le fuafua e fai se mea leaga ia te ia. O le tagata e pepelo ia te oe, ua taumafai e faaleaga ma toso oe i lalo, auā e faaoleole le laulaufaiva, faapei o se ū ua fana atu ia lavea ai le isi tagata.

O le faafogaina e le Atua o le tatalo a le tagata puapuagatia, na te aumaia ai lana faamasinoga tatau ma le amiotonu, i le laulaufaiva faaoleole. O le laulaufaiva o se vaega o le tino, ia tautala ai, ia pese ai ma fa’aaoga tatau e viia ai le Alii mai le loto o le tagata. Peitai, afai e inosia mea oi le loto, ona tautala loa lea o le laulaufaiva i le agasala ma avea ai o se ū fanafana e oti ai (Jeremia 9:8). E faatusa foi le laulaufaiva i le afi e faatupu le malaia ma le agasala i le olaga o tagata. Ma o le faasalaga foi lea mo le tagata e faaoleole ma pepelo le laulaufaiva, e tuliloaina pea e le ū, ma le malala ola o le toasa o le Atua. Po o le a le mamao o le tagata agasala ma le Atua, e maua lava e le ū ma le afi, ina sei toe maua le ola fou mai le Alii.

O le mea ua tatou mautinoa, o le faamasinoga a le Atua, e moni ma ogotia mo le agasala, auā e inosia e Ia le agasala. O le faamasinoga foi e faafuasei lona oo mai ma e le vave ona uma. O le uiga lea o loo aumai e le ū maamaia a le tagata malosia, ma le malala ola o le ratami. E le gata ina vave ma faafuasei ae faasolosolo lemu i le tagata agasala. O le laau o le ratami e malo lona ogalaau, ma e aoga i fafine. A oo ina mumu e aasa lona

malala ma e tuai foi ona pe. O le faamasinoga foi o iai le lapataiga mo le tagata amioleaga ae o se faamalosiau foi i ē amiotonu, e manatua ai o le Atua o le amiotonu lava Ia na te faasala i so o se agasala. Pe afai ua tatou puapuagatia ona o le faaleaga ma le osofai mai o o tatou fili, e le o so tatou tulaga, le faamasino atu o agasala a isi. Peitai ia alofa atu pea i ai ma faamagalalo atu ma tatalo foi mo i latou i mea leaga ua latou fai. Tuu i le satauro o Keriso ma tuu a’e i le Atua na te taulimaina o tatou mafatiga (Roma 12: 19)

E tatau ona tatalo ma lafoai atu i le Alii puapuaga o le Kerisiano faatuatua, aua oi lona afioaga le tauluga o le ola. E lē fai mo ia lenei lalolagi, auā e lē mautu se olaga i lenei lalolagi, ma o ia foi o le tagata ese i lenei lalolagi. O le aumau o le fai-Salamo i Meseko ma lana nofo i fale-ie o kitara, o le faatusa o le siomia o ia e tagata e lē fia faalogo i le Atua i ana poloaiga ma ona ala, lea e pogai ai ona puapuagatia ma lē mautonu. ‘*Aue a’u nei! Aua ou te aumau i Meseko, ma ou nofo i fale-ie o Kitara.*’ E foliga ua atu le loto o le fai-Salamo i ona fili i upu faifai ma le inosia o ia aemaise le leva (too long) ona luitauina o ia, e a latou upu ma amioga faapaupau e tauau ina mavae atu ai le filemu oi lona loto. O lana tatalo ua na fia tuua lenei lalolagi, ae ua fia oo atu e mau faatasi ma lona Atua, ua faatuatua i ai. I le Salamo e 42: 2 – “*Ua fia inu lo’u agaga i le Atua, o le Atua Soifua, o afea ea ou te alu atu ai ia iloa ai a’u i luma o le Atua?*” O upu a le Kerisiano ua sauni e fa’aaauu atu lana malaga sei feiloai ma lona Atua, i lona nuu ma le aiga fou e faavavau. Le nuu moni lea o loo faailoa atu foi e Paulo i le au faatuatua uma i Filipi. A o lo tatou nuu moni ua i le lagi lea, o loo faatalitali mai ai i tatou le Faaola, o le Alii o Iesu Keriso (3: 20)

Le nuu moni lea i le lagi, o le a mafuta ai le Atua ma ona tagata faaolaina i lona filemu. Le nofoaga lea o loo pulunaunau le fai-Salamo ua vave fia oo iai. E ui o ia o le tagata o le filemu, ae o tagata o siomia o ia, e le mananao i se filemu ae o taua i taimi uma. O le lalolagi o le nofoaga o fete’enaiga. E feteenai talitonuga, fete’enai tagata i isi tagata. O le tala faasolopito foi o le lalolagi, e mafai ona faamatalaina o le taimi o taua faaumiumi

o misa ma finauga. Peitai o le tagata e mafuta ma le Atua, e tatalo pea ia i le Atua i lona filemu, ina ia tupu a'e i nei fetenaiga uma. O le finagalo lea o Iesu i lana lauga i le mauga – “*Amuia e faatupuina le filemu, aua e ta'ua i latou o atalii o le Atua*” (Mataio 5: 9). E tupu pea faigata ma puapuaga i le lalolagi, ae o lo tatou Alii lava le tali mo se filemu, pe afai tatou te tatalo atu ma le loto atoatoa i lona filemu ia totoina i loto o tagata. O le tatou malaga paia e o ae e feiloai ma le Atua, o le malaga e amata i le tatalo faaii foi i le tatalo. O le tatalo ia tuuina atu ma le loto, auā e tali mai lava o Ia. Tatou te tatalo e puipui lo tatou ola i faigata o lenei ola ma tatalo foi ia liliuina e le Atua o tatou ola feteenai i le faatuatua moni ma le alofa i le Alii.

E alu a'e lava Iesu i le satauro o tatalo pea i lona Tamā, e le gata o le alofa i e na faasala ia te Ia, ae ia tini lana feau lavea'i na afio mai ai. O le taimi o lona toetu, na tatalo foi mo faamanuiaga e le gata i ona so'o, ae mo le lalolagi agasala ia salamō ma faatuatua ia te Ia ma le Faaolataga na Ia faia.

**GALUEGA FAATINO:** Taliga Fesili

**Tali mai i fesili nei:-**

1. Po o le a le tatalo?
2. Ua tatou tatalo i le Atua i mea uma. O ai e tataua ona ala atu ai le tatalo?
3. Aisea ua ta'ua ai le Salamo e 120 ma isi foi Salamo, o Salamo ‘a ē o a'e'?
4. Po o le a na faatusa i ai le laulaufaiva o le tagata e le Atua?
5. O le a ua faatusa i ai le laau o le ratami?
6. Afai tatou te faatupuina le filemu, o ai la tatou?
7. Afai e le o so tatou nuu moni le lalolagi nei, o i fea la lo tatou nuu?

**PESE:** Pese ma Viiga (190)

**A'OA'OGA:**

1. A e mafatia ma puapuagatia, tatalo i le Alii
2. Fiafia e pese ma tatalo i le Alii
3. Ia e faatupu le filemu i lau aoga ma le aiga.

.....

**ASO SA: 3 MATI 2019**

**MATAUPU: MALOLO MA TOE FUATAI**  
(*Rest and resonance*)

**SINI:** Ia a'oa'o tamaiti ia malamalama i le uiga o le upu malolo ma toe fuatai.

**TUSI FAITAU:** Salamo 131: 1 – 3

**FESOASOANI MO FAIAOGA:**

O le mataupu lenei, o loo lagiina ai e Tavita moomooga o lona olaga, na ia manuia ai le Atua. Ua na tautino le leai o se loto faamaualuga, ae i lava le pogai o lona maua o le Atua. Ua talitonu Tavita o le faalagolago pea i le Atua e maua ai le loto maualalo. O lona uiga o le faalagolago i le Atua, o lou malolo lava lea mo le toe fuata'iina o ou lagona, pe a e puapuagatia ma mafatiaa. Pe a fia maua lou fesoasoani o le fautuaga, faalagolago pea i le Atua auā o lou malologa lava lea. Ioe, malolo pea ma faalagolago i le Atua, auā o ia foi na te galueaiina ma fuatai lou olaga. Vaai foi i le aga atu o Iesu i ona puapuaga, e lei oge ma le malolo i le Atua ao i luga o le satauro, ua oona le ipu e pei ona ia taua, foliga a faafiti, peitai ua ia malolo pea i lona Tamā. Na ia faapea ai - “*Lou Tamā e, aua lava nei faia lou loto ao lou finagalo,*” le galuega o loo faamalumu ai le alofa fuatai le Atua.

O le maliu la o Iesu, o le manatu o tagata uma na molimauina, ua oti auā ua ave i le tuugamau. Ua po tolu foi i le tuugamau ma ua toetu manumalo mai ai, aisea? E lei oti ae o le ala lena na malolo ai mo le toe fuatai o lana galuega i lona Tamā. Fai mai ana upu i lena taeao, “*Ua fai lenei mo oe.*” Ioe, lo ta ala lena i malo. Faalagolago pea ma malolo i le Atua e toe fuatai ai lou malosi.

**Uiga o Upu:**

- i) malolo - mapu poo le koma
- ii) fuatai - toe fai, pe toe amata
- iii) moomooga - manaoga
- iv) faalologo - talia
- v) faalagolago - faamoemoe

**GALUEGA FAATINO:**

Solo O le ola fetuutuunai  
 E alai le malolo ma fuatai  
 Aua e te vavevave  
 Ae onosai ma faapalepale

**Faatumu avanoa i upu ua tuuina atu:-** *malolo, fuatai, Tavita, toe fuatai.*

1. O le mataupu o le aso e faitauina faapea:  
 \_\_\_\_\_
2. O lenei mataupu o le pese a \_\_\_\_\_.
3. O Tavita sa faalagolago lava i \_\_\_\_\_.
4. O le malolo i le \_\_\_\_\_ e toe \_\_\_\_\_ ai lou malosi.

**A’OA’OGA:**

1. Ia maua le onosai
2. Usita’i ma faalogo

.....

**ASO SA: 10 MATI 2019**

**MATAUPU: FAATALI I LE TAIMI O LE ATUA**  
*(Waiting for God’s moment)*

**SINI:** Ia a’oa’o tamaiti i le taimi a le Alii.

**TUSI FAITAU:** Salamo 27: 1 – 14

**FESOASOANI MO FAIAOGA:**

O lenei mataupu o loo faamatala ai le mauaa o le faatuatua o Tavita i aso vale. Na iloa e Tavita le alofa o le Atua ia te ia mai lava i lona laitiiti, ma lona olaga atoa. Na inu ai i malie ma sao ai i ma’o le alofa faamalumalu o le Atua.

Peitai o le mataupu o le faatali mo le Alii o le tagata lea ua lafoai le lalolagi i ona manatu, ae ua faapaiana lona ola atoa mo Iesu ma ana feau. Le tagata ua noa le lalolagi ia te ia, ae ua na o le Atua ma lona finagalo. O le faatali e le se mea faigofie, aua o le feau e tumu i tiute ma feau aemaise lava i lou tagata faamaoni. Aua foi te fai mea tuu sei faamalie ou manao ma sei fai lou loto o le muagagana faa-Peretania e faapea – Time and tide wait for no man. A faa-Samoa, e faapea – O le taimi ma le tai e lē faatali i se isi, e pule lava le taimi i le taimi e pe ma toe sua ai. O le uiga lena o le faatali i le Alii, o se tapenaga lava o le olaga atoa.

Ma o le laasaga muamua lena o le malaga i le malo o le Atua poo le maota o le tatou Tamā, tatou te le tau o i luga, e tapena lava i lalo nei la tatou feiloaiga ma lo tatou Alii e ala i le

faapaiaina o ou valaauina o le faatalitali sili lena mo le Alii. E le o upu ao galuega ia fua mai i ni fua lelei, a mafa totoga i le tapenaga o le faatalitaliina o le Alii, o lou ala lava lena i malo. Vaai i mafatiaga o Iesu, na inu i le toto, ma afu i le palapala, ao tua atu o loo faatalitali mai ai le Atua e ana mea uma. O le alu ifo foi o Iesu i le tuugamau, ma toe tu mai i le aso tolu, o le atoaga lena o lona alofa i le tagata ua salamo ma faatali ma le faatuatua i ate Ia.

### Uiga o Upu:

- i) muagagana - upu faulaula
- ii) mauaa - tumau
- iii) lafoa'i - tia
- iv) tapenaga - faatinoga
- v) palapala - eleelea

### GALUEGA FAATINO:

Tali i Fesili

1. O le a foi le igoa o le tataou mataupu?  
Tali: Faatali i le taimi a le Alii.
2. O ai le igoa o le tagata o loo ia faamatalaina lena mataupu?  
Tali: O Tavita.
3. E faapefea ona faatali i le Alii?  
Tali: Amio lelei faamaoni ma faatuatua i le Atua.
4. E faapefea ona iloa le tagata ua faatali mo le Alii?  
Tali: E iloa i lana amio ua lelei ma ua fulitua i le agasala.

**PESE:** O e faatali mo le Alii  
Faafouina lou malosi

Faaloaloa apaau  
Pei o aeto  
Taufetuli e le vaivai  
Savavali saogalemu  
Lavea'i lavea'i mai le Alii.

### A'OA'OGA:

1. Usita'i ma faamaoni
2. 'Aua le faalogologo tiga

**ASO SA: 17 MATI 2019**

**MATAUPU: O LE TAIMI MO MEA UMA**  
(*A time for everything*)

**SINI:** Ia a'oa'o tamaiti ina ia latou iloa, e i ai le taimi o mea uma lava; E le mafai ona leai se taimi mo so o se mea.

**TUSI FAITAU:** Failauga 3: 1 – 8

### FESOASOANI MO FAIAOGA:

O le taimi e taua tele,. Fai mai le poto o Solomona le na ia tusia lena tusi; “E i ai le taimi mo mea uma lava; ia pe faapea foi; “E tofu le mea ma lona taimi.” O le uiga o lea manatu, o mea uma lava e tutupu, e tutupu i totonu o le taimi, e pei ona lisiina mai i le f 2 – 8. O mea uma foi e foliga e tuu faafeagai, e pei o le fanau mai, ma le toe oti atu; e eseese taimi e tutupu ai mea ia. O le taimi e saili ai, ma le taimi e tu'u ai e lē toe sailia. O mea uma lava, e ala ona foliga e tuu-faafeagai, ona e i ai taimi amata ma taimi e i'u ai mea. Ao ia amataga ma i'uga eseese uma, o aofia uma i totonu o le faavavau o le Atua. O le Atua o le

faavavau, e leai sona mutaaga, poo sona gataaga. O lona uiga, o mea uma lava i le ola lenei, oi totonu o le taimi, po o le pule faavavau a le Atua. E le faavavau o ē tautala, tamoe, moe, siva, galue, mafaufau i le ola atia'e ma so o se mea, e i ai lava le taimi e te lē gagana ai; E iai taimi paganoa ma ituaso toafilemu, e fesootai atu ai le tagata i le Atua, ma mafaufau ai ia te Ia. E faalologo po o le a se mea o fetalai mai ia oe e te fai; E toamalie foi le ituaso e te fesili atu ai, po se a lona finagalo mo oe. Po o le a lava la le tiga o le ola galulue, ma le pisi, o i ai lava taimi tatau ma talafeagai mo le Alii.

Tupulaga o teine ma tama talavou, o le tauaimisa ma le amio lē pulea, o taimi alu vale na, ma maumau o tupulaga. O faafiafiaga foi ma taaloga, o mea tāua ae le aveā, pe fāoa e mea ia taimi o le lotu, e i ai lava lona taimi. Afai o maua i taimi uma lau manava o le ola mai le Atua, e tatau foi ona iai sou taimi e mafuta atu ai ia te Ia. O le mamafatū ma le pisi o le galuega a Iesu, e tele lava taimi paganoa e faase'e ai e mafuta ma fesili atu i lona Tamā, Lē o faamalosi au i lana galuega, lea na tualuga i le Faaolataga na Ia osia mo tagata uma.

### **GALUEGA FAATINO:**

Taliga fesili (poto salalau ma le Tusi Paia)

1. E te talitonu, e leai se mea i lalo o le Ia, e tupu fua e leai sona taimi.

Tali: Ioe, ou te talitonu.

2. A e le alu i le lotu i le Aso Sa, o lona uiga e sa'o, ua le maua sou taimi mo le Atua?

Tali: (i) E sese  
(ii) E le na o le lotu se taimi mo le Alii, o tele isi avanoa i lou aiga, luga o lou moega, poo fea lava.

3. O le a se aganuu a Samoa, e te iloa ai, e sa'o le tusitala o Failauga, e i ai le taimi o mea uma?

Tali: So o se mea lava e fai a le atunuu lenei, o le avanoa muamua lava, o le taimi o le tapuaiga i le Atua, ma faai'u ai foi.

4. A oo mai le taimi tatou te oti ai, tulou; ua tatou le toe iloina lava se mea e tasi; O lona uiga o le mutaaga foi lea o le taimi a le Atua. (i) Sa'o pe Sese

(ii) Mafuaaga o lau tali

Tali: (i) Sese

(ii) A oo mai lo tatou iuga, e tumau lava taimi a le Atua e faavavau.

5. E sa'o a Ia, e taua tele le taimi nei mo le taimi mulimuli, a ea?

Tali: Sa'o lelei. O le tele o ou taimi e mafuta ai i le Atua i le ola o fai nei, e telē ai foi lou avanoa i lona malo i le taimi mulimuli.

**PESE:** 133 Pe mata e talia le Alii

### **A'OA'OGA:**

1. Fa'aaoga tatau taimi o le ola
2. Tautuana se taimi mo le Atua
3. O le Atua, o le faavavau Ia.

.....

**ASO SA: 24 MATI 2019**

**MATAUPU AISEĀ E TE SAILI AI LE ATUA?**  
(*What is it to seek God?*)

**SINI:** Ia a'oa'o tamaiti ia latou iloa, tatou te le sailia le Alii i la tatou vaai, auā e leai se tagata ola e vaai i le Alii; E le sailia foi e



ala i lona siufofoga, auā e le faafofoga se isi i lona siufofoga, a'e saili ma maua le Atua i le loto.

**TUSI FAITAU:** 1 Nofoaiga Tupu 28: 1-10

### **FESOASOANI MO FAIAOGA:**

O le faamalosiāu ma le fautuaga faa-taitai a Tavita i tagata o lona nuu o Isaraelu; o le taumafai lea e mulimulita'i ma tausi poloaiga a le Atua mo i latou, auā o le Atua e ou le nuu lelei, o le fai mo latou, pe a usiusita'i. O le auala lenā latou te saili ai ma mautinoa lo latou maua o le Atua.

O le māea la o le faalaeiau a Tavita i le nuu, na liliu atu ai loa, avatu le timaiga ma le apoapoaiga faa-tamā i lona atalii o Solomona; aua e le gata o ia ua avea ma tupu, ao ia foi o le a gafa ma le fausiaina o le malumalu. O le apoapoaiga e pei ona aumai i le Mataupu 28: 9 e faapea; O oe foi Solomona e, lou atalii, ia iloa e oe o le Atua o lou tamā, ma auāua ia te Ia ma le loto atoa; ma le loto fiafia; auā e sutesue e le Alii o loto uma, ma ua silafia o mafaufau uma o manatu. Afai e te saili atu ia te Ia, ona e maua ai lea o Ia; ae afai e te tu'ua o Ia, ona tu'ulafoa'iina lea o oe e Ia e faavavau. O le uiga moni lea o le saili i le Alii e pei ona apoapoi atu Tavita ia Solomona; o le lagonaina moni lea ma le faamaoni i le loto, o le poloaiga a le Atua ua aumai, ona talia lea ma usiusita'i i ai.

O le salamō, o le tasi lea uiga loloto o le saili faamaoni i le Alii. O le salamō, o le lafoa'iina uma ese lea o o tatou lava manao, ae faavagavaga o tatou loto mo le Alii. Ina ua agasala Tavita i lona fasiotia o Uria, ae fai Patisepa ma ana avā, sa ia iloa lelei, e mafai e le tagata ona salamō, e ala i le toe foi i le Atua na te suia lona loto. “O lo'o i ai pea le Atua e saili i ai.”

O le vaitaimi lenei o le LENI, o le aga atu o Iesu i ona puapuaga. Ao puapuaga na pogai mai ā tatou agasala. Tupulaga o teine ma tama, ma tatou tagata uma lava, o a tatou agasala ma amioleaga uma lava, lea ua tauaveina, uma e Iesu i ona

puapuaga. O lo tatou salamō faamaoni ma liliuese faamaoni mai o tatou leaga, o la tatou sailiga lava lena o le Alii, ma mautinoa ai lo tatou toe tutu faatasi ma Ia, i lona manumalo mamalu.

### **GALUEGA FAATINO:**

- (1) O oe, sa e auai i le vaega po o le keni lea ua faamaonia, o le keni lena sa latou aia le puāa a le faifeau. Ua uma ona faasala outou e le nuu. Ua faamagalo foi outou e le faifeau, ma ua le molia outou i le tulafono.

Faatonuga: Faamatala lelei mai laasaga uma e tataua ona e uia, e iloa ai ua e salamō, ma ta'u mai pe faafefea ona iloa ua e saili i le Alii.

**PESE:** 385 “O ai ea lo tatou ola?”

### **A'OA'OGA:**

1. E tataua i tagata le salamō.
2. O faatali le Atua mo tatou
3. Saili faamaoni lou loto i le Alii.

.....

**ASO SA:** 31 MATI 2018

**MATAUPU:** FAAMOEMOE UA MAUA  
(*Finding Hope*)

**SINI:** Ia a'oa'o tamaiti ia latou iloa o le faamoemoe mautinoa o so o se sailiga lava e fai a le tagata o le Atua lea.

**TUSI FAITAU:** Sapakuka 3: 17 – 19 (a)

## FESOASOANI MO FAIAOGA:

O lea tatou te savalia le vaiatau o le “LENI” i le taimi nei; o le vaiatau o le aga atu o le Alii o Iesu i ona puapuaga. E ui ina tatou tā’ua o puapuagā, ona o le matuitui ma le ogaoga o sauaga na oo ia Iesu lea lava na maliu ai, ae o tala atu o lona maliu, na totogo ae ai le mautinoa, e ala i lona Toetu manumalo. Le ‘au’au lea, po o le tauluga, o le alofa o le Atua i le lalolagi e ala i le taulaga o le faaolataga mo tagata uma lava. Ua avea nei ma faamoemoega mautinoa ma le atoatoa mo so’o se tagata e faatuatua i le Atua. O foliga ia o le malaga a Isaraelu i le vao, sa fetaii ma le tele o faigata, a o le taunuuga o le savaliga, o le pale lea ma taunuu i Kanana le eleele folafolaina auā o lo latou tofi mai le Atua sa tulimatai ma faamoemoe latou te maua.

O le tusi sa tatou faitauina nei, o loo faaulutalaina le mataupu sa faitau e faapea: *“O le tatalo a Sapakuka,”* Ae o le tatalo o usuina faapese, i le faamoemoe, o momoli mai e lea pese po o le tatalo, se feau taua ma mautinoa, mo tatou o faitau ma faalogologo ai. O le pese atoa o usuina e le Perofeta o Sapakuka, o loo faamatalaina mai ai le silisiliese ma le mafai o le Atua, e le taofia e se isi lava malosi po o se tagata. O i latou e na o le faalogo i le tala i le Atua e pei o le Perofeta, e matata’u tusa lava pe le vaai i ai. O lona pupula e tumu ai le lagi, e tumu foi le lalolagi i lona viiga; Aua e leai se na te taofi lona toasa pe a oo mai, ae leai foi se malosi ma se matautia na te agaia lona alofa pe a oo mai. Lea la e tāaofai e le Perofeta lana pese, poo lana tatalo i fuaiupu o fai ma tusi faitau o lenei Aso Sa; “I lona lagona mautinoa ma le mausali o le Atua, o le faamoemoe mauti lea o mea uma ua ia mauaina.

Fuaiupu 17 – 19. E ui ina le fua mai le laufanua, ma foliga ua le tali mai lafumanu o le laueleele i le vaai; Ae o le faamoemoe ma le faatuatua i le Atua, o le puna ma le pogai o mea uma, e le mafai ona uma. Aua ua iloa, o le Atua, o le Atua o le olataga. O ia te Ia le fiafia ma le olioli moni o loto. O le Atua o le malosi o tagata uma o faalagolago moni ia te Ia; e pei ai i latou o aila o le

vao, latou te le vaivai; aua e savavali i le malosi o le ola talitonu i le Atua, ma faaeaina ai.

Tupulaga o teine ma tama talavou, ua fesouaina lava le ola i nei aso, ona o le maualuga o le atamai ma le malosi o potu faaneionapo. Ao ia mea uma, latou te le mafai lava ona suia le la i le aso ma le masina i le po, o se vaega o le foafoaga na faia i le mataisau o le Atua. O le mea lea, ‘aua nei faamoemoe lava le tagata i se mea o le ola nei ua na maua; e manuia ma faaolaina ai o ia. Faatuatua i le Atua, o Ia e toatasi lo tatou faamoemoe mautinoa, pe afai tatou te maua o Ia. O lona alofa tunoa mo le lalolagi e ala ia Iesu Keriso, tatou te maua e ala i le faatuatua ia te Ia. O Iesu Keriso manumalo o lo tatou faamoemoe lena ua i lima.

## GALUEGA FAATINO:

- i) Tau mai se tagata i le Tusi Paia (so o se tala lava) e te iloa sa faamoemoe i ni mea sa ia maua, pe sa ia te ia, na mafua ai ona le faamoemoe i le Atua.
- ii) O le a se iuga o e iloa na oo i lea tagata?
- iii) Afai na taunuu i se taunuuga le lelei, na toe salamo pe leai?

Tali e fesoasoni i lau Susuga:

(OT) Nepukanesa na ai i le mutia - Na salamō ma toe potu

- Sau/ava a Lota/etc

(NT) Iuta/Anania/etc

**PESE:** Pese ma Viiga- 199

## A’OA’OGA:

1. Faatuatua i le Atua
2. ‘Aua le faamoemoe i le tamaoaiga
3. O lou ola faamoemoe i le Atua, o se pese malie mo Ia.

.....

**ASO SA: 7 APERILA 2019**

**MATAUPU: O LE MAA UA TU'ULAFUA'INA**  
*(The stone Rejected)*

**SINI:** Ia a'oa'o le vasega ina ia malamalama i le taua o le ma'a na lafoa'iina.

**TUSI FAITAU:** Luka 20: 1 – 19

**FESOASOANI MO FAIAOGA:**

O le vaega o le fuaiupu e 13 o le mataupu e 20: 1 – 19 ua autu i ai le tatou mataupu i lenei Aso Sa, e faapea: Ou te auina atu lo'u atalii pele, atonu latou te ava mai ia te ia.

Ina ua toe foi mai Iesu i le malumalu i Ierusalemua ia ia a'oa'o atu ma folafola atu i le nuu le Tala Lelei i le malo o le Atua. Na o mai ai taitai o le Lotu Iutaia ma fesiligia Iesu e uiga i le pule ua na faia ai vavega ma a'oa'oga i le malo o le Atua. O lo latou manatu ia maua se mea e molia ai Iesu i se tali o le a ia tuuina mai i le latou fesili. Ua latou fesili atu ai ia Iesu e faapea: Fai mai ia ia te i matou, se a le pule e te fai ai na mea, poo ai foi na ia avatu ia te oe lenei pule? Peitai, ua lē avatua e Iesu se tali e tusa ma le latou fesili, a ua fetalai atu ia i latou, ou te fesili atu foi se mea ia te outou, sei tau mai. Mai le lagi ea le papatisoga a Ioane, pe mai tagata?

Ua le tali sa'o Iesu i le fesili a taitai o le lotu Iutaia a ua Ia fetuunai la latou fesili, ma toe tuuina ai le fesili ia i latou, ma ua faigata ai ona latou tali atu i le mea moni. Auā ua ia i latou lava le mea moni o le papatisoga a Ioane e mai le lagi, e pei ona valoia mai e le perofeta o Malaki ma le perofeta o Isaia. Peitai, o lo latou lē talia ma le matua teena o le pule a Iesu na latou lē tali sa'o ai i lana fesili, a ua latou tali atu, latou te lē iloa pe mai fea le papatisoga a Ioane. Ona faatoa tali atu ai lea o Iesu i le latou fesili i le pule o loo ia faia ai ana a'oa'oga ma vavega. Ua

fetalai atu Iesu, 'Ou te lē ta'u atu foi ia te outou le pule ou te fai ai nei mea'.

Na afua ai ona fetalai atu Iesu i le faataoto e pei ona iai i le tatou mataupu i lenei Aso Sa, ta'u atu i taitai o le lotu Iutaia mea moni ua tutupu ma e taunuu lava mea o le a tutupu ia Iutaia ma le Alo Pele o le Atua o Iesu Keriso lea.

O le ata o loo faailoa mai e lenei faataoto e faapea, o Isaraelu o le tovine lea, o le Atua o le pule o le tovine. O taitai o le lotu Iutaia, o le au galulue i vine. E pei ona sasaina ma fasia auuina a le pule o le tovine, e faapena foi ona faia e ta'ita'i o Isaraelu i auuina na auina mai e le Atua, o ana perofeta mai le Feagaiga Tuai e oo mai ia Ioane le papatiso na latou faamo'amo'a ma fasiotia. O lenei ua latou matua teena lava le Alo pele o le Atua, ua auina mai ma e iu lava ina latou fasiotia.

O lenei mea ua aumai ai e Isaraelu le faamasinoga a le Atua, ma lo latou faasalaga. E aveesea foi e le Atua faamanuiaga sa latou maua, o i latou o tagata filifilia o le Atua, ma tuuina atu lenei faamanuiaga i tagata o nuu ese. A o le isi foi ata o le mea moni o loo aumai i lenei faataoto, ua faatusa ai le Alo o le Atua, o le ma'a tulimanu o le fale tele. I aso anamua i fale tetele pe a fausia, o le ma'a tulimanu e faamoemoe i ai le mausali o le fale atoa.

O le teena la e ta'ita'i o le Lotu Iutaia ma tagata Isaraelu, ua tutusa ai i latou ma tufuga faufale ua latou lafoa'i le ma'a tulimanu e faalagolago i ai le malosi o le fale atoa. Ua faapena Isaraelu na osi feagaiga ma le Atua. O i latou o tagata filifilia o le Atua, a o le Alii o lo latou Atua. O lenei la ua ave e le Atua le ma'a tulimanu ua lafoa'iina, ma faavae ai lona fale fou ua fausia o le Ekalesia ma le lotu Kerisiano. O le faapotopotoga o tagata Kerisiano, ua latou ola i le tulafono o le Agaga o Keriso, ma e fulisia i tagata nuu ese ua faaolaina i le soifua o le Alo o le Atua. O le ma'a tulimanu na lafoa'iina e ta'ita'i o le lotu Iutaia ma tagata Isaraelu. Ua fai ma ma'a tulimanu o le ola faaleagaga o tagata Kerisiano.

Le fanau, ia fai Iesu Keriso ma ma'a tulimanu o lou ola i le loto ma le agaga. E le mafai ai e se mea leaga ona lepeti le fale

apitaga o lou agaga. E te lafoa'i loa Iesu le ma'a tulimanu taua o le ola faaleagaga, ona tatou feagai loa lea ma puapuaga ma mafatiaga o le ola, ona tatou le fiafia lea i le ola ua aumai e le Atua mo i tatou. O Iesu o le ma'a tulimanu ua lafoa'iina, na faasatauro ma fasiotia, ona o lona alofa faavavau mo i tatou. Na tanumia i le tuugamau, peitai, ua toetu manumalo mai i le ola fou, o e uma e talia lana pule, e faaolaina faatasi ma ia e faavavau.

### **GALUEGA FAATINO:**

Faatino le tala o loo aumai i le faataoto.

**PESE:** 324 (Pese ma Viiga) Iesu o lou tovine

### **A'OA'OGA:**

1. Ia fai Iesu ma ma'a tulimanu o lou olaga
2. Ia nofo le tulafono o le Agaga o Keriso i lou loto.
3. Ia mataala ua faigata nei aso o le poto faatekonolosi.

.....

**ASO SA:** 14 APERILA 2019

**MATAUPU:** O LĒ UA AUAUNA (*One who serve*)

**SINI:** Ia a'oa'o le vasega ina ia malamalama i le taua o le ola auauna.

**TUSI FAITAU:** Luka 22: 24 – 38

### **FESOASOANI MO FAIAOGA:**

Ua ogatotonu le tatou mataupu i lenei Aso Sa i le vaega o le fuaiupu e 27 e faapea: A o a'u nei, o loo ia te outou pei o le auauna lava.

E valaauina loa, pe tofofi mai e le Atua se tagata po o ni tagata e faia ana galuega, ona taua lea o i latou o auauna a le Atua. O le taua ia i le Atua o tagata ua na tofofi ma valaauina mo ana feau, auā ua latou faipaaga ma Ia i lana galuega faaola i le lalolagi. E pei ona ta'u ai Mose, Tavita, ma auga perofeta, o auauna a le Atua. O le taua lea i le Atua o tagata ua ia valaauina i ana feau. Ona o tagata lava o le lalolagi, e naunau lava le latou vaai i tulaga maualuluga ma le taualoa, latou te matua le fiafia ai e ta'u i latou o ni auauna.

E pei o le amataga o le tusi faitau o le tatou mataupu i lenei Aso Sa. O loo amata lava i finauga a le au so'o o Iesu, po o ai o i latou e sili i le malo o le Atua. Ua fetalai atu Iesu i ona so'o, o tupu o nuu ese ua fai i latou ma alii i o latou tagata, ua latou agalelei atu ma foai atu tupe ma meaalofa ma ua taua ai i latou tagata alolofa. Ua latou fa'aaoga lo latou pule ma avatu tulafono, ina ia maua ai pea lo latou mamalu ma le taualoa, ma saga manuia ai lava i latou, ae le o le manuia o tagata uma.

Ua faailoa atu e Iesu i ona so'o, e leai ni mea faapea i le malo o le Atua. E leai ni faatosina e faia e maua ai ni tulaga maoa'e ma le sili. Ua na o tagata e fiafia e faia le lelei i le olaga atoa e mafai ona ulufale i le malo o le Atua. O tagata o le malo o le Atua, o tagata e fiafia e ta'u i latou o auauna a le Atua, latou te au tulaga i lona malo. Ua fetalai atu Iesu i ona so'o, "E le faapea outou peitai, o le sili ia te outou, ia avea o ia ia pei o le auito itiiti o lē pule foi, ia pei o le auauna ia. E ui lava ina faailoa atu e Iesu ma a'oa'o atu i ona so'o i aso fai so'o le uiga o le loto maualalo ma le agamalu, a ua vaايا i ona toe taimi o lumanai ai ona puapuaga, o lea lava o loo finau po o ai o i latou e sili i le malo o le Atua.

Ua fetalai atu Iesu i ona so'o faafaufautua, ua foliga mai o se tagata o le a malaga 'ese mai i lona aiga mo le faamoemoe o le manuia o tagata o lona aiga. Auā poo ai le sili, o le taoto ea e ai, po o le auauna mai? E lē o le taoto e ai ea? Ioe, o le taoto e ai, e

sili. O Iesu o le Alii, o le a'oa'o e pei ona faalagi ai e lona au so'o. O Ia o le sili, e tatau ona taoto e ai, ae auauna atu i ai ona so'o. Peitai, ua faia e Iesu le faataitaiga, na te manaomia i ona so'o, e tatau ona ola ai i aso uma, o le faatinoga o lona soifua auauna. Ua Ia auauna atu i ona so'o, a ua le auauna mai ona so'o. Ua Ia fetalai atu ai, "A o ai nei, o loo ia te outou pei o le auauna lava." E pei foi ona molimau le fai-Evagelia o Ioane (Ioane 13: 14 & 15) O lenei, afai o A'u le Alii ma le a'oa'o, ia ou mulumuluina o outou vae, e tatau ona outou femulumulua'i o outou vae. Auā ua ou avatu le fa'aa'oa'o ia te outou, e pei ona ou faia ia te outou, ia faapea lava e outou ona fai.

Ioe, le fanau e, o le taua lea o le tatou mataupu i lenei Aso Sa. O lo tatou Alii Faaola o Iesu Keriso o le Alo o le Atua, affio mai i le lalolagi ua fai ma auauna. Ua Ia auauna i so o se tagata na manaomia lana fesoasoani. Ua ia faataitai foi i ona so'o lona soifua auauna, ina ia latou mulimuli i ai, ia fai ma Tala Lelei mo tagata uma, ina ia fealofani le fanau a le Atua i aso uma. Ia a'oa'oina foi tatou le fanau i lenei soifua aoga o Iesu lo tatou Faaola. Ia amata i lo tatou olaga talavou ona faamasani i le ola auauna. O le avefa ma auauna na te momolia lou olaga i le ola faaeaina, ma taunuu ai i tulaga maua. A o le mea sili, o le viiga o le Atua ua maua mai ia te oe o lana auauna.

O Iesu Keriso na fai lava ma auauna a le Atua na oo lava i le satauro lana auaunaga, ma foa'i atoa mai lona soifua ina mafai ona faaolaina le lalolagi atoa i lana auaunaga. O lona taunuuga, ua toe soifua manumalo mai, ua avatu ia te Ia le suafa e silisili suafa uma lava, ma ua pule aoa o le lagi ma le lalolagi.

### Uiga o Upu:

i) aliitai - pule ma ua fai ma alii

### GALUEGA FAATINO:

Tau mai ni amio se lima e ola ai le tagata auauna.

1. Ia ola i le faatinoga o le alofa
2. Ia ola usiusita'i
3. Ia ola toaga ma faamaoni
4. Ia ola mataala
5. Ia ola i le loto maua.

**PESE:** Pese maViiga 355

### A'OA'OGA:

1. Ia fiafia e auauna atu i so o se tagata.
2. Ia lagona le loto maua ma lou faatauva
3. Ia 'aia e te fia mau tulaga maua.

.....

**ASO SA:** 21 APERILA 2019

**MATAUPU:** FAAMOEMOE UA PUNA A'E  
(*Hope bursting through*)

**SINI:** Ia a'oa'o le vasega ina ia malamalama i le faamoemoe ua puna a'e ina ua toetu mai Iesu mai le oti ma le tuugamau.

**TUSI FAITAU:** Luka 24: 1 – 12

### FESOASOANI MO FAIAOGA:

Ua ogatotonu le tatou mataupu i lenei Aso Sa i le fuaiupu e ono le mataupu e 24 o le tusi a Luka, i le toetu mai o Iesu Keriso, e faapea, e le o iinei o Ia, a ua tu, ia outou manatu i lona fetalai atu ia te outou, ina o i Kalilaia o Ia.

Fai mai le Aposetolo o Paulo i lana tusi i le Ekalesia i Roma (Roma 8: 25). O le faamoemoe i le mea ua le vaaia, tatou te faatalitali atu i ai ma le onosai. Ae fai mai foi le tusitala o le tusi

a le au Eperu, (Eperu 11: 1). A o le faatuatua, o le faalagolago lea i mea ua faamoemoe i ai, o le mautinoa lea o mea e le o vaايا. O lona uiga, o le faamoemoe o Iesu Keriso na afio mai ai i le lalolagi, ia faaolaina tagata uma ia te Ia, e ala i lona mafai ona faataunuaina o le galuega faaola a le Atua mo tagata uma i le lalolagi.

O le faamoemoe ma le silsila mamao lea a lo tatou Alii Faaola o Iesu Keriso, na ia folafola ai le Tala Lelei o le malo o le Atua, ma Ia faatino ai vavega o le alofa tunoa o le Atua, ma o galuega lava ia o le alofa tunoa, na le talia e le lalolagi, ma iu atu ai i lona faasatauroina, ma ua tanumia i le tuugamau. Ua mavae aso e tolu, o lea ua toe soifua mai, i le ola fou atali faavavau.

Fai mai le vaega o le fuaiupu e lima, ma le ono', Se a le mea tou te saili ai le ua soifua i e ua oti? E le o iinei o ia, a ua toetu. O le faamoemoe ua taunuu o le laau o le ola lava lea. A ua avea le toetu mai o Iesu, ua puna ae ai ma le faamoemoe fou. O le faamoemoe mo tagata uma, ina ia latou talitonu ma taliaina i le faatuatua le maliu tiga o Iesu i le satauro mo le faamagaloina o agasala, o lona tanumia i le tuugamau, ma lona toetu mamalu, o le faamoemoe lea ua puna a'e, e toe tutu tagata uma i le ola pea faavavau, i le ola ua ia Keriso lea.

O le mea e le i mafai ona talitonuina e fafine na o atu e asia le tuugamau, faatasi ai ma le au so'o ina ua logo atu i ai e fafine, le tuugamau ua tuufua ma le tala a le agelu, pe aisea latou te saili ai le ua soifua i e ua oti? E le o iinei o Ia, a ua tu. O upu ia agelu, ua faailoa atu ai i fafine le lē talafeagai o a latou tapenaga mo le faamoemoe ua taunuu. O a latou tapenaga mo le faamoemoe ua taunuu. e fetau ma le tagata e oti ma oo i ai le pala. A o Iesu lava ia, a'o sauni atu i ona puapuaga, mo le faatinoga atoa o le faaolataga, na Ia fetalai atu ai i ona so'o ma i latou uma ina o i Kalilaia o Ia. E tataua ona tuuina atu le atalii o le tagata i lima o tagata agasala, ma ia faasatauroina, ma toetu mai i le aso tolu. Ua fai mai le tusitala o le tusi a Luka, ona latou manatua ai lea o lana fetalaiga.

Ona avea ai lea o a latou tapenaga ma mea e faamaina ai i latou ona o lo latou le talitonu ma le faatuatua ia Iesu ma lana galuega

faaola o le alofa tunoa o le Atua. Aua ua logo mai e agelu, o ave feau a le Atua soifua le moni ma le faamaoni, ua toetu Iesu, ua tuua e Ia le tuugamau. E lē o ni tagata na aumaia lenei feau, a o le Atua lava ia, e ala i ana agelu, o ana ave feau.

Ua toe foi mai nai le tuugamau, ma latou faamatala ia mea ua latou molimauina i le au so'o e sefulu tasi, atoa ma latou uma. Ua avea ai nei fafine o ulua'i misionare o le Tala Lelei i le Toetu mai o Iesu Keriso. O i latou foi, ua avea ma uluai tagata ua faatuatua o latou loto, ua toe soifua mai Iesu Keriso mai le oti ma le tuugamau. O le faamoemoe ua puna a'e foi i o latou loto faatuatua, ua faaolaina i latou ina ua faatuina mai e le Atua Keriso nai e ua oti, aua ua latou talai atu le toetu ma tulogologo atu lenei Tala Lelei i so'o o Iesu, ma ua fai ma Tala Lelei o le faaolataga mo tagata ma le lalolagi uma. O le faamoemoe ua puna a'e, e toe tutu tagata uma o e faatuatua ma ta'uta'u atu le Tala Lelei o le toe soifua mai o Keriso. E faaolaina i latou uma, i le ola faavavau i le faatuatua ia Keriso Iesu.

Le fanau e, e taua tele lo tatou iloa ma malamalama i le faamoemoe ua puna a'e i le toetu mai o Iesu Keriso, e faaolaina tagata uma i le ola atali faavavau, ina ua faatuatua, ma salamō faamaoni mai agasala uma. Ia tatou tutupu a'e, ma ola fiafia i lenei lalolagi, aua ua tatou iloa tatou te ola pea faavavau, aua ua mua'i toe soifua mai Iesu nai e ua oti, o le ala lea e tasi tatou te taunuu uma i ai. Tau lava ina ia tatou ola ia Keriso i lona soifua na Ia fa'aa'oa'o mai ia i tatou, e pei ona tusia i le Tusi Paia ma tatou faalogo i ai, ona tino mai lea o le faamoemoe ua puna a'e i le aso o le Toetu o Iesu.

### **GALUEGA FAATINO:**

Faatino le Tala o le toetu e pei ona faamatala mai e le tusi faitau.

**PESE:** Pese & Viiga 51 (Sauni le pese fou)

### **A'OA'OGA:**

1. Ia talitonu ua toetu mai Iesu.
2. E toe tutu tagata faatuatua uma i le toe soifua mai o Iesu.
3. Ia fiafia e taulogologo atu ua toetu Iesu.

.....

**ASO SA: 28 APERILA 2019**

**MATAUPU: VALAAU MATAUTIA** (*Calrion call*)

**SINI:** Ia a’oa’o le vasega ina ia malamalama o le valaau mata’utia, o loo i ai faatasi ma le mana o le Atua Soifua.

**TUSI FAITAU:** Iosua 6: 1 – 20

**FESOASOANI MO FAIAOGA:**

O le fuaiupu e 20 o le mataupu e 6 o le tusi a Iosua e ogatotonu i ai le tatou mataupu i lenei Aso Sa, e faapea: Ua ili pu e faitaulaga ona alalaga ai lea o le nuu, ua faalogo le nuu i le leo o le pu, ona alalaga lea o le nuu i le leo tele, ona solo ai lea i lalo o le pa, ona o a’e ai lea o le nuu i le aai, taitasi i o latou luma, ua latou aea foi le aai.

O le valaau mata’utia lenei. Aua ua na o leo o pu o le iupeli, tuufaatasi ma le leo o alalaga o tagata o Isaraelu, na solo ai i lalo pa maualuluga na siomia ai le aai o Ieriko. O le faatoilaloina o Ieriko, o le uluai fua lea o eleele o Kanana ua fai ma tofi o Isaraelu. O le aai o Ieriko e le faamoemoe i se malosi o ona tagata tau, ae matua faalagolago tele i le malosi ma le maualuluga o ona pa o loo siomia, e talitonu ai e leai se malosi na te mafai ona osofaia lona aai.

A o tau fuafua e Iosua ma Isaraelu se auala e osofai ai Ieriko, a ua fetalai mai le Atua e ala i le taitai au a le Atua, ua faapea atu, “Faauta mai ea, ua ou tuuina i lou lima o Ieriko, ma lona tupu, ma ona toa malolosi. E ui ina leai se faigata i le Atua i le

faaumatiaina o Ieriko, a ua ia finagalo ina ia faia so latou sao i le faatoilaloina o Ieriko mo lo latou nofoia.

Ua faataoto mai ai e le Atua ia Iosua le polokalame atoa, o le osofaiga o Ieriko, e pei ona faamatalaina mai e le tatou tusi faitau Iosua 6: 1 – 20. O le faatoilaloina o le aai o Ieriko, ua faatinoina i se ituaiga osofaiga ua faatonu mai e le Atua. O lenei ituaiga osofaiga ua faatulaga manino mai ai le finagalo o le Atua mo tagata uma; i le ola tapua’i ma le ola faatuatua ma faalagolago atu o tagata uma ia te Ia, e maua ai le filemu.

O le faamaoniga o lenei finagalo o le Atua, o le fa’aaogaina o ositaulaga, o le faatāua ma faaogatonu le atolaau a le Atua, ma le fa’aaogaina o le numera fitu i le faatinoga o le sauniuniga o le taua. O le faamasinoga a le Atua ona o le ola faapaupau o Kanana ua fa’aaoga ai Isaraelu mo lona finagalo. O aso e ono e faataamilo ai Isaraelu i le aai o Ieriko, e aunoa ma se leo, e faatasi i aso e ono, ona foi lea i lo latou togalauapi. A o le aso fitu e faatamilo faafitu ai Isaraelu i le aai o Ieriko. Ua atoa le fitu o taamilosaga, ona ili ai lea o pu o le iupeli faaumiumi e ositaulaga, ua faalogo ai le nuu o Isaraelu i le leo o pu, ona alalaga lea o le nuu i le leo tele, ona solo ai lea i lalo o pa, ona o a’e lea o le nuu i le aai taitasi i o latou luma, ua latou aea foi le aai.

O le valaau mata’utia lenei. Ua na o leo o pu o le iupeli, faatasi ai ma le valaau leo tele o tagata o le nuu o Isaraelu, ae solo ai i lalo pa maualuga ma le malosi o Ieriko. O leo o pu o le iupeli ua ili e faitaulaga, o le faailoga lea o le siufofoga o le Atua Soifua. O le valaau leo tele o tagata o Isaraelu o le faailoga, o le valaau o le faatuatua i le lagi i le Atua soifua mo le faaolataga ua faia mo Isaraelu.

O le finagalo lea o le Atua mo lona nuu filifilia o Isaraelu, ia latou usu mai se pese fou i lo latou nofoia ai o eleele o Kanana ua fai mo latou tofi. Ia lafoa’i lo latou ola muimui ma le faitio, a ia talitonu ma faatuatua ma faalagolago i le Atua, latou te vaaia ai le mamalu ma le silisili ese o ana galuega mamana. E pei ona fa’aalia i le faatoilaloina o Ieriko. O le Atua ua au faatasi ma Isaraelu, e pei ona lotolotoi le atolaau i totonu o le

osofaiga, o le leo o le pu o le iupeli o loo ili e ositaulaga o le faailoga o le siufofoga o le Atua. Ua matautia ai le valaau ma ua soloia ai lalo pa o Ieriko.

O le valaau mata'utia, ina ua matua usita'i ma talitonu ma faatuatua i lo latou Atua, na te tauina taua mo i latou. E leai se faigata ona latou nofoia eleele o Kanana. A o se feau aoga foi mo outou le fanau. O lo outou usita'i, talitonu, faatuatua ma le faalagolago i le Atua i mea uma lava, e te maua ai lona filemu, ma ia foa'i mai lona atamai, e ola ai ma le fiafia ma le tausaaafia i le vaaiga a tagata. O Iesu Keriso o lona usita'i, talitonu, faatuatua ma le faalagolago atoa i lona Tamā na ia alaga ai i le valaau mata'utia i luga o le satauro, "Ua taunuu! Ua fai lenei mo oe. Ia manuia outou le fanau.

#### **GALUEGA FAATINO:**

Ta'u mai fuafuaga o le faatoilaloina o Ieriko e faia e Isaraelu o loo taua le numera 7.

1. Ia faataamilo faafitu i le aai o Ieriko i le aso fitu.
2. Ia ave e faitaulaga e toafitu o pu o le iupeli ma ili i aso e fitu.
3. Ia 'aua nei lagona se leo i aso e fitu.
4. A atoa taamilosaga e fitu ona ili faaumiumi lea o leo o pu e fitu.
5. Ona alalaga leo tele lea o le nuu

**PESE:** Pese ma Viiga 5 (Le Alii e, le Atua e)

#### **A'OA'OGA:**

1. O le usiusita'i ma le faatuatua e finagalo ai le Atua.
2. Ia tapuai i le Atua i le agaga ma le loto atoa.
3. E leai se mea e faigata i le Atua.

.....

**ASO SA :** 5 ME 2019

**MATAUPU :** NA I AI LE MUSIKA I LE AMATAGA

*(In the beginning there was music)*

**SINI :** Ia a'oa'oina le fanau ia malamalama o le musika sa i le amataga o le alofa faavae lenei o le Atua. E tatau ai ona pepese ma vivii e momoli ai le agaga o le faafetai i le Atua.

**TUSI FAITAU:** Salamo 96: 1 – 13

#### **FESOASOANI MO FAIAOGA:**

O le musika o le tuufaatasiga lea o ni leo eseeese ina ia mafai ona o faatasi i se leo e aupitosili ona logo malie i le faalogo. O le musika foi e i ai lona mana e mafai ai ona fofo i ni faafitauli o le mafaufau. *(healing power of music)* E tutupu lagona ma e suia foi mafaufauga pe a logo malie le faafofoga i le leo o le musika. O le musika e o faatasi ma pese. Ao le upu ua masani ai ..*O se ua fiafia ina pese ia....*

I manatu o le Fai Salamo, ua pese le tagata ona ua fiafia i le musika a le Atua sa i le amataga. Fesili poo le a le musika sa i le amataga? E mafai ona tele ni tali i le faauigaina o le musika sa i le amataga. Peitai a talanoa loa i le amataga – ua na'o le Atua sa iai lona Agaga i le amataga, o le Atua na ia amataina mea uma e ala i lana foafoaga. A o le alofa lenei o le Atua na mafua ai ona fegaoioiai lona Agaga i le amataga. Lea la ua pese ai le Fai Salamo e lagiina ai lona Agaga faafetai i le Atua i lona alofa. O le mataupu sa faitauina – tasi lenei salamo e masani ona pepese ai Isaraelu i taimi o tapuaiga i totonu o le malumalu. O le pese o loo ua atoatoa ai le agaga vivii o le tagata Eperu e pei ona



faapuina o le pese fou. I le pese la a le Fatu pese e pei ona faitauina e foliga mai e eseese uma mafaufauga o lo o aumai ai i totonu. I le vaega muamua ( 1-6) o loo vivii ai le Fatu pese ua leai lava se atua e sili atu nai le Atua moni o Isaraelu. O le Atua na logo malie ai le lalolagi i le amataga ina ua atoatoa ona lelei le foafoaga na ia faia. O le Atua e onomea i ai viiga ma pesega o lona mamalu ua le gata mai. E tatau ona viia e tagata uma lava. O le vaega lua o le pese (7- 9) O loo ta'u atu ai i tagata ina ia latou matua avatu taulaga mu e saga viia ai le Alofa o le Atua, po o le musika sa i le amataga o le Atua. O le Atua o le lalolagi atoa ua leai se mea e na te lei faia. I le manatu o le fatu pese ana leai le alofa po o le musika na fofola e le Atua e le matagofie le pepese a tagata i le pese o le soifuaga.

Ia ma le vaega mulimuli (10 – 13) – O iina o lo pese ai le fatu pese i le malo amiotonu a le Atua. Afai o le Atua o Ia sa i ai i le amataga o lona uiga o Ia foi e na te faia le faamasinoga mo le tagata i le taimi e mulimuli mai. O lo o aumaia ai e le fatu pese mea uma o le foafoaga ua faapotopoto aua o le a sau le Atua e fai lana faamasinoga tonu i le lalolagi. O lona uiga o le musika i le amataga o le alofa o le Atua, ao le musika i le faaiuga o le faamasinoga lea a le Atua i le lalolagi. O i latou uma sa o faatasi a latou fatuga ma le musika na faia e le Atua i le amataga, oi latou foi ia o le a maua le tau o le manuia. A o e foi na latou le faalogo lelei i le musika na faia e le Atua, oi latou foi ia o le a maua i puapuaga i le aso o le faamasinoga.

O se feau taua ia o faatasi a tatou fatuga ma le musika ua uma ona fatuina e le Atua. O lona uiga ia o faatasi lo tatou ola faatuatua ma faalagolago i le Atua, i lana musika o le alofa na ia faia ai le foafoaga ua aumaia e tatou te ola ma fiafia ai. O le aumaia e le Fatu Pese o pesega ma viiga e faapena le tagata soifua. Ia iloa ona ola vivii i le Atua o ia na muai alofa mai i le amataga. O se mea ina a leaga ina nei vivii manu ma laau ma isi mea e leai ni fofoga sei tulou, ae leiloa e le tagata ona vivii mo le alofa o le Atua sa i le amataga.

Ia manuia tele outou le fanau.

**Uiga o Upu:**

- i) faamasinotonuina: Ua faamasinoina e tusa o lana amiotonu sa fai
- ii) taalili mai le sami: O leo o galu o lo o fefatia'i.

**GALUEGA FAATINO: Taliga Fesili**

- 1. O le a sou iloa i le taua o le musika i le soifuaga lautele?
- 2. Ao le a foi sona so'otaga taua mo faalogoga o le tagata?
- 3. O le a se mea ua faatusa ai le musika e tusa o le mataupu o lenei taeao?

*NB: (O nai fesili tetele ia e tuliloa ai le mataupu, e le o i ai ni tali maumaututu ae ia tuu le avanoa e tatala mai ai lagona o le fanau e uiga i le mataupu. E i lau Susuga lava i le Faiaoga mafaufauga e togi ai mafaufauga o le fanau.....)*

**PESE:** Na aumai e Iesu se pese....  
 Tuu sao mai luga  
 Na ia iloa se pese faafetai  
 E lagi ai lona alofa....

I lo'u loto ou te pese ai pea, ou te pese ai pea, i le lagi i luga  
 I lo'u loto ou te pese ai pea, ou te pese ai i lona alofa.

**A'OA'OGA:**

- 1. Ia iloa ona ola vivii i le Atua
- 2. Tatou manatua le alofa o le Atua na afua ai le lalolagi.
- 3. E faamasinotonuina i tatou e le Atua.

.....

**ASO SA :** 12 ME 2019

**MATAUPU :** **TANIELU, O LE ATALII O LE TAFEAGA**  
(*Daniel, a child of the Exile*)

**SINI :** Ia a’oa’oina le fanau ia malamalama, o Tanielu o le tagata sa ave faatafea faatasi ma nisi o tama e toatolu i Papelonia e Nepukanesa le tupu. O Tanielu o le atalii o le tafeaga na ia faasaolotoina le tafeaga.

**TUSI FAITAU:** Tanielu 1: 1 - 20

### **FESOASOANI MO FAIAOGA:**

O le tausaga e tolu o le nofoaiga a Ioakima le tupu o Iuta, na alu ane ai Nepukanesa le tupu o Papelonia i Ierusalem, ma na vagaia le a’ai o Ierusalem. Ua latou ave i ipu auro o le fale o le Atua ma le tele o nisi o oloa taua o Iuta. Na poloai e le Tupu Asepenasa le alii e pule i ana eunuka ina ia latou aumai nisi o le fanauga a Isaraelu e aofia ai fanau a le tupu ma nisi alii sili.

Ona aumai ai lea o tama e toafa e Asepenasa. O Tanielu, o Hanania, o Mesaclu ma Asaria. O tama nei o ni tagata e amiotonu ma amio lelei i totonu o Iuta. O ni tagata foi e atamamai ona o lo latou faatuatua i le Atua. Ua i ai latou le atamai o le Atua ina ia latou filifili tatau ai i le mea tonu ma atoatoa.

### ***Uiga o Igoa o tama nei:***

- i) Tanielu: O le Atua o lo’u faamasino
- ii) Hanania: Ua fa’aali mai le alofa o le Atua
- iii) Mesaclu: o ai e pei o le Atua
- iv) Asaria: e fesoasoani mai le Atua

### ***Uiga o latou igoa fou:***

- i) Peletisara: e fesoasoani mai Pelea (o le atua sili o Papelonia)
- ii) Sataraka: i lalo o le faatonuga a Atuku ( atua o le masina o Papelonia)
- iii) Mesako: o ai e pei o Matuku ( atua sili o Papelonia)
- iv) Apeteniko: o le auauna a Nepo (le isi atua o Papelonia – fai mai o le atua e aoao ma tusitusi)

Ua oo i latou i Papelonia ona suia ai lea o latou igoa. O Tanielu ua suia ia Peletisara, o Hanania ua faaigoa ia Sataraka, o Mesaclu ua igoa ia Mesako, ma Asaria ua igoa ia Apeteniko. Na poloai foi e le tupu le pule i Eunuka ina ia tausaga ma fafaga i ai latou i tausaga e tolu. Ia aai i latou ma inu i le uaina ma meaai a le tupu.

I le manatu o tama nei aemaise lava Tanielu, e le tatau ia i latou ona latou aai ma inu i meaai a le Tupu. Ua manatu Tanielu o mea ia ua uma ona ofoina mo Tupua o Papelonia. Ona talosaga lea o Tanielu i le sa ia vaaia i latou ina aua lava nei latou aai ma inu i le uaina e inu ai le tupu, ae o le a aai i latou ni fua o laau ma ni vai latou te aai ma inu ai. E ui sa faigata i le na pule i eunuka le manao o Tanielu, peitai sa faia lava e Tanielu le auala ina ia talitonu ai le Melesara i le feau a Tanielu. O le faamoemoe o le aai ma inu o Tanielu ma tama e toatolu i le uaina a le tupu, o le faamoemoe ina mavae atu tausaga e tolu ua tino lelei ma aulelei i latou. Ae ina ua mavae po e sefulu e pei ona tofotofoina ai i latou. Ona iloa ai lea e le pule o Eunuka e moni lava ua tino lelei ma aulelei i latou ina ua latou aai i fua o laau ma inu i le vai.

O fua o laau ua tatou iloa o taumafa ia mo le soifua maloloina e faapena foi i le vai. E tele le mau vai suamalie ma vai oona, a ua sili ai lava ona soifua maloloina le vai ua ta’ua e tatou o le vai auli. O le uiga o le manatu o taumafa ia na aai ai Tanielu ma

tama e toatolu. O meaai e mama e lei ofoina mo ni tupua, o meaai paleni, e aoga mo tino maloloina. Peitai o le uiga loloto o taoto ai i taumafa paleni o fua o laau ma le vai, o mea e maua mai i le natura o le foafoaga a le Atua. O lona uiga o le tausiga o Tanielu ma tama nei, o le tausiga mai le Atua. E le o le tausiga a Nepukanesa ma ona atua ese, ao le tausiga mama a le Atua ma mea o le foafoaga e mama ma soifua manuia.

O le mea moni e lei avea le ola faatafea o Tanielu ma tama e toatolu ma ala e tosina ai i le suamalie o le uaina ma le felanulanuai o taumafa i luga o le laulau a le Tupu. O le uiga lea o le tumau pea o le ola faatuatua o le au uso i lo latou Atua moni o Isaraelu. O lo latou ola faatuatua lea na foaiina ai e le Atua le faautauta lelei ma le atamai e tusa o lo latou i ai i Papelonia ma le tafeaga. Ina ua mavae tausaga e tolu e pei ona poloai ai le tupu o Nepukanesa e tausia ai nei tama, ona ia feau atu ai lea oi latou. Ona talanoa ai lea o le tupu ma i latou, o le mea ua maitauina e le tupu ua leai lava se tasi i totonu o lona malo e tutusa ma le atamai o loo ia i latou nei. O Tanielu fai mai ua atamai o ia i fa'aaliga uma lava ma miti.

I le aotelega o manatu, mo le i ai o nei taulealea i totonu o Papelonia, sa latou taliaina le suiina o latou igoa ma le tulaga o a'oa'oga faalemafaufau i totonu o Papelonia. Peitai o lo latou faatuatuaga ma nisi mea e ono aafia ai lo latou faatuatuaga moni, o mea ia e lei taliaina e nei uso. O le iai o Tanielu i le tafeaga o le finagalo lea ole Atua. O le tafeaga o le fa'aaogaina lea e le Atua o le malosi o Papelonia e aoai ma faatonutonu ai lona nuu o Isaraelu. O le tafeaga la e mafai ona faapea o le alofa tiga o le Atua. O Tanielu o ia lea ua avatu e le Atua e fai ma atalii e na te faaolaina le nuu o loo i le tafeaga. O le avefeau e tau atu ia Nepukanesa ma Papelonia e sili atu ona malosi le mana o le Atua nai lo fitafita a Papelonia.

O se feau taua mo tatou le fanau. Ia avea i tatou ma atalii ma afafine e momoli le mana silisili ese o le Atua. Aua nei avea le malosi mai o mea faafefefe ma le fili e ua feilafi ana mailei ma ala e vaivai ai lou ola molimau i le mana o le Atua. O le faatuatua o Tanielu na ia maua ai le atamai faale Atua e na te

silafia ai mea lilo. E faapena tatou – e tatou te maua le atamai faale Atua pe a tumau lo tatou faatuatua. O le atamai faale Atua lena e tatou te iloa ai mea lelei ma mea faaletonu o le ola nei. O Iesu Keriso o le Atalii na afio mai e avatu i tatou o loo tafefea i faiga a le agasala, ina ia tatou auai faatasi ma Ia i lona malo e faavavau....

Ia manuia tele outou le fanau..

### Uiga o Upu:

- i) Eunuka: oi latou ua faamamaina faapitoa mo le tautuaina o le maota o le tupu
- ii) e le pona: e leai se agasala
- iii) Alataia: avea ma mafuaaga.

### GALUEGA FAATINO: Fesili

1. O ai uiga o igoa Eperu o tama ia e toafa?
  - (i) Tanielu
  - (ii) Hanania
  - (iii) Mesaclu
  - (iv) Asaria
2. O le a se fesootaiga o o latou igoa ma la latou gaoiga sa faia i Papelonia?  
*(Tatala le avanoa i manatu o le fanau – A o sina fesoasoani – E mafai ona faafeso'otai igoa o tama nei i la latou faatinoga sa faia i Papelonia..)*

Tali:

- (i) Tanielu - O le Atua o lo'u faamasino ( O le Atua na ia faamasino i le amio a Nepukanesa)
- (ii) Hanania – Ua fa'aali mai le alofa o le Atua ( na fa'aali mai le alofa o le Atua ia i latou ina ua le oti i latou i le ogaumu aasa)

- (iii) Mesaelu – o ai e pei o le Atua ( Ua le tutusa atua mamate o Papelonía ma le Atua moni o Isaraelu)
- (iv) Asaria – e fesoasoani mai le Atua (na fesoasoani le Atua e laveai mai le afi aemaise o leona feai)

**PESE :** E leai se mea e faigata i le Atua

E leai se mea e le mafai  
 Pe a faatuatua i le Atua  
 E leai se mea e le mafai  
 Pe a faatuatua i lana Upu  
 Faalogo ia ao fetalai  
 E leai se mea e faigata  
 Ia faatuatua i le Atua  
 Ma lana Upu Paia  
 Aua o mea, so o se mea  
 Ioe, e mafaia mea uma e le Atua.

Nothing is impossible when you put your trust in God  
 Nothing is impossible when you're trusting in His word  
 Hearken to the voice of God to thee  
 Is there anything too hard for me??  
 Then put your trust in God alone and rest upon His Word  
 For everything, Oh everything  
 Yes, everything is possible with God.

**A'OA'OGA:**

1. Ia tumau lo tatou ola faatuatua.
2. Aua tatou te fefefe e tautatala i le mea moni
3. Avea i tatou ma atalii ma afafine e momoli le tala moni.

.....

**ASO SA :** **19 ME 2019**

**MATAUPU :** **FA'AALIGA O LE MANA O LE SILISILI ESE**  
*(Revealing the power of the Most High)*

**SINI :** Ia a'oa'oina le fanau ia malamalama ua fa'aali mai ia Tanielu le mana silisili ese o le Atua, o le mana e manuia ai le nuu o le Atua pe afai e tumau pea ma uumau lo latou faatuatua moni.

**TUSI FAITAU :** Tanielu 7 : 1 – 18

**FESOASOANI MO FAIAOGA :**

I le mataupu e lua(2) o le tusi o Tanielu, o loo faamauina ai e Tanielu le faamatalaina o miti a le tupu o Nepukanesa. Peitai o le mataupu o lenei taeao o lea ua fai le miti a Tanielu e ala i le fa'aaliga na ia iloa. Ao le tasi nei o auala e fa'aali mai ai le Atua i ona tagata, e pei foi ona fa'aali ia Iosefa e ala i le miti. O le miti la po o le fa'aaliga na iloa e Tanielu e manatu le au suesue i le Tusi Paia o mea e lei tutupu. Mafuaaga lea e lavea ai le tusi o Tanielu i lalo o tusitusiga faa-apokalupisa (apocalyptic writings). I se aotelega o le fa'aaliga na iloa e Tanielu – o loo taualuga lava ina ua pule aoao le au paia ma le mamalu o le Silisili ese o le Atua. (*“the holy ones of the Most High.”*) O manu e fa na o a'e nai le sami o se vaaiga uiga ese, peitai e le taitai ona ausia ai le mamalu ma le malosi o le fa'aali mai o le mana silisili ese o le Atua.

**Fa'aaliga Na iloa e Tanielu:**

*O matagi e fa o le lagi ua pesi atu i luga o le sami – O le ata manino lea o le faaliga mai le Atua, lea ua saveu e le Atua le sami ina sei o a'e ai manu feai eseese o manu malolosi, ina sei*

feagai ma le mamalu silisili ese o le Atua. O le sami ua faauigaina o le le viatana i le tusi o Fa'aaliga. O lona uiga o le sami o le nofoaga e nonofo ai manu feai. O manu feai o le fili ma le tiapolo. I manatu o le fa'aaliga – o lo o tautala le fa'aaliga ia Tanielu e uiga i le malosi faafitafita o le a pulea Isaraelu. Ao ia malosi eseese o le a toilalo uma i le pule fai toatasi a le Atua. O lona uiga i se manatu e faapea o le fa'aaliga po o le miti a Tanielu – O le fa'aalia o le mana silisili ese o le Atua ma le faaolataga tele o le a faia mo lona nuu o Isaraelu.

O le manu feai muamua ua pei se leona e i ai apaau o le aeto. O loo aumaia ai le ata o le malosi o le leona ma le malosi o le aeto e lele ona o ona apaau. O le leona ua faaigoa o le tupu o manu o le vao, poo le tupu o manu feai. A o le leona lava ia e leai ni ona apaau. O loo faatusa i ai le malosi o Papelonía ma le nofo tupu o Nepukanesa ua mafai ona lele i apaau o isi malosi mai isi tagata. Peitai fai mai le fa'aaliga – *sa siitia foi le fogaeleele...* O le vaega lea o loo feso'otai ma le laau e pipii i le fogaeleele e matua fuatia lona a'a, o le mea e soli e vae. O lona uiga e ui ina lele ae i ai le taimi e tu eleele ai. O le tomuaga ma le ata vavalo lea o le mea o le a tupu ia Nepukanesa e pei ona silafia. Na iu ina tofu Nepukanesa i le mutia ma suatia e fai ma ana mea tausami.

O le manu feai lona lua ua pei o le urosa ua i lona gutu ivi asoaso e tolu. O le urosa (bear) o se manu e tino tele toe lapoa. Ua faatusa iai le malo Peresia lea na toilalo ai Papelonía ona o se malo e tele atu nai lo Papelonía. E toatele ana fitafita ma le malosi faa-militeri. O le Urosa e tele ae faifailemu foi lana savali – ua faatusa i ai le alafua ma faiga faa temokarasi a Peresia e le vavevavea ae faifai lemu. O lona uiga o tapenaga e saunia lelei ma maeaea lona faatulagaina, o tapenaga ia e iu manuia. O ponaivi ua i lona gutu o lona uiga ua uma tausami i ona aano, o le ata lea o le aveesea o le sosia o Papelonía i le malosi o Peresia.

O le manu feai lona tolu o le tasi e pei o le nameri (leopard). O le malosi lea i manatu o le faaaliga o loo sosoo mai ia Peresia,,,(*mulimuli ane*). O le natura o le nameri o se manu e

televave tele, a o se manu e fifilemu lelei seiloga lava ua mautinoa ua maopopo ane se mea o le a osofai ona osofai loa lea. O lona uiga e leai lava se mea e sao mai pe a osofai e le nameri. E faapena le alafua o loo faatusa i ai le sili atu foi o le malosi ma le maemaea o Alesana le Sili. Ua iai foi o ona apaau e fa, o Nepukanesa e na o le lua ona apaau, peitai o le malosi o Alesana le sili e fa apaau. Afai la ua televave pei o le nameri, toe faaopopo atu ai ma apaau o lona uiga ua pei o le vaalele tau le saosaoa o le malosi faafitafita o le malo o Alesana le sili. O loo iai foi ma ulu e fa o le manulele – o ulu e fa e taunuu lea ina ua vaevaeina le malo o Alesana ina ua maliu o ia. O faailoga ia sa taunuu lava i le isi 200 tausaga mulimuli ane. O ata lalafa ia e talitonu ai le au suesue o le Tusi Paia i le moni o fa'aaliga na iloa e Tanielu.

O le manu lona fa – o loo faapea mai le fa'aaliga – o le manu ua sili atu lava lona malosi nai lo isi lava manu muamua. O le faamatalaina o le manu lona fa lea o loo faatusa iai le tulai mai o le Emeperoa o Roma ma faatula'i uma ese isi malosi sa i ai muamua. O nifo uamea tetele na ia matua lamupalaina – o le faatusa lea o le malosi o le sosolo mai o tu ma aga aemaise o le malosi faafitafita na mulimuli mai ma pulea le lalolagi atoa i ia vaitau. O ana tulafono ma ana agaifanua, aemaise o le faataatiaga o le malo e ala i ona taitai, na matua tulaga ese ai ma isi malo na muamua atu. O nifo e sefulu ua faatusa i ai isi malo e sefulu na vaevaeina i ai le Emeproa o Roma.

A manatu iai i le soloaiga o malo ma lo latou tulaga i le malosi ma le mamalu, e mafai ona manatu e le faigofie pe a tatou manatu loloto i ai i le taimi e tutupu ai ia mea. O le pale feagai o le Isaraelu pologa ma taotaomia ona lagona aemaise o le leai o se saolotoga ma le pule ua soona fai aemaise o le manatu faausili o i latou ua silisili ona mamalu ma malosi. O se olaga e manatu e matua pologa lava. Peitai o le ola pologa ma le faigata o Isaraelu – sa aifilofilo ai le mamalu silisili ese o le Atua.

I le fuaiupu e 13 o loo i ai le isi vaaiga aupito sili ona mamalu na iloa e Tanielu ina ua uma manu feai e fa na o a'e nai le sami. O

lea vaaiga fai mai – *ua afio mai i ao o le lagi Le e pei o le Atalii o le tagata....* Ua tuu faafeagai le o a’e o manu feai mai le sami o le nofoaga e iai le tiapolo ma le afio mai o le mamalu ole Atua mai i ao papae o le lagi –O le mamalu e paepae e pei o le kiona, faailoga o le mama (purity). O le mamalu foi ma le malosi na o a’e ma nei manu feai, ua o se matagi e agi ma toe mou atu. O le malosi ma le mamalu e i ai ona gataaga ma le taimi e mou ai. Peitai o le mamalu o le Atua – o le mamalu ma le silisili ese e leai se mea e gata ai – *f14 O lana pule o le pule e faavavau lea, e le mavae atu ia, o lona malo foi e le faaumatia....* O lona uiga o le pologa ma le puleesea o tagata Isaraelu – ua na’o se mafo’e o le tino, ae tumau pea lo latou manuia e faavavau pe a tumau pea ma pipii i le mana ma le mamalu silisili ese o le Atua.

Ioe tamaiti – O le feau lea mo tatou. E tatou te fetaii ma manu feai o le soifuaga nei, o manu e malolosi ma tulagaese lo latou malosi. O manu feai e ono faavaivaia ai lo tatou ola faatuatua, o manu feai e taitai sese ina ai lou ola mo le Atua. Ao le lui mo tatou – aua tatou te faavaivai e ui i le gasolosolo mai o manu feai, e le taitai ai ona aveesea ai le mana ma le mamalu o le Atua o lo auai mai pea i ai tatou.

**Uiga o Upu:**

- i) fufutieseaa : aveesea
- ii) lamupalaina: lamumalūina
- iii) fasimatea: fasioti
- iv) lauao: laulu

**GALUEGA FAATINO:**

Faamatala mai manu feai nei ma o latou uiga.

- 1. Liona
- 2. Urosa
- 3. Nameri

**PESE:**

Majesty, worship his majesty;  
 Unto Jesus be all glory, honor, and praise.  
 Majesty, kingdom authority,  
 Flow from his throne unto his own, his anthem raise.  
 So exalt, lift up on high the name of Jesus.  
 Magnify, come glorify Christ Jesus, the King.  
 Majesty, worship his majesty,  
 Jesus who died, now glorified, King of all kings.

**A’OA’OGA:**

- 1. E mamalu ma silisili ese lava le Atua
- 2. Aua tatou te faavaivai i luitau o le ola
- 3. E faavavau le pule a le Atua.

.....

**ASO SA : 26 ME 2019**

**MATAUPU : O LE TAMAPI’I O IAKOPO**  
*(Jacob the wrestler)*

**SINI :** Ia a’oa’oina le fanau ia malamalama o le fagatuaga a Iakopo ma le agelu e atagia ai le tagata ua naunau i le agaga o le Atua ina ia faamanuia atu ia te ia. O se mafutaga ua atagia ai le mafanafana o le va o Iakopo ma le Atua.

**TUSI FAITAU :** Kenese 32 : 22 - 32

**FESOASOANI MO FAIAOGA:**

O le tatou tala i lenei taeao o le tala ia Iakopo. Manatua lea sa sola Iakopo mai lona uso o Esau. A o lea la o le a tatou talanoa. O lea ua toe foi mai Iakopo e feiloai ma lona uso matua o Esau. O Esau sa nofo i le nuu o Seira i Etoma. Ina ua latalata ona oo ai Iakopo ma lona aiga ma ana auauna ma ana lafu manu e tele, sa lagona e Iakopo le fefe ina nei toe tau mai e lona uso o Esau lana mea leaga lea sa fai ia Esau. (*Manaiā foi ae toe fesili poo le a le mea na mafua ai ona sola Iakopo,,ona toe faaauau ai lea o le tala*).

O le fefe la o Iakopo, lea na ia faamuamua ai nisi o ana auauna ma ana lafu manu. Sa faatonu e Iakopo e na muamua ia faapea atu ia Esau – “o loo mulimuli atu lau auauna o Iakopo”. Sa ave foi e Iakopo nisi meaalofa mai ana lafu manu ma ana oloa e ave ia Esau. Ona muamua lea o ana auauna, ao ia ua nofo pea i le togalauapi.

Ua oo i le po ona ia tulai lea ma ave ana avā e toalua, ma ana auauna fafine e toalua, ma ona atalii e toasefulu ma le toatasi ma laasia atu le asaga o Iapoka. Ua ia avatu lona aiga ma ana auauna ma tuu i le isi itu o le vaitafe. Ae ua totoe ai nao ia – ua oo i le po, ona la fagatua ai lea ma le tagata. Ua oo ina ao, ua iloa e le tagata ua malo o ia ia te ia. Ona ia pai atu ai lea i le fa’iga o lona suilapalapa ona see ai lea o le ivi. Ua fai atu o ia ia Iakopo – “Ina tuu maia o au ou te alu” na tali Iakopo e le mafai ona ia tuua o ia seiloga e faamanuia mai ia te ia.

Ona fai mai ai lea o le tagata – “ O ai lou igoa “ona tali atu ai lea o ia. “O a’u o Iakopo”Ona faapea mai lea o ia ia te ia – “ E le toe ta’ua oe o Iakopo, a’o Isaraelu o lona uiga O le alii o ia i le Atua, aua ua e pei o se alii ua e finau atu i le Atua atoa ma tagata ma ua e manumalo”Ona alu ai lea o Iakopo ma setusetu lona vae, ua uma ona faamanuia i ai le Atua, ua le toe igoa foi ia Iakopo.

Sa faaigoa e Iakopo lea nofoaga o Penieli o lona uiga **o le nofoaga na ia iloa ai le Atua**. O le a sa tatou faauigaina o lea mea. Po o le mea ea faatoa iloa ai ii e Iakopo le Atua???O le vaega tonu lea e aumaia ai ni mataupu silisili mo tatou le fanau.

E lua ni vaega taua e fia tuliloa o le tala:

1. O le fagatuaga a Iakopo ma le agelu – Ua tatou iloa na suia ai lona igoa. Ua mafua ona suia lona igoa ona o se tagata sa finau malosi i le agelu. Ae na mafua ona finau malosi Iakopo ona o le malosi o lona loto atu ile Atua. O lona loto sa pulea e le popole ma le fefe, lea ua ia aveese ia lagona vaivai ae tuu i ai lona loto atu i le Atua. O lona uiga ua avanoa lona loto sa popole ma fefe. A o lea avanoa ua faatumulia e le Agaga o le Atua. O se feau a lagona lo tatou popole ma le fefe, tatou faalagolago i le mana o le Atua.
2. Penieli – ua ia iloa ai le Atua. – O le mea moni o Iakopo o le tagata ua faamanuia i ai le Atua, o loo ia te ia foi le agaga auai o le Atua. Peitai o le uiga o Penieli, o le nofoaga ua la faafesagai ai ma le Atua, o le nofoaga ua tanu ai lagona popole ma le fefe, ae suia i lagona o le fiafia. E mafai foi ona faapea o le iloa e Iakopo o le Atua i Penieli – ua ia iloa ai ni faailoga matamata tetele o le Atua auai mo ia ma lana fanau.

Ia o le tatou tala lena tamaiti – O le suia o le igoa o Iakopo, o le faailoga o le faamanuia a le Atua ia Iakopo, o le faamanuia o le a leai se toe feseeseaiga i lo la va ma lona uso o Esau. O le a maua le filemu e feiloai ai ma Esau. O se a’oa’oga mo tatou le fanau – Ia tatou finau i le Atua, ia tatou fagatua ma le Atua e faamanuia mai ai foi le Atua i ai tatou. A tutupu ni lagona popole ma le fefe, tatou aumaia le agaga o le Atua e pa’i mai ia i tatou ona sologa manuia lea o mea uma. O Iesu Keriso na afio mai e fagatua ma le agasala ina saofaga le tagata, e ala i le salamo ma faatuatua faamaoni..Ia manuia tele outou le fanau.

**Uiga o Upu:**

- i) faalalelei: toe faalelei le va, teuteu se leaga
- ii) toagalauapi: nofoaga o lo o api ai, nofoaga o loo faamautu ai
- iii) fagatua : pii, fusifusi, mafuta.
- iv) setusetu: savali faasapasapa, le paleni le savali
- v) ua na memei: maso o loo i le suilapalapa.

**GALUEGA FAATINO:**

**Faatumu avanoa i upu o lo o i lalo:-**

Finau, Toasefulu, suilapalapa, Iapoka, fagatua, Isaraelu, Iakopo, aoina.

Ua ia tulai foi i lea po, ma ave ana ava e toalua ma ana auauna fafine e toalua, ma ona atalii e 1\_\_\_\_\_ ma le toatasi, ma laasia atu le asaga o 2\_\_\_\_\_. Ua tuua foi Iakopo e toatasi, ua la 3\_\_\_\_\_ foi ma le tasi tagata ua oo ina 4\_\_\_\_\_. Ua iloa foi e ia ua le malo ia te ia, ona pai atu lea o ia i le faiga o lona 5\_\_\_\_\_. Ona faapea mai lea o ia, e le toe ta'ua lou igoa o 6\_\_\_\_\_, a'o 7\_\_\_\_\_, aua e pei o se alii ua e 8\_\_\_\_\_ i le Atua atoa ma tagata ua e manumalo.

**Tali:** 1. Toasefulu, 2. Iapoka, 3. Fagatua, 4. Aoina, 5. Suilapalapa, 6. Iakopo, 7. Isaraelu, 8. Finau.

**PESE: SPIRIT OF THE LORD**

Where the Spirit of the Lord is, there is love  
 Where the Spirit of the Lord is, there is peace  
 There is comfort in life's darkest hour  
 There is light and life, there is help and power  
 In the Spirit, in the Spirit of the Lord

O fea lava e iai le Agaga, e iai le alofa  
 O fea lava e iai le Agaga e iai le filemu  
 E to'amalie i taimi faigata ma puapuaga

Aua e mana, ma malosi pea le Agaga

**A'OA'OGA:**

- 1. Ia tatou finau atu i le Atua.
- 2. O le Atua e aumaia le filemu i le loto popole ma le fefe.
- 3. E faamanuia i tatou e le Atua pea a tatou loto atu ia te Ia.

.....

**ASO SA: 2 IUNI 2019**

**MATAUPU: AFIO A'E O IESU I LE TINO, UA AFIO A'E I LE LAGI** (*Aseension a bodily Jesus, ascend into heaven*)

**SINI:** Ia a'oa'o le vasega, ina ia malamalama lelei i le mafuaaga ua toe afio a'e ai Iesu i le tino, ua afio a'e i le lagi.

**TUSI FAITAU:** Galuega 1: 1 – 11

**FESOASOANI MO FAIAOGA:**

O le vaega sa tatou faitauina mai i le tusi o Galuega a le au Aposetolo o loo faailoa manino ai e le tusitala ia Teofilo, mea na ia tusia i le ulua'i tala i mea uma na amata ona faia e Iesu ma a'oa'o atu ai. O Teofilo o le igoa faa-Eleni, o lona uiga; "o le alofa i le Atua." O le alii sa ave i ai tusi e lua a Luka, o le Evagelia ma le Galuega, o le Luka 1: 1 ma le Galuega 1: 1. O loo faamatala ai foi e le tusitala ia Teofilo fetalaiga a Iesu i le au so'o na ia filifilia, ina ua mavae ona tiga. Ua ia toe soifua, ma ua faamaonia i faailoga e tele. A o faatasi la Iesu ma le au Aposetolo, na ia fetalai tu'u sa'o ai ia i latou; "Ia le tuua Ierusalema, a ia faatali i le mea na folafolaina e le Tamā, lea na latou faalogo ai ia te ia. E le gata i lena, ae na latou fesiligia foi Iesu; "Le Alii e, o ona po nei ea e te toe fuatai mai ai le malo ia



Israelu?” A o le tali a Iesu; “E le tusa ona outou iloa o ona po ma ona tausaga ua tuu e le Tamā i lana lava pule. O lona uiga, o le a maua e outou le mana pe a afio ifo le Agaga Paia i luga ia te outou, e fai foi outou ma molimau ia te au i Ierusalema ma Iutaia uma lava ma Samaria, e oo lava i tuluiga uma o le lalolagi. O le tala ao fetalai Iesu i ia mea, ona siitia lea o ia, o latou vaavaai atu, ua avea foi o ia i le ao nai o latou luma.

O le afio a’e o Iesu i le tino, ua afio a’e i le lagi, o le faailoga vaaia lea ma le atoatoa o le mamalu silisili ese, ma le pule aoao a le Atua, ma lona alofa moni ma le faamaoni ia i tatou uma ma le lalolagi atoa, e ala i le taulaga o le faaolataga na saunia e Iesu Keriso lona Alo pele e toatasi. Lea ua maea ona faataunuu, ua toe soifua manumalo mai ai i le oti ma le tuugamau, a ua afio a’e i le tino, ua afio a’e i le lagi.

Le tala lelei lea ia Iesu Keriso i lona fanau mai ma lana galuega faaola na faia i le lalolagi, ao soifua ai. Na liliuina ‘ese mai ai tagata i le ola pologa i le agasala ma puapuagaina ai, ma ua soifua ai i se soifuga faamalieina ma ola e tumu i le olioli. Aua ua fesootai tagata uma i le alofa tunoa o le Atua e ala i lona Alo o Iesu Keriso, ua ia aumai ai le ola e faavavau mo tagata uma, o e valaau atu ia te ia.

### **GALUEGA FAATINO:**

E lelei le fetuفاai ma tamaiti i le fesili e pei ona faailoa e Ioane 6: 62. O le fesili a Iesu na fai i ona so’o, “Pe faapefea pe a outou vaai atu i le atalii o le tagata, o alu a’e ia i le mea sa i ai anamua?”

E faamoemoe atu lava i lau susuga i le faiaoga, ae tuu pea le avanoa i tali a tamaiti. O iina foi, e maua ai ni a’oa’oga taua e faatatau i le mataupu i lenei Aso Sa.

**PESE:** 259 (Pese ma Viiga)

**A’OA’OGA:**

1. E le mavae le alofa o le Atua ia i tatou.
2. E ofoofogia fuafuaga a le Atua mai lava i le amataga o le foafoaga.
3. Ia tumau pea lo tatou talitonu ma faatuatua moni ia Iesu lo tatou Alii Faaola.

.....

**ASO SA: 9 IUNI 2019 (Aso Sa – Penetekoso)**

**MATAUPU: ALOFA (Love)**

**SINI:** Ia malamalama le vasega i le mafuaaga ua taua ai e Paulo fua o le Agaga i lana tusi faamalosi mo le Ekalesia i Kalatia.

**TUSI FAITAU:** Kalatia 5: 22-26

### **FESOASOANI MO FAIAOGA:**

O le Aso Sa lenei ua faaigoaina o le – Aso Sa o le Penetekoso. O le Aso Sa e faamanatu ai le afio ifo o le Agaga Paia e peiseai se afi i luga o le au so’o ma i latou uma o e na faatalitali ma le faatuatua i Ierusalema – (Galuega 2). O le upu Penetekoso o loo faaliliuina mai le upu Eleni o lona uiga o le ‘50’. O le 50 aso talu ona tuanai le toe Soifua mai o Iesu mai le oti ma le tuugamau (*ao le 40 aso talu le toe afio ae o Iesu i le lagi*) e faamanatu ai le Penetekoso. O le aso na toia ai i latou uma na faatalitali ma le loto gatasi i le Agaga Paia o le Atua. O loo i ai foi le talitonuga, o le ituaso tonu lenei na iloga ma faamauiina ai le uluai Ekalesia: Aso o le Afio ifo o le Agaga Paia o le Atua e fai ma fesoasoani i le au so’o ma le au faatuatua uma. E oo mai i nei aso, o loo faamanatu pea e le au Kerisiano le aso o le Penetekoso, o se aso o faamanuiaga mai le Agaga o le Atua. O

le faailoga maumaututu o le Atua auai i ona tagata i aso uma ma taimi uma.

O le mataupu o lenei aso – o le ALOFA. I le tusi sa faitauina ananei, o loo manino ai i upu a Paulo, o le ALOFA o se tasi o **fua – fruit** o le Agaga Paia o le Atua. Ua faaogaina e Paulo le upu – **fua-fruit** e faamatala ai le tagata ua osofia e le Agaga Paia o le Atua. E iloa le laau ola maloloina i ona fua-fruit. E iloa foi le ituaiga laau i ona fua –fruit. I le manatu o le Aposetolo, o le alofa (ma isi uiga lelei na e taua i le tusi faitau), o fua-fruits ia e iloa ai le tagata ua ia talia le Agaga Paia o le Atua. O fua o le Agaga o le Paia e pei ona talanoa Paulo, o loo faamamafa ai le va fesootai o tagata Kerisiano. E le iloa se tagata Kerisiano i ni upu ma tala, ae iloa i ana faatinoga/fua-fruits. E iloa le Kerisiano moni i le ola i le alofa ma fai isi uiga lelei e pei ona taua i le tala. O le faafitauli lea e feagai ma tagata Kerisiano i Kalatia, o talaiga ma talitonuga faa- Iutaia e uiga i le tulafono a Mose. Manatua foi, o lotu ia e aofia ai Kalatia o loo i ai le talitonuga na amata mea ai Paulo ma i latou o e sa i ai i Ierusalem (Galuega 2). O le toatele o ia tagata, o tagata Iutaia. O nisi na liua o latou talitonuga ia Iesu Keriso, ao nisi na tumau lava le tetee. E i ai foi i latou na faaleiloga lo latou talitonuga. O le faafitauli lea ua tupu, ua toe oo mai talaiga ia o le tulafono a Mose i tagata Iutaia Kerisiano i Kalatia ma ua peiseai ai ua faaleiloga atu ai ma i latou. O le feeteenaiga tele o loo aliali mai i talitonuga ia e lua: o le mataupu i le peritomeina o le pau ma le peritomeina o le agaga. O la Paulo e le sili le peritomeina o le pau i loo le peritomeina o le agaga. O le agaga o le mea sili lea ona taua. O le peritomeina o le agaga/loto o le tagata Kerisiano e iloa ina ua talia le Agaga Paia o le Atua. E iloa le talia o le Agaga Paia o le Atua, ina ua ola ma faatino fua o le Agaga Paia: ALOFA ma isi uiga lelei faaleAtua. O la Paulo, ia iloa le alofa atu i le isi uso a tagata i faatinoga ma upu e tautala ai. Ae le na o le ta'u e Kerisiano ae ola i le faafoliga ma faaleiloga. O le ALOFA o loo muamua mai le lisi o fua- fruits o le Agaga Paia. O lona uiga, e mafai ona avea le ALOFA ma faavae o isi mea uma. A maua le Alofa, ua mafai foi ona faatino ma olaina isi uiga lelei. O le

faamamafa, ia muai alofa i le isi uso a tagata ma ia maua le fealofani. E le mafai ona moni le alofa i le Atua pe afai e le alofa i le uso a tagata o loo nonofo ma mafuta i aso uma.

Tamaiti, e taua le ALOFA. O le alofa e faavae ai mea lelei uma. E manuia ma nofo lelei ai aiga, o le va o matua ma fanau, o le va o fanau, o le va ma isi tagata, ae silisili ai ona viia le va o le tagata ma le Atua. O le feau mo Kalatia, o le feau foi lea mo i tatou.. O Iesu lava na fetalai, afai e Alofa i le Atua ae inoino i le uso a tagata, o le pepelo le mea lena. O ai foi e manatu e fai se taulaga ae o loo inoino i le uso, e tataua ona tuu le taulaga, ae fai muamua le alofa.

Ia manatua, o le ALOFA FAAMAONI o le Atua, na ia tuua ai lona mamalu ae Afio mai tatou ola faatasi i le olaga lenei. Na aoao mai i le alofa, na tigaina ona o le alofa ma maliu ona o le alofa, na toetu manumalo i le oti, ona o le ALOFA ia te oe ma au.

O le a sa tatou tali atu i le ALOFA O LE ATUA – Tali: IA OLA I LE ALOFA.

**GALUEGA FAATINO:** Tali i fesili.

1. Pe aisea na foa'iina mai ai e le Alii le Agaga Paia i ona tagata?  
Tali: Ia fai ma fesoasoani ma faasino ala i le tagata faatuatua.
2. Aisea ua tatou maua ai le onosai, filemu ma isi fua o le Agaga?  
Tali: Aua ua i totonu ia i tatou le alofa o le Alii
3. O le a le vaega o le laau tatou te iloa ai se laau lelei?  
Tali: O ona fua.
4. Ae a le tagata e faapefea ona iloa le tagata Kerisiano moni?  
Tali: Ola alofa, agalelei, agamallu ma isi.

5. O a au faatinoga ua faailoa ai lou alofa i ou matua?:

**PESE:** O le Alofa o se mea e te faasoa atu, faasoa atu.....

**A’OA’OGA:**

1. O le alofa o le faavae o mea lelei uma.
2. O le alofa o le tasi lea o faailoga e iloa ai le tagata ua ia talia le Agaga Paia o le Atua
3. O le alofa i le Atua ae inoino i le uso a tagata, o le pepelo lea.
4. E finagalo le Atua, ia tatou olaina le Alofa ma isi uiga lelei i aso uma.

.....

**ASO SA:** 16 IUNI 2019

**MATAUPU:** VALAAU LE FAATOSAGA  
(*Call the Midwife*)

**SINI:** Ia a’oa’oina le vasega ina ia iloa le leaga o le ituaiga valaau na valaau ai Farao i Faatosaga.

**TUSI FAITAU:** Esoto 1: 8-22

**FESOASOANI MO FAIAOGA:**

(*E fautuaina le muai faamatala i tamaiti o galuega faatino a le Faatosaga*)

O le mea lava ua mautinoa, e le itiiti le taua o galuega faatino a i latou ua taua o FAATOSAGA i totonu o soo se faalapotopotoga o loo i ai: aiga, nuu, Ekalesia ma le atunuu. O le ola lava ia o le

tagata soifua, e mai le Atua lea. Peitai, o faatosaga o i latou ia e galulue i le uluai taimi e faafanau ai le fafine (se’i tulou) ina ia maua e le tagata a fanau mai le ola lea mai le Atua. A faaletonu galuega a le faatosaga ua maumau le ola o le tagata, ae a manuia, ua maua e le tagata ua fanau mai le ola.

Ua tulai mai le Farao na te lē iloa Iosefa e fai ma tupu ia Aikupito. O le faaupuga: *na te lē iloa Iosefa: e faatatau i le lē iloa faalemafaufau o galuega lelei sa faia e Iosefa mo Aikupito ma le Farao mumua.* E le faapea ua tauaso le tupu lea ua tulai mai, ae o le faafitauli ua ia le fia iloa ma fia manatua galuega lelei sa faia e Iosefa mo le manuia o Aikupito, aemaise lava i taimi o le oge lea na faasaoina ai le toatele o tagata Aikupito. O le mea ua tupu, ua faatupulaia le toatele o fanau o fanau a Iakopo/uso o Iosefa i totonu o Aikupito. Ua maitauina foi e le tupu ma tagata Aikupito, o ia tagata Isaraelu, o ni tagata malolosi tele. Ona tupu lea o le popole o le tupu, ina nei avea le toatele ma le malolosi o ia tagata Isaraelu e fai ma ala e faasaga tau mai ai ia te ia o le tupu ma pulea ai Aikupito i se taimi o i luma. O loo taua i le tusi faitau taumafaiga a Farao ina ia le gata e faaitiitia le malosi o ia tagata Isaraelu ae ua taumafai foi e faaitiitia le numera/aofai o tagata. E lua auala/togafiti na faia e Farao ma alii sili o Aikupito:

1. Ua faamamafa galuega faatino mo tagata Isaraelu – f.13-14.
2. Ua valaau i faatosaga ina ia fasiotia pepe tama uma o Isaraelu e fananau mai –f 15-22.

O igoa o faatosaga o loo taua i le tala: Sepela ma Pu’a. O igoa e mafai ona faauiga faatasi – *o le matagofie, manaia, la lelei.* E i ai le talitonuga, e toatele fafine faatosaga, ae pei o i laua e mafai ona faaigoa o taitai – leaders o faatosaga a le tupu o Farao. O loo finau nisi o tagata suesue, o Sepela ma Pu’a o fafine Eperu. Ae manatu nisi, o fafine Aikupito o loo fesoasoani e faafanau fafine Eperu. E toatele e lagolagoina lea manatu, ona o le mea lea ua fai e Farao. E i ai le manatu e faigata ia Farao ona faatonu ni faatosaga Eperu e faataunuu ana fuafuaga leaga ia ua fai, ae faigofie mo faatosaga Aikupito. O le valaau a le tupu, e le o se valaau lelei. O le valaau lē alofa, ina ia faaaoga le tomaitaleni

faatosaga e faataunuu ai lona manao e fasioti pepe tama o Israelu.

O loo manino i le tala, e lei faataunuina e faatosaga le valaau a le tupu. O le tala a le Tusi Paia –f.17: *ua matatau i laua i le Atua*. O le matau i le Atua, o lou iloa lea ona ava/faaloalo i le Atua. O le matautia o le mea lea e tupu ii, o faatosaga Aikupito ae ola matatau i le Atua o Israelu. O tagata e tapuai i atua mamate ae ola fefefe i le silafaga a le Atua. Na iloa lelei e Sepela ma Pu'a le sese o le faatonuga a le tupu. E ui o Farao o le tupu o Aikupito, ae ua sili atu lo la fefefe i le silafaga a le Atua o Israelu.

Fai mai le tali a Sepela ma Pu'a: O fafine Eperu e malolosi, latou te le moomia ni faatosaga. I le gagana Eperu, o le faatosaga/midwife e faamatalaina o le tagata e fesoasoani i le faafanauina o le fafine. A uma ona faafanau, o i latou e faataele le pepe ma tapena mea uma na fa'aaoga. E faataele e le tinā o le pepe, seia mautinoa ua lelei mea uma, ona faatoa tuu atu lea o le pepe i lona tinā. (*E fesootai foi ma le tatou faaSamoa*). O le tali a faatosaga o loo taua ai le upu – *malolosi o fafine Eperu*. E le malosi e fai galuega mamafa, a o le mafai ona latou faia galuega a le faatosaga e pei ona taua i luga. A o fafine Aikupito e moomia faatosaga. O le tali filemu lea na tali ai Sepela ma Pu'a i le ita tele o Farao. O loo manatu nisi o le pepelo le mea lea ua fai e fafine faatosaga, peitai, o le toatele o tagata suesue o le Tusi Paia, o loo manatu, o le tali lea mai le Atua. O le tali e le gata ua ola ma manuia ai Israelu, ae ua ola ma manuia ai foi aiga o faatosaga. O le tala a le Tusi Paia, na faamanuia le Atua ia Sepela ma Pu'a ma o la auaiga, ona o le galuega lelei na laua faia. E ui lava na toe fai le isi faiga lena – f.22, e faataunuu ai le manao leaga o le tupu, peitai e i ai le talitonuga e toatele atu i latou na faasaoina ona o le ola matatau o faatosaga i le Atua.

Tamaiti, o le mataupu o lenei aso, e mafuli i le faatauaaina o lou iloa ma le malamalama i le eseese o valaau poo faatonuga. O le faasinomaga lava o i tatou o tagata Kerisiano, o le fai o le faatonuga e lelei ma manuia ai tagata uma. Ae iai taimi o le soifuaga, e aafia ai tatou i ituaiga valaau/faatonuga ia ua faia ia

Sepela ma Pu'a. E valaau atu le faatonuga ao le faatonuga e le lelei. O se faatonuga ua faia i le malosi faataitai o le fai faatonuga, ae feteenai ma lo tatou iloa faa- tagata tali faatonuga. O le feau o lenei aso, o le faamuamua le ola matau i le Atua. Ia faamuamua le silafaga a le Atua. Ia tatou fefefe i le Atua ae aua i le tagata. Aua e i ai lava taimi e faaalii ai le amiotonu a le Atua. Po o a lava taumafaiga a le tagata e lepeti le amiotonu a le Atua, e le mafai. E tu matila lava le amiotonu a le Atua. Ia faatoilalo i a tatou filifiliga saoloto ma filifiliga amiotonu faiga piopio e ala mai faatonuga faataitai leaga. O nei aso ua tele valaau ma faatonuga amioletonu. Ae taua le a'oa'o mai o lenei tala, ina ia maua le lototele pei o Sepela ma Pu'a e tetee atu i ia faiga sese, ina ua tatou matatau i le Atua.

### **GALUEGA FAATINO:**

Faasoa manatu i le fesili ua saunia. A o a foi ni faatinoga o iloa ai ia ituaga valaau/faatonuga.

1. O le fesili faatupu manatu: O le a se maitau i le tatou siosiomaga lenei tatou te iai, faamata o i ai ni faatonuga faapea o tutupu ai? O le valaau po o le faatonuga e fai se mea sese e fa'aaoga ai ni agavaa faapitoa o tagata?
2. Silasila ane i le faatonuga e faia Lafoga a faifeau pe le o aafia i le ituaiga valaau lea a Farao.
3. O le tali a Sepela ma Pu'a ia Farao: f.19 – O le tali mai le Atua. E faapefea ona faamaonia lea manatu?

**PESE:** *Fai mea tonu, o mea lelei....*

### **A'OA'OGA:**

1. Ia fai le amiotonu ae le o le amito piopio ma faatonuga sese.

2. Ia ola matatau i le Atua e manuia ai mea uma tatou te faia.
3. Ia avea taleni o se faamanuiaga i lou aiga.

.....

**ASO SA: 23 IUNI 2019**

**MATAUPU: UA NA O SI LOOMATUA LAVA O ANA.** (*It's only old Anna*)

**SINI:** Ia malamalama le vasega i le faataua a Ana i lona olaga ua mafua ai ona nofo na o ia.

**TUSI FAITAU:** Luka 2:21-36-38

**FESOASOANI MO FAIAOGA:**

I le aganuu lava ia faa-Iutaia, o fafine ma fanau teine e tau lē amanaia i totonu o sosaiete. O le talitonuga masani lava, o fafine ma fanau teine, e le au lo latou gafa i measina – fanua ma suafa o aiga. E iai le taimi e suia ai o latou faai'u pe a faaipoipo. O nisi o taimi e faasinoinomia fafine ma fanau teine pe afai e leai ni taitoalua, leai ni fanau, tetea ma le toalua ma leai se galuega poo se aiga e nofo ai. E moni lava e foliga faapea le tele o isi aganuu i le va feagai ma fafine/fanau teine, peitai o Iutaia e ese le malosi o le mea lea o le lē amanaia o fafine/fanau teine e i ai tulaga faapea e pei ona taua i luga. E oo a foi i tofiga ma galuega, e muliai lava ni tofiga mo fafine/fanau teine poo le leai foi o ni tofiga e agavaa i ai.

O le mataupu o lenei aso o loo taua ai le fafine e igoa ia Ana. I suesuega o le Tusi Paia, ua faamauiina ai o le igoa Ana o le faaliliuina faa-Eleni lea o le igoa Hana le tina o Samuelu (1 Samuelu1-2). O lona faauigaina: *O le Alofa - Grace*. I le

faamatalaga a Luka, o loo iloa ai o Ana, ua 84 tausaga le matua. Ua oti lana tane. E leai se fanau. E leai foi sona aiga o faamatalaina mai le tala. O ia o le perofeta fafine. I le faatinoina o galuega faaperofeta i le Tusi Paia, e foliga tutusa uma perofeta tamaloloa ma perofeta fafine. O perofeta latou te faailoa le finagalo o le Atua mo tagata uma. Peitai, o le vaai faale -- tagata ma faiga masani i totonu o faalapotopotoga e tele ai lava ina mafuli le faataua i perofeta tamaloloa ae itiiti le faataua i perofeta fafine. O le tasi lea o mafauauga ua manatu nisi e mafua ai ona faamatala faatasi Simeona ma Ana i le vaega lea o le tala Luka. O le taofiga o loo i ai, o Ana e fesoasoani ia Simeona.

O loo taua i le tala: *e lei alu ese Ana mai le malumalu -f37*. O le uiga o ia upu: e le faapea sa nofo mau Ana i le malumalu. O le faaupuga e iloa ai le faamaoni o Ana i le ola tatalo i le falesa. *...e lei alu ese*. O lona uiga, e le'i misi Ana i le falesa i le faatinoga o ona tiute faaperofeta.

O le mataupu o lenei aso, o loo faataua ai le faamuamua a Ana i lona va fesootai ma lona Atua. I le tala sa faitauina, o loo manino ai le faamuamua pea e Ana o le Atua i lona olaga atoa. E le'i avea le nofototasi, o le matua o le soifua, leai se fanau ma le leai o se aiga o Ana e fai ma ala e faavaivaia ai lona ola mafuta i le Atua e ala i le tatalo ma anapogi. I le vaai faalemafaufau ia Ana ma lona faamatalaina i le tala a Luka, o Ana e mafai ona tatou faapea ifo, e aofia i fafine e faasinoinomia i le sosaiete o tagata Iutaia ona o mafuaaga e pei ona taua. Peitai, e lei avea lona ma ala e taofia ai Ana mai le mafuta i le Atua e ala i lona valaauina. E leai ni faamaumauga i upu poo ni tala na tautala ai Ana ao faia lana galuega faa-Perofeta, peitai o loo tautala ana faatinoga na faia. E le taumate le faatutu gata o Ana aua ua matua le soifua. Peitai, na iloga lona faamaoni. O le faamaoni lona o Ana lea lava ua ia molimauina le taimi ma le ituaso na aveina ae ai Iesu e ona matua i le malumalu e tusa o le tu ma aga faa-Iutaia f.21 – *Ua oo i le aso valu e peritome ai Iesu*. O faiga faa-Iutaia uma e faatatau i fanau tama, na faia lava e Maria ma Iosefa mo Iesu e ui o ia o

le Atua liutino tagata. E taunuu atu Iesu i le malumalu ma ona matua o loo i ai foi ma Ana faatasi ai ma Simeona. O i laua ia na molimauina lea vaaiga taua, ma ua molimau foi: o Iesu o le Mesia –f.29-35. O le tasi lea itu taua o le tala, o Ana ma Simeona o tagata Iutaia: ao lea ua fai ma molimau maumaututu o Iesu o le Mesia na valoia mai le Feagaiga Tuai mo Isaraelu ma le lalolagi.

Tamaiti, o le faamanatu o lenei tala, *ia faamuamua le Atua i so o se mea tatou te faia*. Tusa lava pe faatauvaa so tatou iloa pe a faatusatusa i isi tagata, o le mea sili, o le lotu ia faamaoni ona mafuta i le Atua. E pei ona a’oa’o mai le olaga o Ana, e le’i avea le vaai maualalo o tagata ia te ia ma ala e taofia pe faaititia ai lona ola mafuta i le Atua. Ae pei ona taua i le Tusi Paia: *e lei alu ese mai le malumalu o le Atua*. Ia tatou toaaga e o i le lotu ma o i le falesa. O le falesa o le maota o le Alii. E maua ai le malosi faasili i le tino, mafaufau ma le agaga aua lo tatou valaauina i so o se galuega.

#### **GALUEGA FAATINO: Faasoia ma Talanoa**

1. O le vaai faa-Iutaia i fafine ma tamaiti e le aloaia lo latou tulaga i totonu o Sosaiete. Aemaise o fafine nofotoatasi, leai se fanau, leai se talaaga o se aiga e pei o Ana. O le fesili: o le a se vaai a le au Kerisiano i fafine ma tamaiti? – Fa’aaoga mai ni mau o le Tusi Paia e lagolago ai le finauga.

**PESE:** *Ou te tumau ma pipii mau, Satani taumafai e liliu ese au.....*

#### **A’OA’OGA:**

1. Ia faamuamua le Atua i mea uma, tatou te maua ai faamanuiaga e tele.
2. Ia toaaga i le lotu e faalogologo i Afioga Paia a le Atua e faatuputeleina ai le ola faaleagaga.

3. Aua le fuatia la tatou auaunaga i le vaai a tagata ma le faamasino mai. Ae ia faia mea uma mo le viiga o le Atua.

.....

**ASO SA: 30 IUNI 2019**

**MATAUPU: TUTUMAU I LE FILEMU**  
*(Staying in the peace)*

**SINI:** Ia a’oa’oina le vasega, ia manino ma malamalama lelei i le uiga ma auala e savavali ai, ina ia tutumau i le filemu, e maua ai le nofo lelei ma le nofo fealofani.

**TUSI FAITAU:** Luka 8: 26 – 39

#### **FESOASOANI MO FAIAOGA:**

A tatou mafaufau i le mataupu o lenei Aso Sa, e foliga mai o se timaiga po o se lapataiga, ma se faamalosiā’u, ina ia tutumau i le filemu. Ma o le finagalo tonu lea o le Atua, e ala i a’oa’oga a Iesu, ina o i ai i le lalolagi. Lea foi o loo faailoa manino mai i se vaega o lana lauga faa-amuia i luga o le mauga; *“Amuia e faatupuina le filemu, auā e taua i latou o atalii o le Atua.”*

O le filemu, o le toamalie ma le lē gaoia, e le popole vale, e le vevesi ma faatupu faalavelave, ae filemu mea uma. I vaega o le tusi a Luka 8: 26 – 39 sa tatou faitauina nei, o loo faailoa manino mai ai le taunuu o le malaga a Iesu ma ona so’o i le nuu o Katara, ae fetaiā’i ai ma le tagata ua ia te ia temoni, ua leva ona lē ofu, ua lē nofo foi i se fale, a o le mea e i ai tuugamau e nofo ai. O lona uiga, ua leva ona le maua se filemu e si nei tagata, auā o loo faatafiti lava e temoni. Ma o loo manino lelei i le tala, le gaoiga a le tagata lea na fai ina ua vaai mai ia Iesu. Ua

alaga mai ma le leo tele ma sau faapau i luma o Iesu ma faapea; Se a lau na ia te au nei Iesu e, o oe na le Alo o le Atua silisili ese. Ou te aioi atu ia te oe, aua e te faatiga mai ia te au.” O lona uiga, ua lē o le tagata lea ua faaviivii mai ia Iesu, a o le temoni lea ua faaviivii mai Iesu, aua ua iloa lelei e le temoni, e leai sona paoa malosi e tete’e ai ia Iesu. Ua silafia lelei e Iesu, ua leva ona faapologa lenei tagata e temoni, auā na fesili lava Iesu i le tagata lea, poo ai lona igoa? Ae tali mai, o Lekeono o lona uiga, e toatele temoni o loo ulutino i lenei tagata. E pei ona faailoa mai i le ff 29; Aua ua atu lasi ona pue ia te ia, ua fusifusia o ia i maea uamea ma mea e faamau ai vae ua leoleoina ai o ia, a ua motumotusia maea ia te ia. O le finagalo o Iesu, ia maua e tagata uma le filemu. E lei logo vii Iesu i le faaviivii mai a temoni. Leai, lea lava na aioi temoni ia Iesu e pei ona faailoa mai i le ff 31. “Aua le fetalai o ia ia te i latou e o i le fafā, ua faanoi mai foi temoni ia Iesu, ia tu’u i latou e ulutino i le lafu puua. Ona o lea i fafo o temoni mai le tagata ua ulutino i le lafu puua, ona feosofi ifo lea o le lafu puua i le tofē i le vai, ua malelemo ai. Lea ua faailoa manino le mamalu silisili ese ma le pule aoao a le Atua, ua auala mai i lona Alo pele e toatasi ma Lana galuega e fai i le lalolagi. I le ff 34 – 35. Ua iloa e e sa faga puua le mea ua faia e Iesu, ona sosola lea ma tala atu i aai ma faoa aai. Ona latou o mai lea ia Iesu ma latou iloa ai le tagata na ulutinoina e temoni o loo nofo i vae o Iesu, ua ofu ma ua atamai, ona latou matatau ai lea. I le ff 38 – 39 o loo faailoa manino mai ai le aioiga a le tagata na ulutinoina e temoni ia Iesu, ina ia la faatasi. Ao le tali a Iesu; *“Ina alu atu ia oe i lou aiga ma faamatala atu i ai mea tetele ua faia e le Atua ia te oe.”* Tatou le fanau, lea ua toe faamanatu mai le tatou mataupu o lenei Aso Sa, ina ia “Tutumau i le Filemu” aua o le finagalo moni lea o le Atua mo i tatou uma. ‘Aua tatou te logovii pe a faaviivii mai nisi ia te oe, ae mafaufau lelei ma tatalo i le Atua e fesoasoani mai. O nei aso, ua matua ma’ale’ale ona o le tele ma le anoanoa’i o tu ma aga mai fafo, ua fesouaina ai lo tatou olaga taumafai. O a la ni fita, o ni faafitauli, o ni faaosososga o le soifuaga e te lua fetaiiai, ia mafuta pea i le Atua i le tatalo e le

aunoa i aso uma, o iina e te maua ai le faamafanafana ma le loto tele ma e tutumau ai i le filemu, ma e taumafai ai ma tauivi ina ia e maua le sini o le faamoemoe o matua, aua sou lumanai manuia.

**GALUEGA FAATINO:**

O le a tuu atu pea i lau susuga i le faiaoga, mo ni nai fesili e tulituliloa ai le mataupu, ina ia mautinoa, ua malamalama lelei le vasega.

**PESE:** Pese ma viiga 91.

**A’OA’OGA:**

1. ‘Aua e te logo vii, pe a faaviivii mai nisi ia te oe.
2. A popole ma atuatuvaletale, tatalo i le Atua e maua ai lou fesoasoani.
3. Ia tatou lagonaina pea le tutumau i le filemu, auā o le finagalo moni lena o le Atua.

.....

**ASO SA:** 7 IULAI 2019

**MATAUPU:** MATA E VAAI, TALIGA E FAALOGO  
*(Eyes that see, ears that hear)*

**SINI:** Ia malamalama le fanau i le eseese o le vaai ma le faalogo o mata ma taliga faaletino, ma le vaai ma le faalogo o mata ma taliga o le loto.

**TUSI FAITAU:** Luka 10: 17 – 24

## FESOASOANI MO FAIAOGA:

O le fuaiupu 23 – 24, o loo aumai ai le manatu autu o le mataupu mo le Aso Sa lenei. O le tala masani lenei i le auina atu e Iesu o le au so’o, e faamalolo i e mama’i ma talai atu le Tala Lelei e uiga i le malo o le Atua. A o le mataupu foi lenei o loo aumai ai le taiala tonu, o le avea ai o le tagata ma so’o o le Alii, ia vaai ma faalogo mata ma taliga o le lotu ma talia le Alii, ona avea lea ma so’o.

Tele aso ma taimi na mafuta ai Iesu ma ona so’o, ae le gata i lea o e sa mulimuli ma le lotu atoatoa i le Alii. Ua latou vaai ma faalogo i vavega ma a’oa’oga a Iesu, e uiga i le silisili ese o le Atua ma lona malo. O le taua lea o le taimi ua mafai ai ona feofeo’i le tagata agasala ma le Faaola i le lalolagi. O le mafuaaga tonu lea na mafua ai ona fetalai le Alii i le fuaiupu e 23 – 24 (faitau e le vasega fuaiupu ia)

Mata e vaai, (Eyes that see) E le tau fesiligia le taua o mata o le tino, o le vaega lea tatou te vaai ai i le matagofie ma le felanulanuai o mea o le natura na foafoa e le Atua. Ae le gata i lea, o mea na fausia i le mafaufau o le tagata. E vaai mata ae faatulaga e le mafaufau le uiga ma le taua o nei mea e vaaia. O le upu moni e i ai taimi e faigata ai ona malamalama le mafaufau i uiga o mea e vaaia e mata. A o le taimi foi, ua malamalama le mafaufau, ae ua lē fia pupula ma iloa e mata. Ia taulai le vaai i le Alii, ona faapupulaina ai lea o mata o le lotu. A pupula mata o le lotu, ona malamalama lea i le finagalo o le Atua, o loo fetalai mai ai i mea uma o le siosiomaga po o le natura.

Taliga e faalogo (Ears tha hear) O upu e faalogo ai, e agai foi i le mafaufau, e faatulaga ma faavasega ai uiga o upu ma o latou taua, a mautinoa ma malamalama ona teu lea i le lotu. Ia faalogo ma usita’i. E le faigofie foi lea vaega, aua foi e i ai upu tatou te talia, ae i ai foi upu tatou te le talia. Ese le faigofie ona uai o tatou lotu i upu matagofie ma le suamalie e ao ona faalogo ma talia atoatoa o le upu a le Atua, e ala ia Iesu Keriso. Ia tuu le

upu lea i le lotu ma teu fatu ai, o le upu o le faatuatua mo le ola e faavavau.

Ia vaai ma faalogo ma talia ma le lotu atoatoa le Alii, ona mafai lea ona tatou faia o so o se vavega, ma mea e le mafaia i le tatou malosi ma le tatou poto faaletagata ona faia. O le Atua o lo tatou malosi lilo lea, e tafia uma ai mea leaga o le ola nei.

## GALUEGA FAATINO:

Faatino le tala (10 mins)

### A’OA’OGA:

1. E taua le talia i le lotu, ae le na o le vaai ma faalogo ae le faia le finagalo o le Atua.
2. E fa’aali ma fetalai mai pea le alofa o le Atua i aso uma, i mea o le natura.

.....

**ASO SA:** 14 IULAI 2019

**MATAUPU:** IA MATAALA (*Be on your guard*)

**SINI:** Ia malamalama le vasega, ia sili ona mata’u le tagata i le Atua nai lo o le matau i isi tagata.

**TUSI FAITAU:** Luka 12: 1 – 12

## FESOASOANI MO FAIAOGA:

O le upu mata’u o loo faaliliuina mai le upu faa-Peretania “fear” o lona uiga o le fefe. O se tasi lenei o lagona sili ona malosi pe a oo i le tagata, o le fefe, aua foi e tupu mai ai ma le popole, atuatuvaale ma le lē mautonu. A o le upu moni e le mafai ona



aveesea lenei lagona mai le tagata. O se lagona ua tele ina vaivai ai le tagata ma oo ai ina le taunuu ai mea taua sa naunau le loto e faatino. O se auupega malosi a le tiapolo, e oo ai lava ina oo le mafaufau o le tagata i le oti.

A o le oti foi i le tino, o se tasi lea o luitau malosi na te aumaia le fefe i le loto o le tagata. A o lea ua fetalai Iesu, “Aua tou te matatau ia te i latou o e fasioti i le tino.” Aua nei matau le tagata i le oti o le tino, ae ia mataala i e manao e fasioti i le agaga. O le uiga tonu lea o le fetalaiga a le Alii, aua foi a oti le agaga, ona leai lea o se aoga o le ola. A oti le agaga ona vavaeseina lea o le tagata mai le Atua, o le faapogai lea o le ola.

E le tau faamatalaina le tiga ma le faigata e oo i le tagata pe a oo mai le oti. O le oti lava ia, o se mea ua iloga lona aumai o le fefe ma le popole i le ola o so o se tagata. Aua o le manatu masani ma o le faamatalaina lava lea o le oti. “O le gataaga o mea uma o le ola.”

E muta mea uma o le tino nei, a o le Agaga o le Atua e leai sona gataaga. Ia sili ona matau le tagata i le Atua, aua o ia e ou le ola, “O au, o lē ola ma e ola lava.” E leai se oti i le Atua. O le mea foi lea na fetalai ai Iesu; “O au nei o le toetu ma le ola, o se faatuatua mai ia te au, e ui ina oti, ae ola pea ia.”

O le tiapolo lava ia e taumafai e faaleaga le tagata i le tino, mafaufau, ae a manumalo loa i o tatou loto, ona oti ai lea ma le agaga. Ia tatou mataala i le tiapolo ma ana mailei. E i ai taimi e matagofie ai le tiapolo ma suamalie ana upu faatosina, o le matagofie ma le suamalie lea, ua tele ina fano ai le tagata.

O suiga o le olaga i lenei vaitau, tele ia o suiga aoga, a o nei foi suiga, ua oo ai foi le malamalama o le tiapolo, ma ua tele ina faaseseina ai tagata. Ia mataala, “Be on your quard.” Ia mataala oe ia te oe, mataala i lou aiga, o lou a’oa’oina. A tumau le loto i le Atua ma le faamaoni, ona le tulimoe lea o le tagata.

### **GALUEGA FAATINO:**

E manaia pe a tuu le avanoa i tamaiti e lisi mai ai ni mea sa fefe ma popole ai i totonu o le aoga po o le aiga. Ona faasoia lea ma

lau susuga i le faiaoga ni auala e foia ai nei faafitauli, pe fesoasoani ai foi i le fanau.

### **Faataitaiga**

Aoga - pasi suega - Fesoasoani  
- toaga e fai mea aoga

Aiga - ua tuli ma le aoga - Fesoasoani  
- tautala ma le faamaoni i matua

### **A’OA’OGA:**

1. Ia sili ona matau i le Atua, aua o Ia e ou le ola.
2. Ia mataala i le matagofie o le tiapolo.
3. E leai se oti i le Atua.

.....  
**ASO SA: 21 IULAI 2019**

**MATAUPU: AVANOA ITIITI UA SAO AI**  
*(By the skin of my teeth)*

**SINI:** Ia malamalama le fanau e tutupu pea mea tiga ma puapuaga i le ola tusa lava po o le tagata ua sa’o ona ala i luma o le Atua, ae a tumau ma faamaoni i le Atua, e iu i le manumalo.

**TUSI FAITAU:** Iopu 19: 1 – 22

### **FESOASOANI MO FAIAOGA:**

O le mataupu 19, o loo tali atu ai Iopu ia Pilitati o se tasi o ana uo. O le tali a Iopu o loo tau mai ai mea u puapaugatia ai lona

loto, ae o loo tau mai ai foi ma le tumau pea o lona talitonuga ma lona faatuatua i lona Atua. E leai se tagata e tutusa mafatiaga ma tiga na oo i ai e pei o Iopu. O le ma'i papala ua lilofia ai lona tino, o mea uma sa ia te ia, o lafu manu, o le tamaoaiga, e oo lava i lana fanau, na aveeseina uma. O mea ia ua fai ma avega mamafa i le mafaufau o Iopu. Aisea ua pologa ma puapuagatia ai, ao ia o le tagata faamaoni i le Atua.

E oo foi la i ana uo, ua latou faifai ia te ia, o lona toalua ua pei o se tagata ese ia te ia, ua inoino tagata ia te ia. O puapuaga ia ua mafua ai ona aioi Iopu mo se na te aumaia le toamalie ma le filemu i lona lotu. Ae ui lava i nei mea uma ua tutupu i le ola o Iopu, ae e lei aveeseina ai lona lotu mai le Alii, "Aua ua ou iloa, o loo soifua le na te togioia au." Upu ia o le faatuatua iloga ona manino ai le faamaoni atoatoa o le lotu ma le talitonu o Iopu i lona Atua. Ua le sili ona tiga, o lana fanau, o ana uo, o lona toalua, ma mea uma sa ia te ia i lona Atua o lona faaolataga lea. "Avanoa itiiti ua sao ai," (mai le pau o ou nifo). O lona uiga moni, ua faasaoina Iopu ona o lona alofa faamaoni i le Atua. O lona faatuatua ua atoatoa lea mo le Alii. O ia o le tagata amiotonu. Pe oti le tino, aveseina le manuia faaletino, ae ia sao pea lona lotu mo le Alii.

Tele ia ona tatou faafitia le Alii, pe oo mai puapuaga i lo tatou ola, ua tuu fesili po o fea le Atua, pe i ai foi se Atua. O le natura lava lea o mea o le olaga nei, o taimi ua lelei, o taimi ua leaga. Ia malamalama foi, pe avea lava i tatou ma Kerisiano ma tagata faatuatua, e oo mai lava puapuaga ma mafatiaga i lo tatou ola. Ae a faatumauina malosi o tatou lotu i le Atua, ona faasaoina lea o le ola e le Alii.

### **GALUEGA FAATINO:**

Faatino le tala.

### **A'OA'OGA:**

1. Tumau ma le lotu atoa i le Atua.

2. E le tumau pea tiga o le ola nei.
3. O le talia o puapuaga e oo ai i le olioli

.....

**ASO SA: 28 IULAI 2019**

**MATAUPU: MATA I LE MATA** (*Eye for an eye*)

**SINI:** Ia malamalama tamaiti i le leaga o le ola tau masui e le maua ai se filemu, a o le tau o le leaga i le lelei, o le alofa lea e faavae mai i le lotu, e maua ai le filemu.

**TUSI FAITAU:** Mataio 5: 38 – 40

### **FESOASOANI MO FAIAOGA:**

O le "mata i le mata" o le tulafono o loo aofia i totonu o tulafono a Iutaia e faaigoaina, "Tulafono o le tau masui" (law of retaliation). O le auga tonu o leni tulafono, o le faatumauina lea o le nonofo lelei i le va o tagata, (civil law). Ia tutusa ma talafeagai le faasalaga e faia i le ituaiga soiligatulafono ua faatino. O le "mata i le mata, nifo i le nifo, oti i le oti, toto i le toto." (Esoto 21: 23 – 25) O tulafono ia sa fa'aoga e Isaraelu le taimi o le Feagaiga tuai, le taimi sa tau faavae ma faatulaga ai e ona taitai le nuu.

O le afio mai ai o Iesu, ua manatu ai nisi, ua afio mai le Alii ina ia sui le tulafono. E lei afio mai Iesu e suia le tulafono, ae ina ia faamalosi le tulafono i lona uiga moni ma le tonu. Ia avea le tulafono e fai ma auala e maua ai lea filemu moni. O Iesu o le atoatoaga lea o le tulafono. O le atoatoaga la o le tulafono ia Iesu, o le alofa, le tulafono sili lea, (law of love). O le tulafono

e faavae mai i le loto. O le upu moni, a tatou fa'aaogaina le tulafono o "le tauimasui, e leai se filemu e maua ai. Sei vagana lava, ua maua le filemu i o tatou loto. O le tulafono o le alofa, "Ia e alofa atu i e ua fai i tatou mo latou fili, po o e foi ua fai mo tatou fili."

E le faigofie le tulafono o le alofa ua a'oa'o mai ai le Alii. Aua so o se mea leaga lava e fai e se isi ma faatiga ai i le isi tagata, o le tau lava i le leaga lagona ma manatu e oo mai. Ia tau lava i le leaga i le lelei, a po mai liliu i ai le isi alafau. A ita mai alofa atu i ai. O le uiga tonu o nei fetalaiga a le Alii, a faatiga ma agaleaga mai, savali ese faamagalo atu. E le faigofie, ae pau lea o le auala tatou te maua ai le toamalie ma le filemu moni mai le Atua.

#### **GALUEGA FAATINO:**

E lelei pe a faamalosia le vasega e ao faatauloto le Mataio 5: 3 – 12. Ona faamanatu lea i aso sa taitasi pe a amata le vasega i taeao.

#### **A'OA'OGA:**

1. Aua le ola tauimasui
2. Tau lava i le lelei.
3. Alofa atu i e o ita mai.

.....

**ASO SA: 4 AOKUSO 2019**

**MATAUPU: AFI MU SAESAE** (*Wild fires*)

**SINI:** Ia malamalama tamaiti o le laulaufaiva e mafai ona faatusaina o se afi itiiti e ono tupu mai ai se mea tele, faapei o se afi musaesae.

**TUSI FAITAU:** Iakopo 3: 1 – 12

#### **FESOASOANI MO FAIAOGA:**

O le mataupu o lenei Aso Sa, e faatatau lea i nai mea iti e mafai ona liliuina ai, ia pe avea foi ma afuaga poo amataga o ni mea tetele. Ua tatou iloa i vaa tetele i le sami, e mafai lava e si foeli itiiti ona liliuina le vaa atoa agai i le itulagi e finagalo i ai le kapeteni. E faapena foi i le manu o le solofanua, e mafai lava e le faagutu ona faatonutonu lona tino atoa. E faapena foi i le laulaufaiva, lea e faamamafa i ai le tatou mataupu o lenei Aso Sa.

O le laulaufaiva o se tasi lea o vaega o le tino e pito i sili ona laitiiti, peitai e tele lava sona taua, atoa ai foi ma sona aafiaga i le tagata. A leai se laulaufaiva, e le mafai ona tautala le tagata. Ua mafua la ona faatusaina le laulaufaiva i le afi, ona o upu leaga e tautala ai le tagata o upu e ono tutupu ai maseiga po o feeseeseaiga i le va o le tasi tagata ma le isi. O le ala lea e alagata ai ona tautala ma le ava atoa ma le migao le tagata. O upu lelei e tautala ai le tagata e iu lea i le fiafia ma le manuia, ae afai e tautala i upu le lelei ma le faatupu vevesi, ona avea loa lea o le laulaufaiva e pei o se afi itiiti e mafai ona tupu mai ai se afi mu saesae e pei o afi e ono faatamaiaina ai vaomatua poo togavao. O afi e matua faigata ona tineia. E mafua mai lava i upu e tautala ai le tagata. O le upu moni, ua toatele ua maua le poto ma faamanuiaga e tele ona o le lelei a'oa'oina i upu na foafoaina mai ai ao laiti se ia oo ina matutua. O le taua lea o le tautala i upu lelei ina ia tapu'e ma a'oa'oina ai fanau ina ia i'u lelei o latou olaga. Ia fiafia i upu lelei e maua ai le ola ma vivii ai i le Atua, ae le o le faatupu fua o tala e afaina ai fua ma tupu ai le vevesi i le va o uso.

#### **GALUEGA FAATINO:**

Taliga Fesili:

1. Aisea ua faatusaina ai le laulaufaiva o se afi itiiti?  
Tali: Aua foi a lē lelei ona pulea o le laulaufaiva i upu e tatala ai ma ua tulai mai ni vevesi, ona faatusaina loa lea o le laulaufaiva o se afi itiiti na tupu ai se mu matautia e pei o mu i togavao.

2. O le a se faamoemoe taua o upu lelei e tautala ai le tagata?  
Tali: O upu lelei e a’oa’oina lelei ai fanau, e mafai ona avea ma vaifofo o ni faafitauli avea ma a’oa’oga sili i fanau, aemaise ia tupu ai pea le ola faatuatua ma le ola vivii i le Atua.

3. O a ni aafiaga o le so’ona tautala ma le lē migao?  
Tali: E aafia le va lelei o uso, ma tulai mai ai vevesiga ma fe’eseeseaiga i le va ma isi tagata, aemaise foi i le va tapuia ma le Atua.

**PESE:** Le Alii e lau afioga

**A’OA’OGA:**

1. Mafaufau muamua ona tautala ai lea.
2. Ia fiafia e faatupu le filemu
3. Ia naunau e vivii ma tapuai i le Atua.

.....

**ASO SA:** 11 AOKUSO 2019

**MATAUPU:** **MULIMULI I LE TAITAIGA A LE ATUA** (*Following God’s lead*)

**SINI:** Ia a’oa’o tamaiti ia fiafia e mulimuli i mea lelei uma ua faasino mai e le Atua, auā o mea ia e taunuu ai i le manuia.

**TUSI FAITAU:** Teuterenome 1: 6 – 11

**FESOASOANI MO FAIAOGA:**

O le isi lea faamoemoe o le tusi lenei o Teuterenome, e faamanatu ai pea i tagata mea uma na faia e le Atua. E le gata i lea, a ia faamalosiā’u i tagata ia faataua le ola mo le Alii, e ala i le usita’i ma ofoina atu le malosi atoa e auauna ai mo le Alii.

Ao i ai le nuu o Isaraelu i le itu i Sasae o Ioritana e sauni ai e ulufale i Kanana, sa toe faamanatu ai e Mose fetalaiga uma a le Atua na ia ta’u ia Mose e faailoa atu i lona nuu, a o i ai Sinai. O i tonu lea na osi feagaiga ai le Atua ma lona nuu (Esoto 19: 20). O le faamoemoe ma le autu lea o le toe faamanatu ai e Mose i le nuu o fetalaiga ma folafolaga a le Atua mo lona nuu. E ao lava ona manatua e tagata uma, ina ia ola ai ma savavali tonu ai ia tusa ma le faasinomaga a le Atua sa ia tauto ai i o latou auga tamā, o Aperaamo, Isaako ma Iakopo, ina ia fai mo latou tofi le nuu o Kanana.

O le faamoemoe lava foi lea e tasi, o le Atua mo i tatou uma. Ia manatua e le tagata le na faia o ia. O le ala lea e ao ai ona o tatou savavali i le faasinomaga ma taitaiga a le Agaga ua a’oa’oina ai tatou ina ia o tatou taunuu i faamanuiga ua ia folafola mai mo i tatou i Kanana. O le ola lava lea e faavavau. E taua le usita’i ma mulimulitai i faasinomaga ua aumai ma afioga a le Atua tatou te ola ai ma manuia ai.

**GALUEGA FAATINO:**

Tusi mai tulafono e 10 (na tuuina e le Atua ia Mose, ia ta’u atu i lona nuu)

**PESE:** Ua ou filifili e mulimuli ia Iesu

**A’OA’OGA:**

- 1. Ia faalogo ma usita’i i faasinoga a le Atua.
- 2. Ia faalagolago i le Atua i mea uma.
- 3. E fiafia le Atua i le alofa.

.....

**ASO SA: 18 AOKUSO 2019**

**MATAUPU: ISARAEU E, FAALOGO MAI**  
*(Hear, O Israel)*

**SINI:** Ia malamalama tamaiti i le finagalo o le Atua e pei ona faamanatu e Mose i le nuu o Isaraelu ina ia savavali ai ma ola ai.

**TUSI FAITAU:** Teuterenome 5: 1 – 5

**FESOASOANI MO FAIAOGA:**

O loo manino mai lava i le amataga le valaauina ai o Mose e le Atua e alu e aveese mai lona nuu sa nofo pologa i Aikupito. O Mose lava la o ia o le ta’ita’i i le malaga ese mai o le nuu mai Aikupito. Ua silafia foi, na faaumiumi e le Atua le malaga a le nuu i le vao mo le 40 tausaga ona o le lē usitai ma le lē faalogo i le Atua.

O lea ua i ai le nuu i le itu i Sasae o Ioritana, e sauni ai e ulufale atu i Kanana le nuu na folafolaina e le Atua e fai mo latou tofi. Ua mavae atu tupulaga na malaga ese mai Aikupito, peitai, o tupulaga ia na soifua ma ola ae i le taimi o le malaga o le nuu i le vao, lea ua sauni e ulufale atu i Kanana. O le galuega faata’ita’i lea o loo faia e Mose, o le faamanatu pea i le nuu o poloaiga aemaise o tulafono na tuuina mai e le Atua ina ia mulimulitai ma tausisi i ai tagata uma, a o lei tuvae ma ulufale

atu i le nuu na folafolaina. Ia manatua e le nuu le taua o le feagaiga na o latou osia mo le Atua i le mauga o Horepa.

O Mose lava na tu i le va o le nuu ma le Atua. Auā sa matuā fefefe le nuu i le faailoa mai o le Atua ia te i latou e ala i le afi. O lea la ua toe faailoa e Mose i le nuu le finagalo o le Atua a o sauni ai le nuu e ulufale atu i Kanana. A o se faamanatu foi lea mo i tatou uma o fanau a le Atua. O le Atua e osi feagaiga ma faamaoni i lana upu. Ia faapea foi i tatou ona o tatou faamaoni ma tausisi i poloaiga e ala i le upu a le Atua ua taitaiina ai i tatou, aemaise o lo tatou ola ofoina atu faatasi ai ma lo tatou ola valaauina mo le Atua ma lona finagalo, e taua le faalogo i le upu a le Atua, ma ia talia lelei ma faatino e tusa ai ma lona finagalo Paia e manuia ma ola ai tatou.

**GALUEGA FAATINO:** Tauloto

- (1) Ia taitasi ma tauloto mai tulafono e 10.
- (2) Faamatala mai po o le a se taua o tulafono i le olaga o le tagata.

**PESE:** Ia faalogologo atu

**A’OA’OGA:**

- 1. Ia fiafia e faalogo, talia, ma faatino le finagalo o le Atua
- 2. Ia faamaoni ma tausisi feagaiga ma le Atua.
- 3. E i’u leaga le lē faalogo.

.....

**ASO SA: 25 AOKUSO 2019**

**MATAUPU: FAASOLOGA O MALO**  
*(Table of nations)*

**SINI:** Ia malamalama tamaiti i uiga o nuu o igoa o loo ta'ua, faatasi ai ma le faasologa o malo o loo i le Tusi Paia.

**TUSI FAITAU:** Kenese 10: 1 – 5, 21 – 32

### **FESOASOANI MO FAIAOGA:**

O loo manino mai lava i le Kenese 9: 1, faamanuia a le Atua mo Noa ma lana fanau. Na tuuina foi i ai e le Atua le pule i meaola uma e fai ma a latou mea e ai, atoa ai ma tulafono e ao ona usita'ia e i latou. Na faailoa foi e le Atua ia Noa o le nuanua o le faailoga o le feagaiga o le a le toe oo se lolo i le lalolagi.

O igoa o le fanau tama e toatolu a Noa, o Semu, Hamo, ma Iafeta. O le finagalo o le Atua ia tupu ma fanafanau i latou, ma ia tumu ai le lalolagi. O le tusi sa faitauina o loo taua mai ai fanau a fanau a Noa na maua ina ua mavae le lolo. O Semu na tupuga mai ai sa Eperu. O Eperu na tupuga mai ai e toalua o Peleko ma Ioketana. O le uiga o igoa o Peleko o le vaevaeina (division), aua o ona po ia ua vaevaeina ai le lalolagi, faapea foi ona faeseeseina e le Atua gagana a tagata sa o latou fausiaina le olo i Papelu. Atonu o le auala lava lea na finagalo i ai le Atua, ina ia taunuu ai lana folafola ina ia uluola ma fanafanau i latou ia tumu ai le lalolagi. O nisi nei o malo na tutupu mai i fanau a Noa. O Semu na tupu mai ai sa Eperu ia po'o Iutaia, faatasi ai ma Kaletaia, Asuria, Peresia ma Suria lea foi na tupuga mai ai Aperaamo, Tavita e tau mai lava ia Iesu. O Hamo na tutupu mai ai sa Kanana, Aikupito, Filisita, sa Heti ma sa Amori. O Iafeta na tutupu mai ai le malo Eleni (Greek) e aofia ai ma le atu Europa faatasi ai ma Asia itiiti (Asia minor). O le faasologa lea o malo e pei ona taua mai i le Tusi Paia. Ae o le taua lea o le vaevaeina ai e le Atua o malo eseese o le lalolagi ina ia iloa e tagata ona atiae i latou, faatasi ai ma le fa'aaogaina tatau o meaalofa o le foafoaga na faia e le Atua mo le lalolagi. O le taua lea o le igoa Peleko e manatua ai le vaevaeina o le lalolagi ua aina ma tuputupu ai malo o le lalolagi. E ui lava la ina eseese

faigamalo o loo i ai nei i lalolagi e pei o malo faatemokalasi (Democratic), o faigamalo faakomenisi (anunist), Peoples Republic ma isi, peitai, o le malo lava o le Atua e mafai ona tasi ai tatou uma e ala i le faatuatua ia Iesu ma aveia ma Kerisiano.

### **GALUEGA FAATINO:** Taliga Fesili

1. O le a le uiga o le igoa Peleko a'o le a foi sona taua o loo taua i le Tusi Paia?  
Tali: O le uiga o le igoa Peleko o le vaevaeina o le lalolagi, o lona taua ua taunuu ai folafolaga a le Atua ia uluola ma ia tumu ai le lalolagi.
2. O le a le uiga o le igoa Papelu? A o le a sona taua?  
Tali: O le uiga o le igoa Papelu o le faeseeseina o gagana a le lalolagi. O lona taua ia iloagofie le tagata ma le malo e tupu mai ai e ala i lana gagana.
3. E faapefea ona toe tuufaatasia malo ua vaevaeina?  
Tali: Ia tasi tagata uma i le talitonuga ma le faatuatuaga ia Iesu Keriso le Ao o le Ekalesia.

**PESE:** O oe le tupu moni (259 Pese ma Viiga)

### **A'OA'OGA:**

1. E pule aoao le Atua i mea uma
2. E aoga feeseeseaiga e luitau ai le ola
3. Ua tasi tagata uma ia Iesu Keriso.

.....

**ASO SA: 1 SETEMA 2019**

**MATAUPU: IA PEPESE LE LALOLAGI UMA**  
*(All the Earth-sing)*

**SINI:** Ia a’oa’o le vasega ina ia malamalama o le pese o le auala e vivii ai le Kerisiano i lona Atua.

**TUSI FAITAU:** Salamo 100

### **FESOASOANI MO FAIAOGA:**

E le fou lenei mataupu i le tatou tusi vasega matutua. O le pese o se faatinoga na te faaleoina lagona o le tagata, e pese pe a fiafia, e pese pe a faanoanoa, ua iloga lava pese ua tatou iloa i nei aso. E ta’u mai lava i upu o pese le ituaiga lagona o loo i ai le tagata mai lea taimi i lea taimi. O le faatonuga IA PEPESE LE LALOLAGI UMA. O Tavita o le fatu pese iloga i Isaraelu, tele foi o Salamo na ia fatuina ma ua fa’aaogaina e Isaraelu i le taimi o a latou tapuaiga pei foi o le Salamo lenei. O le Salamo o viiga, o le vii a le tagata faatuatua i lona Atua ina ua ia matuā iloa ma talitonu i le alofa tausī ma le alofa lavea’i o lona Atua. O le faatonuga mo le lalolagi uma. Ia alalaga i le Alii le lalolagi uma. Ia alalaga po o le ta’uta’u atu le suafa o le Alii e tagata ola uma. O le atoaga lea o le viiga o le tagata i le Atua o loo mana’o ai le fai Salamo.

Muamua:

- 1) Ia alalaga.
- 2) Ia outou auaina atu i le Alii ma le loto fiafia.
- 3) Omai ia outou i ona luma ma le alaga fiafia.
- 4) Ia outou iloa o le Alii o ia lava le Atua.
- 5) Ia outou ulu atu i ona faitotoa
- 6) Ia outou vivii
- 7) Ia outou faamanu i lona suafa paia.

O le numera 7 o le numera paia, o le numera a le Atua ua atoatoa mea uma o lona uiga, o le atoatoa lea o le viiga e avatu e le tagata mo lona Atua le silisili ese.

E le faatauvaā viiga i le Atua, ua uma foi ona tusi e i latou atamamai i le musika upu o a tatou pese, ma faanota i fati ma taulagiga ua matagofie ai. O pese faatupu fiafia i le tagata e vivii, o pese faamafanafana mai pe a tatou faanoanoa. O le taua lea o Pese ma Viiga, e saga faamausali ai le ola vivii ina ia tumau ai pea le viiga i lo tatou Atua o le na faia i tatou. O le isi upu ua masani ai e mafai e le pese ona lauga, a oo ina malie le pese i le faalogo e oo ifo i le loto, o lona uiga e sili ona malie i le faafofoga a lo tatou Atua. E le tau ina pese, a o le pese ma le loto, ua faatumuina i le fia vivii e fai ai viiga mo le Atua auā o Ia e tatau i ai viiga. E te le fia pese pe e te fia faalogo i se pese ae pa’ulua. Tamaiti ia fai i tatou ma pese malie, e fia vivii ai tagata i le Atua. Fai faapefea? O lau amio ia lelei, o le pese malie lena e fia faafofoga ai le Atua, e lē fia silasila le Atua i se tama po o se teine, faalogogata ma le mata’u ia te ia.

### **GALUEGA FAATINO:**

Ia tusi sau pese 2 fuaiupu tai 4 laina i le fuaiupu e faailoa ai lou loto fiafia ma le fia vivii i le Atua. Pule oe i le fati

**PESE:** 83 Pese ma Viiga

### **A’OA’OGA:**

1. E tatau ma onomea viiga i le Atua.
2. E fia faafofoga le Atua i a tatou viiga.
3. Ia vivii tagata uma i le Atua le Silisili Ese.

**ASO SA: 8 SETEMA 2019**

**MATAUPU: VAI O LE FOAFOAGA**  
*(Waters of Creation)*

**SINI:** Ia a’oa’o le vasega ia malamalama, o le vai o le foafoaga, na amata i le gaogao ma le nunumi, ae na fa’aaoga e faamama ma fai ai le lalolagi matagofie ma le lelei, ae tumau pea ona uiga faigata.

**TUSI FAITAU:** Kenese 1: 1 – 10, 20 – 22

### **FESOASOANI MO FAIAOGA:**

O le tala lenei o loo i totonu o le tala o le foafoaga muamua (Kenese 1: 1 – 2: 4). O le tala lona lua, e sau mai le Kenese 2: 4 e oo i le 3: 24. O itū e tāua o le foafoaga: (i) fuaiupu e 3-5, o le malamalama ma le pouliuli, o le aso muamua lea. (ii) fuaiupu 6-8, o le vanimonimo po o le lagi, o le aso lua lea. (iii) fuaiupu 9-13, o le eleele ma le sami, o laau, o le aso tolu lea.

O vaega uma o le foafoaga, e na o le fetalai lava o le Atua, ona tino mai lea.

E i ai si faafitauli i le faaliliuina o le upu Eperu o le “hayah” i le fuaiupu e 2, e mafai ona faaliliuina i le ‘was’ (sa soona nunumi ma gaogao...), po o le ‘became’ (ona soona nunumi ma gaogao.....). O nei faaliliuga e lua o lo o fefālōa’i ai le ‘au su’esu’e. O le upu lava lea o le ‘hayah,’ o lo o fa’aaogaina faalua i le fuaiupu e 3, ma o lo o fa’aaogaina ai le uiga o le ‘became.’

Afai e taliaina le faaliliuga o le ‘became’ i le fuaiupu e 2, o lona uiga, na faia muamua le foafoaga ua lelei, a ua oo i se tulaga faapea, o le soona nunumi ma gaogao ona o satani, lea la ua toe faia ai e le Atua. O le manatu fo’i lea e faapea, o le foafoaga muamua lea na iai uma ma meaola tetele (dinosaurs), ma tausaga e miliona ua te’a e pei ona aumai nei i a’oa’oga faasaienisi.

Afai o le faaliliuga lenei e taliaina, o lona uiga, e o faatasi ma lo tatou talitonuga, o le foafoaga na faia mai i le leai o se mea (ex-nihilo). O le fesili la e tula’i mai, aiseā ua faaliliuina ai faapea i

le fuaiupu e 3 ma le tele o isi vaega o le Tusi Paia, ae e ese le faaliliuina i le fuaiupu e 2?

I le faaliliuga o lo o i le Tusi Paia Samoa, o loo faaliliuina e le Atua le foafoaga a o soona nunumi ma gaogao, ma ufitia le moana i le pouliuli. Sa i ai mea ia i le amataga.

### **Uiga o Upu i Fuaiupu 1-3**

‘ sa i le amataga ‘ – o le amataga o le foafoaga, ae le o le amataga o le Atua. O le Atua e leai se amataga, e leai fo’i se gata’aga.

‘ soona nunumi ‘ – (tohu) tofa, nofoaga naumati, e faigata ona ola ai ni laau ma meaola.

‘ gaogao ‘ – (bohu) leai se mea.

‘pogisa’ – leai se malamalama, e talitonu o le nofoaga o ti’apolo, e i ai le fefe, o le tagI ma le tiga, o le nofoaga e faasa ai se isi.

‘ vai ‘ – (hamayim)

### **Faamatalaina:**

O foliga ia o le lalolagi na i ai, o le moana, pogisa, o se nofoaga e soona nunumi ma leai se faamoemoe, o le fefe ma le tigā, o upu fo’i la nei e faamatalaina le ‘vai’ na i ai i le amataga, o le vai o le tigā ma le fefe, e le maua ai se ola, le vai lea na fa’aaoga e le Atua e fai ai le lalolagi.

Na ona fetalai atu lava o le Atua, ona tuu māvaevae lea o le eleele ma le sami, o meaola o le laueleele e nonofo i le eleele, a o meaola o le sami e nonofo i le sami. O le vai na faatusaina i le ti’apolo ma mea leaga, le tigā, le leai o se ola, ma le soona nunumi, lea ua fa’aaogaina e le Atua e aumai ai le ola ma le sologa lelei, ua liua ai le pogisa i le malamalama ma le matagofie.



E pei e i ai se manatu, o le vai i le foafoaga ua faamamāina le leaga ma le nunumi o le amataga, ua mafai ai ona tino mai i se lalolagi matagofie. Ia manatua, na tupu nei mea uma ona o le upu fetalai a le Atua.

O le malamalama faa-le-feagaiga tuai i le vai, o le faatusa o le ola. A leai se vai, ua leai se ola. E faamoemoe le ola i le vai. O le vai fo'i, e tāua auā e faamamaina le eleele ma mea leaga. E fa'aaogaina i le tapuaiga, ma tu ma aga faa- Isaraelu.

E oo mai i le feagaiga fou, ua faatusaina le vai i le “Agaga.” O le vai o le faamamāina o agasala, a o le Agaga, e galuea'ina le loto o le tagata ua salamō, ina ia avea ma tagata faatuatua e Afio ai le Alii.

I le fuaiupu e 6 ma le 7, ua tuu'ese'ese ai le vai i luga mai le vai i lalo. O le upu o loo faaliliuina i le vanimonimo, e faauigaina e pei o se faa'ofu'ofu, ona o le talitonuga i na taimi, o le lalolagi e pei se laumei, e gatasi lelei, ae faa'ofu'ofu e pei o le tua o le laumei le lagi, o le faa'ofu'ofu lea ua vavaeina i le vai o le sami ma le vai o le timu.

E ui lava la ina ua tatou iloa o le vai, o le vai o le ola ma le faamamāina, o se mea lelei tele, ae 'aua ne'i galo iā i tatou, o loo tumau pea uiga faigatā ia o le vai mai le amataga. Ua tatou iloa, e i ai lava taimi e oso mai ai ma avea ma malosi e aumaia le tigā, ma le fefe, ma le faanoanoa, e pei ona faia i le taimi o le lolo. E faapea fo'i i mala faa-le-natura ua tatou iloa nei, o lologa ma timuga, ma le siisii o le loloto o le sami ua lamatia ai motu maualalalo. O le vai o le foafoaga, o le vai e aumaia le ola, o le vai fo'i lenā e faamasinoina ai le lalolagi agasala, e aumaia le tigā ma le mata'u, le nunumi ma le pogisa, e faamanatu i le tagata vai o le amataga.

### **Fautuaga**

O le vaega lenei o le Tusi Paia, tatou te faitauina faa-le-faatuatua, e le afāina tele pe faapefea ona faia o le lalolagi ma le lagi, ae pe fia fo'i aso. O le itū tāua mo le tagata faatuatua, o le talitonu, na faia e le Atua le lalolagi ma mea uma o i ai.

Ia 'aua ne'i galo iā i tatou, e le mafai e o tatou mafaufau faatauvaa ona malamalama i le silisili ese o faiga a le Atua, o le aso fo'i i le tatou faitau, e le tutusa ma le aso i le faitau a le Atua, ma o ala o le Atua e le tutusa ma o tatou ala. O mea ua fa'aali mai e le Atua, na o mea e moomia e i tatou, e sao ai i le 'Mālō o le Lagi'.

### **GALUEGA FAATINO:**

Taligā Fesili: Ia fai ni fesili faigofie e tuliloa ai po ua malamalama le vasega i le mataupu.

### **Fesili:**

1. Faamatala mai foliga o le amataga ae le'i faia le lalolagi.
2. Faamatala le faiga o le eleele ma le sami.
3. O le a le uiga o le faitau lea: 'o le vai o le foafoaga o le vai o le ola?'
4. O le a le uiga o le faitau lea: 'o le vai o le foafoaga o le vai o le malaia?'
5. O le a le uiga o le vai i le feagaiga tuai?
6. O le a le uiga o le vai i le feagaiga fou?
7. Faamatala mai uiga o upu nei: nunumi, gaogao, moana loloto.
8. O le a le upu Eperu o le 'vai'?
9. Mafaufau i le olaga i Samoa: faalau mai ni faata'ita'iga o le fa'aaogaina o le vai e faaola ai. (vai Samoa, toto o Iesu, vaiinu, vai faamamā, vaitale, etc.,)
10. O le a le uiga o le vai i le papatisoga a le EFKS? (O le papatisoga o le salamō, o le vai o le faamamāina o agasala, e faamoemoe i mātua o tamaiti ma tagata lotu e a'oa'o ma ta'ita'i le tamaitiiti i le Atua, i lona tuputupu a'e.)

**PESE:** O mai i lenei vaipuna, o mai lava i le vai.

## A'OA'OGA

1. Na faia e le Atua le lalolagi ma le lagi.
2. Sa nunumi ma pogisa le amataga.
3. Tau lava o le fetalai o le Atua, ona tino mai lea o le foafoaga.
4. E liliu e le Atua mea leaga ia lelei.
5. O le vai e aumaia le ola.
6. O le vai e aumaia le malaia, (a tele vai e inu ua malemo).
7. O le Atua e alofa.

.....

**ASO SA: 15 SETEMA 2019**

**MATAUPU: UA VALAAU IESU I Ē FIA INU**  
*(Jesus calls the thirsty)*

**SINI:** Ia a'oa'o le vasega ia malamalama, o le valaau a Iesu i ē fia inu, o le valaau i ē fia feinu i le vai faa-le-Agaga, e maua ai le ola e faavavau.

**TUSI FAITAU:** Ioane 7: 37-39

### FESOASOANI MO FAIAOGA:

O le saunoaga a Iesu ua fai ma mataupu o lenei aso, e faapea, “Afai e fia inu se tasi, inā sau ia iā te a'u, o lē ua talitonu, inā inu ia.....” O le fesili, o le a tonu le uiga o le saunoaga a Iesu? E tāua lo tatou malamalama i le taimi na fai ai, ma mea na tutupu ai.

O le taimi, o le tausamiga o faleapitaga. O le tasi o 'aiga faitauina o le tausaga e tumutumu ai tagata i Ierusalem, e faamanatu ai le taimi a o i le vao, aemaise le foa'i e le Atua o le

vai e feinu ai ma vai e faasūsū ai le laueleele. O le taimi o le tausaga e fai ai lea tausamaaga, o Setema/Oketopa, ma e valu aso o faatinoina. O le taimi atoa e faia ai le tausamaaga, e nonofo tagata i fale apitaga e si'osi'omia Ierusalem.

E amata i le taulaga. A mae'a le osiina o le taulaga, ona sau lea o le solo e ta'ita'i e le ositaulaga i le vai o Selo, e savavali tagata ma alalaga i le upu i le tusi a Isaia 12:3..... A uma ona asu vai, ua toe fo'i le solo i le malumalu, ona faataamilo lea i le fata faitaulaga ma pepese i salamo, ma sasaa vai i lalo o le fata faitaulaga, faapea ma uaina. O lenei faatinoga, e faia i aso taitasi mo aso e fitu, ae malōlō i le aso valu.

A o le aso valu, o le aso mulimuli fo'i lea o le tausamiga, o le aso tonu lea o lo o manatu le toatele, na faia ai le saunoaga a Iesu. Aiseā ua fetalai ai Iesu i lea taimi, ae po o le a fo'i le uiga o lana saunoaga? O le toatele o le 'au su'esu'e, e manatu o loo tusi Ioane i le 'au Kerisiano Iutaia, ua tutuliese mai mai o latou falesa, ona ua mulimuli iā Iesu.

E lua itū e tāua ai lea mea: (i) O tagata nei, e malamalama lelei i le fa'aaogaina o le vai mai Selo ma lona uiga. (ii) O tagata foi nei, o loo fai i tagata o nuu ese e moomia le fanaufouina, e ala i le taliaina o tu ma aga a Isaraelu e maua ai le ola.

E le gata i lea, ae e i ai le manatu, ua mafua ona malamalama gofie i loto o tagata, ona o loo faia i le vaitau e faatinoina ai le taulaga o vai mai Selo. O le saunoaga a Iesu e faasino i le vai, sa faamoemoe i ai tagata mo le ola. E le gata i lea, ae faapea foi ina ua taunuu i Kanana, auā o le vai, e faamoemoe i ai le ola o meatoto e faalagolago i ai le tagata.

O lea la ua fa'aaogaina e Iesu le faamoemoe o tagata Eperu i le vai mo le ola, e faamalalamalama ai le faamoemoe o le tagata i le Agaga mo le faaolaina.

I totonu lava o le tusi a Ioane, o loo tautala ai Iesu i le 'vai ola' mo i latou o e talitonu ia te ia. Fai mai, “Afai e fia inu se tasi, inā sau ia iā te a'u e inu ai. O sē faatuatua iā te a'u e faapei ona

fai mai o le Tusi, e tafe mai o vaitafe mai totonu iā te ia, o le vaiola ia .” O upu o le Tusi, e faatatau i upu o Sakaria 14:8, o upu fo’i ia e faitau e tagata i le aso mulimuli o le ‘aiga o fale apitaga.

Ua liliu e Iesu le uiga faaletino o le vai i lona uiga faa-le-Agaga, o le fia inu, e fiu e inu i vai o le olaga ma le tino nei, e toe fia inu fo’i. A o le tagata e talia Iesu e ala i le faatuatua, e le toe fia inu. Ua faatusaina ai le vai i le Agaga, ma foliga mai ai o le saunoaga a Iesu, o loo ofoina mai ai e Iesu le papatisoga faa-le-Agaga (vai o le faailoga o le Agaga mai lava i le foafoaga e oo mai i le feagaiga fou), e sili atu lea nai lo le fa’aaogaina o le vai i tu ma aga (rituals) e pei ona fa’aaogaina ai e tagata Eperu.

O le fa’aaogaina fo’i e Iesu o vai faapea, e fai soo, auā sa faapea fo’i i le fafine i le vai’eli o Iakopo, aemaise o le fetiaia’iga ma Nikotemo, lea na faapea ai Iesu, “A e le toe fanau mai i le vai ma le Agaga, e te le sao i le lagi.” E faapefea ona maua le Agaga? Fai mai le Galuega 2:38, o le salamō ma le papatisoina e maua ai le Agaga. O lona uiga, a leai le galuega a le Agaga e liliuina le tagata, e le mafai e le tagata ona sao i le ‘Malo o le Atua’.

O le tagata ua fia inu, o le tagata ua salamō ma sa’ili i le Atua, ua gaogao’i’i ma ua moomia le agaga o le Atua. O le fagu alapasa ua masaa, ma ua avanoa mo le liligi atu o le u’u manogi o le Agaga o le Alii.

O le faai’uga o le saunoaga a Iesu, ”le tafe mai o vaitafe mai totonu iā te ia...”(upu fo’i ia e faia e tagata Isaraelu i le aso valu o fale apitaga) e faauigaina faapea, o le manatu o tagata Eperu, o le malumalu, o le manava o le eleele. O lona uiga, o loo faapea atu Iesu, “O a’u o le maa tulimanu o le malumalu faa-le- Agaga o le Atua, ai sē fia inu, sau e inu...”

O Iesu, o le Agaga e mafai ai ona tafe mai o vaiola i totonu iā i tatou, ma aveia i tatou ma molimau ola o le Tala Lelei. O le galuega fai faatasi a le Tolutasi Paia. O le Agaga lava lea na i ai i le amataga, ae a mae’a ona oo Iesu i lona mamalu, lona maliu, toetu ma lona Afio a’e i le lagi, ona aliali lea o le galuega a le Agaga.

O a uiga loloto o nei mea?

(i) E lē o le fa’aaogaina o vai i tapua’iga ma ‘ava o feiloa’iga (ritualistic) e tāua, ae o le Agaga o le Atua, e galue i le tagata e fanaufouina ai. E le na o Iutaia, ae faapea fo’i ma tagata o nuu ese, e o uma i le lagi. O lona uiga, e le o le to’aga i le lotu ma inu le faamanatuga, ae o le Agaga i totonu, e uigā ai nei mea mo le tagata tapua’i ma fua mai i le alofa i e matitiva ma e fia maua se fesoasoani. E le o le to’a’aga e ta’i sua (o tu ma aga faa-Samoa e fai i fale o matai) ua alu vale ai le soifua o tagata lotu, a o le faasino o tagata lotu i le soifua faatuatua, e fafagaina e le ola tatalo.

(ii) Ua na o Iesu e mālie ai le tagata ua gālala i le fia inu i la le Agaga, ua ofoina mai e Iesu le vai tatou te malilie ai, le Agaga e fanaufouina ai i tatou, ma oo ai i le Malo o le Lagi.

**GALUEGA FAATINO:** Tali i fesili.

Ia fai ni fesili e tuliloa ai po ua malamalama le vasega i le mataupu:

**FESILI:**

1. O le a le uiga o le salamo?
2. O le a le uiga o le papatisoga?
3. O le a le uiga o le saunoaga a Iesu, “Afai e fia inu se tasi, ina sau ia iā te a’u e inu ai?”

**A’OA’OGA:**

1. O Iesu e maua ai le vai ola.
2. Ia saili ma faatuatua i le Atua, e maua ai le manuia.

.....

**ASO SA:** 22 SETEMA 2019

**MATAUPU:** **FANAU I LE VAI MA LE AGAGA**  
*(Born of wáter and Spirit)*

**SINI:** Ia a’oa’o le vasega ina ia malamalama, e lua (2) O ituaiga fanau lea e talanoa ai le mataupu o le fanau i le vai, o le fanau lava lea faaletino, mo le fanau i le agaga, o le ola toefuataiina po o le ola fou mai le upu ma Afioga paia a le Atua.

**TUSI FAITAU:** Ioane 3: 1 -18  
**FESOASOANI MO FAIAOGA:**

E feteenai le valaauiina o Nikotemo e fai ma Faresaio ma lona talitonuga. O Faresaio, o tagata ua tuueseeseina mai i le sosaiete masani o tagata, e pei o faitaulaga o tagata sa talitonu i le talitonuga Eleni po o tagata ese foi. O le latou faamamafa o le tulafono ma le talitonuga faa Feagaiga Tuai. E eseese mamao lo latou faauigaina o le tulafono ma le oo mai o Iesu i lana galuega faaola i le lalolagi, o le ala lea e tele lava ina fete’enai lo latou talitonuga ma a’oa’oga a Iesu. O Nikotemo o le Faresaio, o le faipule o Iutaia, e le taumate la, matua polofesa i le tulafono. Peitai, o lea ua alu faanana ia Iesu i le po, e musu e iloa mai e isi Faresaio ua alu ia Iesu. Peitai o lana gagana e iloa ai, o Nikotemo e maua i le uiga e iloa le mea e fai ae tauaso i lona silafia o Iesu o le a’oa’o, o le Alo o le Atua. Ae ua sa’o le tagata ua saili i ai, saili lava ia Iesu. Fai mai Nikotemo, “Rapi e, ua matou iloa o oe o le a’oa’o ua maliu mai mai le Atua, aua e le mafai e se tasi ona fai o ia faailoga e te faia, ana le ia te ia le Atua.” Ae tali mai Iesu, “E moni, e moni, ou te fai atu ia te oe, a le toe fanau le tagata, e le mafai ona iloa e ia o le malo o le Atua. O loo talanoa Iesu i le fanau faale-Agaga, ia salamō le tagata mai ana agasala, ae foi atu e faia le finagalo o le Atua.

Fai mai le tali le malamalama a Nikotemo, E mafai ea faapefea ona fanau o le tagata ua toeaina? E mafai ea ona toe ofi i le manava o lona tina? E le malamalama le tino i mea a le agaga. E le iloa e Nikotemo le uiga o fetalaiga a Iesu.

O le mataupu o lenei aso, ia iloa e tamaiti, le uiga o le fanau i le Agaga o le salamō i agasala ma toe foi atu i le Atua. Ina ua faasatauroina Iesu, na tui e le fitafita lona itu i le tao, fai mai molimau ua tafe mai ai le toto ma le vai, o le toto ma le vai, o mea ia e muamua mai pe a oo ina faatiga le tinā o le a fanau le tagata fou. O lona uiga o le tafe mai o le toto ma le vai, i le itu o le Alii Faaola o le faailoga o le oo mai o le Ola Fou i le lalolagi. O iina e amata ai le fanaufouina o o tatou tagata, o le tatou talitonu i le faaolataga ua saunia e Iesu mo le togiolaina o a tatou agasala.

**GALUEGA FAATINO:**

Tuu le avanoa i tamaiti e toe auiliili ai le faamatalaina o mataupu poo malamalama (feedback). E aoga foi e iloa ai se vaai (vew) mai le fanau e tusa ai ma le tala.

**PESE:** 112 Pese ma Viiga

**A’OA’OGA:**

1. Ia salamo ma foi i le Atua.
2. O le Agaga Paia o le Atua, o lo tatou fesoasoani sili.
3. Talitonu ma faatuatua ia Iesu o ia e faaolaina ai i tatou.

.....

**ASO SA:** 29 SETEMA 2019

**MATAUPU:** **O LE VALAAU LAUTELE**  
*(An open invitation)*

**SINI:** Ia a’oa’o le vasega ina ia malamalama o le valaau mai o Iesu ia i tatou, e le faailoga tagata, e tutusa tagata uma ia te Ia.

**TUSI FAITAU:** Luka 14: 15 – 24

### **FESOASOANI MO FAIAOGA:**

O le faataoto lenei e tusa ai ma le molimau a le fai-Evagelia o Luka, o loo faaigoaina o le tausamiga tele, e tai feso’otai lelei ma le tausamiga o le faaiipoipoga e pei ona faamauina e Mataio 22: fuaiupu 2 – 15. E ui e i ai ni eseese laiti e tusa ai ma faamaumauga a Mataio ma Luka. Peitai, a faitau manino i le molimau a Luka, faatoa uma ona faamalolo e Iesu le tagata sa maua i le ma’i fula i le sapati. O se tasi o faamalologa na matua gugulu ai Iutaia aemaise lava le au Faresaio. Aua o le tulafono e sa ona fai o se galuega i le sapati. Peitai e le o le sapati, a o le faatinoina o le alofa i le aso ma le taimi e tatau ai, o le finagalo lea o Iesu. E malamalama le mataupu pe a faitau mai i le amataga. Na uma ona tali Iesu i le fesili - Pe sa ea ona faamalolo i ma’i i le sapati? Ona faamatala lea o le faataoto i le aiga o le faaiipoipoga, fai mai Iesu, Pe a valaaulia oe i se aiga o se faaiipoipoga aua e te taoto i le mea sili, nei i ai se tasi e alu atu e sili atu ia te oe, o le a’oa’oga a Iesu aua nei faamaualuga, aua o se faamaualuga o ia ia te ia lava e faamaualoina a o le faamaualalo o ia ia te ia e faamaualugaina lea. Ona toe fetalai foi lea o Iesu, Pe a sauni se faigaai po o se talisuaga aua e te talai i au uo, po o lou aiga, po o tagata mauoa tou te tuaoi, nei latou toe talai mai foi ia te oe, ona tauia mai lea o oe. Peitai ia talai i e matitiva o e mumutu ma e pipili ma e tauaso, aua e manuia ai oe, aua latou te le mafaia ona tauia mai ia te oe, ae tauia oe i le toe tutu mai o e amiotonu. E le o le tauia i lalo nei a o le toetu e pei ona fetalai ai Iesu. O le toetu lea, na fa’amuia ai se tasi o tagata sa aai faatasi ma Iesu “Amuia le ai i le malo o le Atua.”

O i tonu lava na tali ai Iesu i le faataoto lenei. Atonu o le mafaufau o le tagata lea, ua na o Iutaia latou te maua le malo o le Atua. Silafia lelei e Iesu manatu ma mafaufauga ia o tagata Iutaia. O le ala lea, o le fai mai o le faataoto ua talai e le matai le tausamaaga. Ua uma ona saunia lelei le tausamaaga o le mea sa tupu e leai nisi na tali atu. Auina atu ana auauna, i e na talaiina ae fai mai mafuaaga ua le oo mai ai, ua faasili mea o le tino, ua faamuamua le oloa o mea e pala ae ua galo ai le valaaulia. O le ala lea na fetalai ai Iesu, talai i e mumutu, i e pipili ma e tauaso, o e matitiva. Ioe o le lautele lea o le valaaulia ua valaaulia ai e Iesu i tatou, o le ata faatusa lava lea o le Atua ma lona malo, a o le ata foi lea ua faasino mai e Iesu, ua maua le avanoa o nuu ese ua le na o Iutaia ae ua tatala le avanoa, o e tausasami faatasi ma ia i lona malo, na o e faia lona finagalo ma faatuatua ia te ia. O le valaaulia faa Iesu, e le na o tagata mauoa poo tagata malolosi, o le valaau e lautele e aofia ai tagata uma lava, pau lava ia talia e le tagata lona valaau mai e ala i le ofo atu o le ola e auauna ai mo Ia.

### **GALUEGA FAATINO:**

Ia faatino le tala e tamaiti, ia atagia ai i latou na valaaulia ae latou teena, ma le valaaulia o e mama’i ma e matitiva. Ia atagia ai o Iesu lava e ona le taumafataga na valaaulia ai tagata, o le taliaina lava lea e tagata o le malo o le Atua.

**PESE:** 123 (Pese maViiga)

### **A’OA’OGA:**

1. E tutusa tagata uma i le silasila a Iesu.
2. Aua le faailoga tagata
3. Ua valaau mai Iesu ia fai i taua ma ona soo moni.

.....

**ASO SA:** 27 OKETOPA 2019

**MATAUPU:** MALOSI E LĒ MA  
(*Unashamed power*).

**SINI:** Ia a’oa’oina ma fa’amanatu i tamaiti o le malosi ma le mana o le Tala Lelei, e lē ma. E lē o se malosi e mafaia e se tagata poo se isi malosi ona taofi, polokaina, pe fa’amaina ma fa’atoilaloina. E leai! O le malosi e i ai le mana ma le silisili ese o le Atua.

**TUSI FAITAU:** Roma 1:1-17

### **FESOASOANI MO LE FAIAOGA:**

E manatu nisi o le au suesue o le Tusi Paia, o le tusi lenei a le Aposetolo o Paulo i le Ekalesia i Roma na tusia pe a ma le tausaga e 57 TA ( Tausaga Alii). Sa tusia lenei tusi ao i ai o ia i Koronito i lana malaga faamisionare lona tolu. E le’i fa’atuina e Paulo le Ekalesia lenei, ae e i ai le talitonuga lautele sa fa’atuina e nisi o i latou sa i ai i le aso o le afio ifo o le Agaga Paia (Penetekoso) (Galuega 2:10).

O le mataupu 1:1-8 o loo fa’ailoa ai e Paulo lona tagata aua e le’i oo lava i Roma i le taimi lea. O ia na valaauina e Iesu Keriso e fai ma Aposetolo o le Tala Lelei i nuu ese. O loo fa’aleoina fo’i le naunauta’iga o le Aposetolo ina ia maua uma e tagata paia, o e ua valaauina, le meaalofo o le alofa tunoa ma le manuia o le Atua atoa ma le Alii o Iesu Keriso.

I le fuaiupu e 8 e oo i le 17, o loo fa’aalia ai le agaga fa’afetai o Paulo i le Atua ia Iesu Keriso ona o le fa’atuatua o le au Kerisiano i Roma ua molimauina ma lo latou ta’u lele’ia. O loo fa’aaogaina ai e Paulo le gagana faa-viivii. E foliga mai o loo faafetai ma viia i latou i mea lelei ua faalogo i ai, ae mulimuli

talanoa i fa’aletonu o loo tula’i mai. O loo fa’aleoina ai fo’i le agaga naunau o le Aposetolo i le fia oo atu e feiloa’i ma le au Kerisiano i Roma pei ona taua i le fuaiupu e 13. O le faamoemoe o le Aposetolo ina ia maua se fa’amafanafanaina, o se fa’amalosi ma se apoapoaiga ina ia tumau i le talitonuga ia Iesu Keriso ma a’oa’oga i le Tala Lelei ua a’oa’oina ai i latou. O le mea ua mautinoa e le Aposetolo ua i ai fa’afitauli ua tula’i mai i le va o le au Kerisiano Iutaia ma Kerisiano o nuu ese. O le ala lea o le tusi atu o Paulo i le Ekalesia i Roma, ina ia toe va’ava’ai toto’a i lo latou ola vala’auina, soia le toe fo’i i tua i tū ma aga ua masani ai, le faia o le agasala. E peisea’i o lana folasaga lea, teuteu ma fa’ata’atia le ala e avatu ai lana feau.

Amata mai i le fuaiupu e 14, e peisea’i ua sui le leo (tone) ma le talanoa a Paulo. O lea ua tuu sa’o le manatu o Paulo i le fa’afitauli ua tupu ai le ma o tagata Kerisiano i Roma i le Tala Lelei ia Iesu Keriso ona o le potu ma le atamai o tagata Iutaia fa’apea ma Eleni. O le ala fo’i lea o le fa’ailoa o lona naunau ia oo atu i Roma ina ia fofo le fa’afitauli, aemaise o se fa’amafanafanaga ma se faamalosi’au i tagata ina ia tumau lo latou fa’atuatua i le Tala Lelei ia Keriso. I le fuaiupu e 16 ma le 17, o loo talanoa ai Paulo i lana galuega fa’a-Aposetolo. E le mā i a’oa’oga a le Tala Lelei ia Keriso ua fa’atuatua i ai, ona o lona olataga lea. O le mana foi lava lea o le Atua, e ola ai so’o se tagata, e o’o lava ia Iutaia ma Eleni pe afai e fa’atuatua ma talia i le loto talitonu. O lo’o fa’aalia foi i le Tala Lelei ia Keriso Iesu; e ala i le fa’aolataga na Ia saunia o loo i ai le amiotonu a le Atua. Ua ta’u-amiotonuina ai le tagata fa’atuatua, ma le soifuaga manuia e maua mai ai, pe afai e tumau ai e pei ona taua i le vaega mulimuli o le fuaiupu e 17; **“E ola le tagata amiotonu i le fa’atuatua”**. O le ala lea e le tatau ai ona mā se tasi i le Tala Lelei ia Keriso, auā o le mana lava lea o le Atua tatou te ola ai i le fa’atuatua. O lo tatou talitā ma le malosi’aga pe a tatou fetia’i ma fa’afitauli o le soifuaga.

### **IA SILAFIA:**

Mo le silafia, na ona fa'amanatu atu ne'i fesiligia e tamaiti ma feteena'i ai ma le mataupu silisili a Iakopo (Iakopo 3:14-17). Mo Paulo lava ia e ola le tagata amiotonu i le faatuatua, na'o le faatuatua. Ae mo Iakopo, o le faatuatua ola, e o fa'atasi ma au galuega. A leai ni galuega, e mate le faatuatua.

### **GALUEGA FA'ATINO: Tusitusiga.**

E mafai ona fai i tamaiti e toe tusi mai i se palakalafa ma toe fa'amatala mai i a latou lava upu le uiga o le mataupu e pei ona talanoaina. E lelei fo'i lenei e iloa ai po o malamalama tamaiti i au tapenaga (feedback).

### **FESOASOANI MO LE TALI:**

E ta'atia atu lava i lau susuga a le faiaoga lea vaega aua o loo faamatala atu lava i le Fesoasoani mo le mataupu.

Tala Lelei e lē ma: O le Tala Lelei ia Iesu Keriso, o le mana lava lea o le Atua. O mea uma ua faia e Iesu, o vavega, fa'amalologa etc, ma mea uma e ta'ua ai le mamalu ma le silisili ese o le Atua, o le Tala Lelei lenei. O le fa'aילוaina mai o le Atua ma lona Malo. O le Fa'aolataga a le Atua mo tagata uma ma le lalolagi atoa.

E pei ona molimau Paulo, e le tatau ona tatou mama e faailoa atu le malo o le Atua ma lana Tala Lelei aua o le malosia lenei, o le mana lenei tatou te malolosi ma ola ai. E tatau ona tatou fiafia ma tele se tatou taimi e talatalanoa ma molimau ai i lona alofa ma lona agalelei. Fiafia e faasoa atu i isi tagata le alofa lea ina ia ola ai fo'i i latou. Fa'aopoopo ane e lau susuga i le faiaoga nisi mea mananaia e te silafia e talafeagai mo le tali.

**PESE:** 247 (E malie lava le tala le Tala Lelei ia Iesu...)

### **A'OA'OGA:**

1. Aua lē mā e fa'aילו atu le Tala Lelei ia Iesu i au uo, aiga ma isi tagata.

2. Fiafia e tala'i le Tala Lelei aua o le mana lenei tatou te ola ma malolosi ai.
3. O Iesu o le mana o le Atua. O le mana tatou te manumalo ai ma fa'atoilalo ai le fili ma ana mailei.

.....

**ASO SA: 3 NOVEMA 2019**

**MATAUPU: OTI I LE AGASALA, OLA I LE ATUA** (*Dead to sin, alive to God*)

**SINI:** Ia a'oa'oina le vasega ina ia malamalama o le ola i le agasala e tini i le oti; ae o le ola i le amiotonu a le Atua e taunuu i le manuia..

**TUSI FAITAU:** Roma 6:1-14

### **FESOASOANI MO FAIAOGA:**

O le tusi atu a le Aposetolo o Paulo i le Ekalesia i Roma, ina ia faamalamalama le mataupu i le tagata ua talitonu ma le faamaoni ia Keriso Iesu, ma le tulaga o loo i ai le tagata i le olaga o aso uma, aemaise lava i tagata o le Ekalesia i Roma, ma le faafitauli tele i le va o Kerisiano Iutaia, ma Kerisiano mai nuu ese. O le talitonuga i le amataga o le talafaasolopito o Isaraelu, ma le a'oa'oga na faamalosi i le tulafono e pei ona limata'ita'iina ai le olaga o le tagata, na faamaui ai i loto ma mafaufauga o tagata le talitonuga i le oti, e mafua mai i le agasala. E le gata i lea, a'o le gataaga foi o mea uma lava i le olaga nei, e pau mai i le oti. Peita'i ina ua oo mai i le Feagaiga Fou ma le talalelei ia Iesu Keriso, e ala i lona maliu ma lona toe tu manumalo mai le oti ma le tuugamau, ua taumafai ai se a'oa'oga i le isi ola i tala atu o le oti, e afua atu i le ola nei.

O le tusi faitau o lenei aso, o loo faa-autuina i le “Oti i le agasala, Ola i le Atua”. O loo talanoa ai Paulo i le tāua o le tagata ua mausalī lona olaga ia Keriso, e ala i lona faatuatua faamaoni, o le tagata lena o loo ola i le Atua.

O le fuaiupu muamua lava o le mataupu lenei e 6, o loo luitauina ai e le aposetolo le tagata agasala ,poo faateleina le alofa tunoa o le Atua i le ituaiga olaga o loo ola ai. Pe o sao i le tagata, le ola lava ma faia le agasala, a’o loo faamagalō lava ia e le Atua. E ui lava o se fesili o loo fesili ai Paulo i le manatu o le tagata o loo fiafia e faia le agasala, ina ia faatele ai le alofa tunoa o le Atua ia te ia, ae o le tali foi a le Aposetolo i lea amioga a le tagata, o loo matua manino ai, le manatu lava o le tagata mai le Feagaiga Tuai, o le tagata lava e oti i le agasala. O lona uiga, o le talitonuga ua tāmāu i le mafaufau ma le loto o le tagata, e oti uma tagata i le agasala. O se talitonuga o loo gata i le oti le olaga, ma e le toe i ai se isi ola.

Ma o le ala tonu lea o le tusi atu a Paulo, ina ia faamanino i le tagata e ala i lona faatuatua, e le gata i le oti le savaliga a le tagata e tumāu lona faamoemoe ma lona faatuatua i le Atua,, Peitai e taualuga i le galuega o le Faaolataga na saunia e Keriso i lona maliu ma lona Toetu manumalo.

O le tāua ai o le papatisoga i le maliu o Keriso, e tali a’i le mafaufauga e pei ona tāua i luga, o loo faamamafaina ai le uiga loloto o le papatisoga e faasaoina ai, ae le o le faasaoina ona o le papaitisoga. E faamamafaina ai le faatuatua o le tagata, e faasaoina ai. Auā o le uiga lea o le papatisoga, e le gata o le mafutaga a le tagata ma le Alii ina ia osi feagaiga ma faa-Paia i totonu o le aiga o le Alii, ae ia mo le tagata foi, e puipuia mai faiga a le lalolagi. O lona uiga, o le maliu o Keriso, e le gata ua faasaoina ai le tagata mai le agasala, ae ua na tatala ai le isi laasaga o le ola o le tagata, o i tala atu o le ola nei, e ala i le ola faavavau. O le faamanatu la a Paulo mo le tagata faatuatua ma talitonu faamaoni, e ao ina ia tumāu, auā o le ola mo le Atua, o le i ai lava lea i le ola e faavavau.

O le a’oa’oga lea o loo aumai e le mataupu o lenei aso Sa i le olaga o o tatou tagata faatasi ma Keriso i aso uma. E tatau ona o

tatou talitonu, i o tatou tagata moni, ae le o le ola lē mautonu, i le ituaiga tagata o loo e iai. Ua tatou oti i le agasala faatasi ma Keriso, ma ua suia ai o tatou olaga, ma e ao ai foi ona suia ma le mafaufau. E tatau foi ona saga faamautuina i o tatou ola lo tatou tulaga moni, o le Ola i le Atua, ma le oti i le agasala. (*We must recognize what our true state is: alive to God and dead to sin.*). E le gata i lea, ae ua tatau foi ona suia le tulaga o lo tatou olaga o loo iai. O lea ua aumaia e Paulo ni ta’iala tāua mo le tagata faatuatua, ina ia saunia lelei, leaga o le malosi o le agasala e fai lava sina mata’utia, ma e toe ono afaina ai lava le tagata ua talitonu i le Alii.

### **GALUEGA FAATINO:** Tusiga Parakarafa

Ia tuu le avanoa i le vasega, latou te tusia mai ai se parakarafa e uiga i le mataupu ma le tala na faamatalaina, ma ia manino mai le manatu o Paulo e uiga i le oti i le agasala, ma le ola i le Atua.

#### *Faata’ita’iga:*

O le mataupu o lenei aso Sa, o loo faamanatu mai ai e Paulo, o le oti lava ia, e oti i le agasala, ae o le maliu o Keriso ua faatoilaloina ai lea oti i le agasala. Peita’i o le toetu manumalo mai o Keriso i le oti ma le tuugamau, ua faamanatu mai ai le iai o le ola i tala atu o le oti, ma o le ola lena i le Atua, e saofagā uma iai tagata e faatuatua ma le faamaoni i le Atua.....

### **PESE:** A tumāu ia Iesu (When we walk with the Lord)

#### **A’OA’OGA:**

1. Ia tumāu le faatuatua i le Atua i le ola nei, e mautinoa ai le ola i le Atua e faavavau.
2. E iai le ola fou i tala atu o lenei ola, mo le tagata faatuatua.
3. E lē faapopoleina le tagata e faamaoni lona ola i le Atua.

.....



**ASO SA:** 10 NOVEMA 2019

**MATAUPU:** SUAMALIE NAI LO LE MELI  
(*Sweeter than honey*)

**SINI:** Ia a’oa’oina le vasega ina ia iloa ma malamalama, o le olaga o le tagata ua fiafia i le Atua e sili atu lona suamalie nai lo le meli.

**TUSI FAITAU:** Salamo 19

### **FESOASOANI MO FAIAOGA:**

O le meli, o se meaai e silisili lona suamalie i le tofo. O se meaai foi e le tau gaosia, auā e maua mai le siosiomaga. Peita’i o lea ua aumai le mataupu o lenei aso Sa, e “Suamalie nai lo le Meli, o loo atagia mai ai, le iai o se isi mea ua sili atu lona suamalie, nai lo le meli, pe a fua i le siosiomaga o le natura o mea, ae po o le a foi i le fai Salamo ua na suia le suamalie o le meli.

O le Salamo lenei e 19, o loo faamatalaina, o se pese amata lea i sauniga a le au Eperu i taeao o aso Toonai a’o avea ma o latou Sapati, ma e masani foi ona o latou usuina i taimi o tuufatasiga e pei o sauniga ma soo se tuufaatasiga (services/festivals). O le ala foi lea ua faaigoaina ai lenei Salamo, o se pese ta’uta’ua a so o se tagata Eperu. Peita’i, o loo maualuga pea manatu ma lagona o le Salamo lenei, o se pese na lagiina e Tavita, e vivii ai i le Atua silisili ese, o le na faia mea uma lava. O lona mamalu ma lona matagofie, e molimauina i le foafoaga Pa’ia na Ia faia i le amataga, ma o le ala lea o le fia vivii ai o le fai Salamo.

E le gata i lea, a’o le silafia ma le iloa o le fai Salamo o le Atua, o le mafuaaga foi lea o lona malamalama lelei i le mamalu o le Atua, e pei ona tau faamatalatalaina mai le fuaiupu muamua se ia oo i le ono (1-6).

Peita’i o le mataupu o lenei aso Sa, o loo faamamafa i le “Suamalie nai lo le meli”. O le fuaiupu e 7 se ia oo i le 10, e pei

o i tonu lava o loo aga’i i ai le faamamafa o lenei mataupu, o le Suamalie nai lo le meli. O le tulafono (Torah), o loo sili ona faapeleple iai le fai Salamo. E le gata o loo tausia ma usita’ia e le fai Salamo e ala i lona olaga o aso uma, a ua fai foi ma ona malosiaga i lona ola. O lona faasilisiliina foi o le tulafono i lona ola, o loo molimauina i faatusatusaga e pei o le silisili nai lo le auro e sili ona lelei. O le ata faatusa o le lē mafaia e le tamaoaiga ona faato’ilaloina le loto ma manatu o le fai Salamo, i le Atua e ala i le tausaiina o le tulafono.

O lona mata’u foi i le Atua ma lona ola i le tulafono ma poloaiga a le Atua, ua silisili lona suamalie nai lo le meli.

O le ata faatusa o le lē mafaia e le faatosina o lenei olaga, ona aveesea lona loto, mai le tausia o le tulafono a le Atua, e ala i lona soifua o aso uma. O lona uiga, pe a fua i le suamalie o le meli, e na te faatosina le siosiomaga i lona suamalie ma lona tofo lelei, ua le mafaia le suamalie ma le tofo lelei o le tulafono a le Atua, i le olaga o le fai Salamo. Ma o le uiga tonu lea o le mataupu o lenei aso Sa. O loo faamanatu mai ai e le fai Salamo, a oo ina mafanafana le mafutaga a le tagata ma le Atua, ma faamaoni iai e ala i le tausia o tulafono ma usita’i i le finagalo o le Atua, e le gata ina tamaoaiga i oa o le lalolagi e sili atu nai lo le auro lelei, e le tau faamalieina foi, auā e sili atu lona suamalie i tagata nai lo le suamalie o le meli lelei.

O le faamanatu tāua mo le olaga o aso uma, aemaise i le va o le tagata ma le Atua, e ala i le ola vivii i le Atua i aso uma. Afai o Tavita na tusiaina lenei Salamo, e talitonu le taofi, ua talafeagai foi lea, pe a fua i lona soifuaga ma lona iloa lelei o le Atua. Afai foi ua manatu le to’atele, o lenei Salamo, o se pese na tusiaina lava e Tavita, mai lona loto mafuta i le Atua, ma lona ola sa faamoemoe i le Atua, ma tofiga ua faeaina ai o ia, e manatu foi se lagona, e tatau foi ona o tatou pepese faatasi ai, tatou te talatalaina ai le mamalu matagofie o le Atua. O le fuaiupu e 14 o le mataupu lenei e 19, o loo manatu ai le fai Salamo, o upu a lona gutu ma mafauauga o lona loto, e ao ona malie i le faafofogaaga a le Atua. O loo faailoa mai ai le soifua vivii o le fai Salamo i le Atua i pese ma mafauauga tapua’i i aso uma, ma

o le olaga foi lea ua tatau mo lo tatou ola, ina ua tatou fiafia e mafuta i le Atua a’o tatou maua le ola.

**GALUEGA FAATINO: TA’UTINOGA**

Tusi mai sau oe lava ta’utinoga e uiga i lou olaga ma le mea o loo e faamuamua ma faatāua i lenei vaega o le ola, ma ua faatusaina lona suamalie e sili atu nai lo le suamalie o le meli, i le tulaga o lou naunau ma lou fiafia i ai, e faatusa i le tulafono a le Atua e pei ona sa naunau i ai le loto ma le agaga o le fai Salamo.

**PESE:** Ta’u mai tala ia Iesu (Tell me the stories of Jesus)

**A’OA’OGA:**

1. O le fiafia i le Atua, ia sili atu nai lo se isi lava mea i le olaga.
2. Ia vivii le tagata i le Atua i aso uma.
3. Ia ta’utino le alofa ma le faamaoni o le Atua i lou ola.

.....

**ASO SA: 17 NOVEMA 2017.**

**MATAUPU: IA AUILIILI ONA MĀITAU**  
(*Thoroughly to hold*)

**SINI:** Ia a’oa’oina le fanau ina ia iloa vaai ma māitau le mamalu ma le silisiliese o le Atua aemaise o lona alofa, i mea e tutupu i le ola.

**TUSI FAITAU:** Salamo 27: 1 – 14

**FESOASOANI MO FAIAOGA:**

Ia auiliili ona māitau, e aiga tutusa ma nisi o faaupuga faapei o le “vaai toto’a”, “ia faaeteete ona vaai, ia vaai ma taofi mau”. O se faaupuga o loo atagia ai le ituaiga vaai po o le silasila a le tagata e tatau ona i ai. E tatau ona le gata o le vaai, a ia māitau ma le toto’a i le gasologa o mea o loo vaai i ai. O le vaai e moomia ai le tagata atoa e pei o le tino, o le mafaufau, o le loto, o lagona, e mafai ai ona fetuutuuna’i mea o loo vaai iai, aemaise lava i le mamalu ma le silisili ese o le gasologa o le siosiomaga ma le olaga o aso uma.

O le Salamo lenei e 27, o loo manatu nisi, o le tatalo i le Atua ma le ta’utinoga a le tagata toa faatuatua, e ala i lona māitauina o le olaga i mea na tutupu. O loo atagia i le manatu o le fai Salamo le mausali o lona faatuatua i le Atua, aemaise lava i taimi o puapuaga ma faigata e fetaia’i ma le ola (*O le Alii o lo’u malamalama ia, ma lo’u olataga, o ai ea se ou te fefe ai? O le Alii, o le malosia ia o lo’u ola, ou te mata’u ea ia te ai?*).

O loo manino le silasila a le fai Salamo i lona Atua, o lona Atua foi e malu ma saogalemu ai i taimi o faigata. Auā o le fefe ma lona natura, na te faapogisaina le vaai, o manatu ma lagona o le tagata, ona tupu ai lea o le lē mautonu ma le fememea’i o le tagata. O lona i’uga, o le faiaina ma le faavaivai.

O loo manatu nisi o le to’atele o le au su’esu’e i le tusi Paia, o le tasi lenei o Salamo a Tavita na tusiaina, ona o mea na tutupu i lona ola. E ui i le tele o lu’itau, o faigatā ma fitā na faafeagai ma le olaga o Tavita, ae na faasaoina mai ai lava. Ma o le ala lea o le matuā malamalama lelei o Tavita, i le alofa tunoa o le Atua na atagia i lona olaga. O le 16 o tausaga o Tavita, na filifilia ai e fai ma tupu ia Israelu. Ae o le 30 o ona tausaga, na faauina ai loa ma nofo i le nofoa o le tupu. A o le’i nofoia la le nofoa o le tupu e Tavita, sa fetulina’i solo, ma lamalama solo e le tupu o Saulo, ina ia taumafai e faaoo le oti ia te ia, ina ia le mafai ai ona nofoia le nofoa o le tupu i le nuu o Israelu.

Mai i ia faigata, na faatalitali lava Tavita ma le onosa’i i le Atua, i le taimi na te nofoia ai le nofoa o le tupu. Ae mai le va lea o le

16 o ona tausaga se ia oo i le 30, na molimauina ai e Tavita le alofa faamaoni o le Atua ia te ia ma lona ola, aemaise lava i le faasaoina mai ai o ia.

Faasolo mai le olaga o Tavita ina ua avea ma tupu, na fōua ai e Apisaloma lona atalii, lona avea ai ma tupu. O se faafitauli na matuā tiga ai le loto o Tavita, ona o Apisaloma, o lona atalii na ia fanaua, a’o lea ua toe faasagatau mai ia te ia. O le i’uga, na fasiotia Apisaloma lona atalii, ma ua sili ai lona tiga. Peita’i, e le’i aveesea ai le loto faamoemoe o Tavita i le Atua. Sa faatalitali lava i le i’uga e faia e le Atua, ina ia faasaoina ai lona ola.

Ma o le silafia ma le iloa lea a Tavita, i lana vaai i le Atua. O lana māitau lena i le gasologa o mea na tutupu i lona ola, ma le faasaoina ai o ia e le Atua. O le uiga o le manatu, e le o pogisa le vaai a Tavita i le silisili ese ma le mamalu o le Atua, ma vavega na faia e le Atua i lona ola.

Peita’i, ua le avea lea ma ala e malolo ai le loto o Tavita i le Atua. O le fuaiupu e 4, o loo matuā manino mai ai le mana’o e tasi o loo totoe i le loto o Tavita, o lona fia nofo lea i le fale o le Alii i aso uma o lona ola, ina ia ona iloa atu ai le matagofie o le Alii, ma ia saili ai i lona mamalu.

O le manatu lea o le fai Salamo poo Tavita, i lona auiliilina ma lona māitauina o le alofa o le Atua. O le a le uiga? E le gata o le vaai, ae lagonaina e le tino atoa, o le loto, o lagona ma le mafaufau, aemaise o le agaga, e manino ai ma malamalama i le mamalu ma le silisili o le Atua, aemaise o lona alofa na molimauina i le ola o aso uma ma mea na tutupu ai.

O le faamanatu mai lea a le fai Salamo i lo tatou ola i aso uma, a’o feagai ma lu’itau eseese e pei o le augata ma le paie e su’esu’e i mataupu o le aoga. O le musu e alu i le aoga. O le faalavelave mai o le isi tama ma le isi teine aoga i lou olaga e pei o faaososoga i mea leaga e afaina ai le ola taumafai. Ma nisi faafitauli ogaoga o le ola i mea e faaleagaina ai le olaga o aso uma.

Fai mai le fai Salamo, “O le Alii o lo’u malamalama ma lo’u olataga. O ai ea se ou te fefe ai?”

Aisea tatou te faavaivai ai, o lea ua ta’utino le fai Salamo, ma mea tiga eseese na tutupu i lona ola, ae na faasaoina ai?

E ao ona o tatou toe taumafai atili, ina ia auiliili ona vaai ma māitau le agalelei o le Atua i lo tatou ola. Ia mantua foi, a leaga mea tatou te faia, o lona uiga tatou te le o iloa le alofa o le Atua. A o tatou faiaina ma toilalo i faigata o le ola, o lona uiga foi, tatou te le o malamalama i lo tatou Atua.

### **GALUEGA FAATINO:** Tali i fesili

Tali mai i fesili nei:

1. Po o a ni vaega o lou olaga ua e maitauina o loo fesoasoani mai ai le Atua ia te oe?

Tali: Malosi o le tino, mafaufau, fiafia, loto tele, tali mai le Atua i manaoga.

2. Aisea na faasaoina mai ai Tavita i le tele o luitau o lona olaga?

Tali: Aua na faatuatua ma manino lona iloa o lona Atua.

3. Pe aisea ua tatou faavaivai ai i nisi taimi o lo tatou ola a’oa’oina

Tali: O na ua vaivai lo tatou talitonuina o lo tatou Atua alofa.

### **PESE:** Pese 11 (Pese & Viiga)

### **A’OA’OGA:**

1. Ia fa’aaogaina le tagata atoa i le tino, mafaufau ma le agaga, tatou te mai tau ai le alofa o le Atua.

2. Aua le fefe, auā o loo soifua le Atua e pule aoao i mea uma.

3. Ia to’a le silasila ma le vaai i le Atua.

.....

**ASO SA:** 24 NOVEMA 2019.

**MATAUPU:** TAPU E LE AGAGA  
(*Forbidden by the Spirit*)

**SINI:** Ia a'oa'oina le vasega ina ia iloa ma malamalama i le tāua o le faasinoga ma le pule a le Agaga Paia i o tatou olaga.

**TUSI FAITAU:** Galuega 16: 6 – 15

### **FESOASOANI MO FAIAOGA:**

O le mataupu o lenei aso Sa, o loo faapea mai “Tapu e le Agaga”. O le Agaga o loo faatatau i ai le mataupu, o le Agaga Paia. Peita'i o le upu “tapu”, e aiga tutusa ma le upu vavao, taofia, ma le faasaina. E masani le fa'aogaina o le upu “tapu” i totonu o faiganuu Samoa. A faia se tapu a se nuu, o lona uiga o se vavao po o se sa e taofia ai soo se tasi ona toe sopoia pe fa'aogaina.

O le tala o lenei aso Sa, o le i ai lea o Paulo i lana galuega faa-Aposetolo e ala i le tala'iina o le Tala Lelei ia Iesu Keriso, ma ua faaigoaina, “*O le malaga faamisionare lona lua*” (*Paul's second Missionary Journey*). O lea ua faatasia i latou ma Timoteo, o Sila, faapea le tusitala o Luka, i le galuega tala'i, ma ua fa'auau le galuega, ina ia maua ni agaga mo le Atua. O le galuega o loo limata'ita'i ai le Agaga Paia mo le faasalalauina lava o le Tala lelei i le lalolagi.

E le o manino mai i le tusi faitau, le mafuaaga na taofia pe na tapu ai e le Agaga Paia le tala'i atu o Paulo ma lana vaega i le talafatai i Sisifo o Asia Itiiti (*west coast of Asia Minor*). E le gata i lea, e le o manino mai foi pe na mafua i se a ona taofia ai e le Agaga Paia, ona ui atu i Pitunia (Bithynia). O loo manatu nisi, na mafua ona tapu pe taofia e le Agaga Paia Paulo ma lana vaega ona tala'i atu ma ui atu i vaega e pei ona ta'ua i luga, ona o le vaega tonu lea sa galulue ai le Aposetolo o Peteru ma lana

foi vaega, i le galuega lava e tasi, o le faasalalauina lea o le Tala Lelei ia Iesu Keriso, ma o le vaega tonu lea o loo faasaina ai Paulo ona tala'i ai, ona o se vaega o le tulafono a Roma.

Peita'i e manatu nisi o le au su'esu'e o le Tusi Paia, o fuafuaga a Paulo ma lana au tala'i, o loo lima taitaiina pea e le Agaga Paia e na te faatonu ma faasino le ala tatau, ma le nofoaga e tatau mo le feau o le Tala Lelei. O le mafuaaga tonu lena e foliga mai ai o loo tapu pe taofia ai e le Agaga Paia ia Paulo ma lana vaega ona sopoia atu Pitunia, ma tapu ai ona tala'i atu le upu i le talafatai i Sisifo o Asia, ona o le pule ma le faatonu a le Agaga Paia, mo le fa'auauina o le faasalalauina o le Tala Lelei ina ia soo le lalolagi.

E le gata i lea, a'o le pule a le Agaga Paia, e na te tapuni nisi o faitoto'a, ae tatala ai nisi o faitoto'a, mo le Tala Lelei fa'auau. Auā o le tapu ai poo le taofia ai e le Agaga Paia o Paulo ma lana vaega, o lona tapuniina lava lea o le faitoto'a mo nisi vaega e pei ona ta'ua, ae tatala ai le faitoto'a mo Maketonia, e ala i le fa'aaliga na iloa e Paulo i le tagata na tu ma valaau mai ia te ia ina ia alu atu i Maketonia e fesoasoani atu ia i latou. O le faitoto'a ua tatala e le Agaga Paia mo Paulo ma le au uso tala'i, e saga faasalalauina ai atili le Tala Lelei ia Iesu Keriso, mo i latou ua mafatia i faiga a le alii o le lalolagi. O le moomia ai e Maketonia o le fesoasoani e tusa o le fa'aaliga na iloa e Paulo i le po, o le moomia lava lea o le Tala Lelei i agaga o tagata. Aemaise, o le saga faalauteleina o le Tala Lelei. Auā o le tuuvaa ai o Paulo ma le au uso mo Maketonia, na oo ai i Filipi le taulaga autu o Maketonia le Tala Lelei, ina ua faatuina ai e Paulo le Ekalesia i Filipi, ina ua fesoasoani le fafine poo le tinā ia Litia, le faatau ie pāuli.

O fuafuaga a le tagata, e fuafua lava i le mana'o o le loto, ma e finau foi le loto ina ia faataunuuina, tusa lava pe faigata pe faigofie. O nisi foi o taimi, e saili ai lava e le mafaufau se auala faigofie poo se auala puupuu e faatino ai nisi o vaega o loo fuafuaina ma fia faataunuuina. Ona fai ai lea ma ala ua sopoina atu ai ma pa puipui e gata mai ai (limits) le malosi o le tagata.

O le faamanatu mai o le mataupu o lenei aso Sa, ona o le Pule a le Agaga Paia, o loo tapu ai ona o tatou uia ala e le o finagalo i ai mo lo tatou ola, aemaise lava i vaega e ono faaleagaina ai o tatou olaga, ma faamutaina ai lo tatou fiafia i faaososoga ua tatou masani i ai.

Afai o loo tapu e le Agaga Paia le Aposetolo o Nuu ese, le toeaina o Paulo ma le au uso tala'i, ona o se faamoemoe e sili atu lona lelei ma lona atoatoa mo le faasalalauina o le Tala Lelei e manatua foi la, o loo tutusa i tatou uma ma Paulo. Ae ona o i tatou lava ua mamao ese ma le Agaga o le Alii e atina'e faatasi ai lana e ala i le feau ma le Tala Lelei, ua mafua ai ona o tatou le lagonaina le musumusuga mai o le Agaga Paia, ma ua manumalo ai lava ma le mana'o o le loto, tusa lava pe leaga.

E le o se tapu e le Agaga Paia lou le sau i le aoga aso Sa, ma le lē alu i le lotu. E o se tapu foi a le Agaga lou lē faalogo ma usita'i i matua ma tagata matutua. O le tapu e le Agaga, o le taofia mai o oe mai se isi mea, ona o se mea lelei ina ia tupu mai ai.

### **GALUEGA FAATINO:**

**PESE:** Ta'u mai tala ia Iesu (Tell me the stories of Jesus)

### **A'OA'OGA:**

1. Faalogo i le musumusuga a le Agaga Paia, e manuia ai ou faiva.
2. O le Agaga Paia e na te tapuni ma tatala faitoto'a mo le lelei o le tagata.
3. Ia faamoemoe i le faasinoga a le Agaga o le Alii, tatou te manuia ai.

.....

### **ASO SA**

### **1 TESEMA 2019**

#### **MATAUPU:**

**“MOE ESE ..... O LE A?”**  
*(Sleeping Over.....what?)*

#### **TUSI FAITAU:**

Mika 2: 1 – 11

#### **SINI:**

Ia a'oa'oina tamaiti ina ia iloa ona mafaufau lelei ma fuafua tatau i fa'ai'uga talafeagai ma lenei vaitau. O le vaitau o faiga filifiliga i mea e manuia ai ma mea e malaia ai.

### **FESOASOANI MO FAIAOGA:**

O le vaitau lenei ua tatou i ai, o le vaitau o fiafiaga ma faigā filifiliga. E mafaufau ai lava le tagata ia pe o le a sana mea e fai ina ia feso'ota'i ai ma le fanau mai o le pepe o le Kerisimasi. O le vaitau foi e sa'o ai a tatou fa'ai'uga, pe sese foi ona o lo tatou manatu tele i tulaga fa'apea. E le maua se moe lelei i le tele o mea tatou te mafaufau i ai.

O Mika o le perofeta e lavea i lalo o perofeta laiti (minor prophets). Na tula'i mai Mika e fai ma perofeta i le vaitau 742-687 TLM. O le vaitau lea a'o avea Iotama, A'asa ma Esekia ma tupu ia Isaraelu. O le vaitau o Mika, o le vaitau foi lea na tula'i mai ai le perofeta o Isaia i le malo o Iuta.

O le vaitau tonu lea na sasao fa'aafi ai le leaga o le nu'u o le Atua, aemaise lava i le aumaumea ma le aulima malolosi. O tagata e tele a latou mea e maua ma tamaoaiga, ma i latou e atamamai, ua latou faatigaina le au vaivai ma le lē amana'ia. Ma ua latou fa'aaogaina nai tagata ia e sa'ili atili ai lo latou tamaoaiga.

E pei la ona ta'ua i la tatou Tusi faitau o lenei taeao, o tagata fa'apea, ua le mafai ona momoe lelei. Ae ua latou mafaufau i mea leaga ma gaoioiga leaga e fa'atino i le aso e soso'o ai. Ua latou le momoe filemu ma mafaufau i le Ali'i, ae ua latou

mafaufau i togafiti leaga i le po, ma fa'atinoga pe a malama le taeao.

O le agasala la lea a i latou o lea ua fa'ailoa mai e le perofeta o Mika. Ua le momoe lelei ae ua alu lo latou taimi e mafaufau ai i mea leaga ma auala leaga e fa'atino pe a ao. A o'o la i le taeao, ona latou fa'atino loa lea o mea ia na fuafua ma mafaufau i ai i le po ua mavae. Ae o le fa'afitauli o ia fuafuaga leaga, o le pologa ai o nai tagata matitiva ma lima vaivai.

Peita'i, o lea ua fa'ailoa mai e le perofeta, e ui i nei mafaufauga ma fuafuaga leaga, ae o lea ua sauni le Atua e fa'asala ma a'oa'i i latou se'ia o latou lagonaina lo latou sese. E le ona fa'apea ua le alofa le Atua. Ae o le finagalo lava o le Atua, ia iloa e lona nuu le ala e tatau ona savavali ai. E le tatau foi ona momoe i mafaufauga leaga ma mea leaga, ae ao ona momoe i le Atua, e maua ai mafaufauga lelei.

A tatou lagonaina le vaivai, tatou te mana'omia lo tatou o ese mai i o tatou nofoaga masani, ae o atu i se isi nofoaga ina ia maua ai se faasiliga malosi ma nisi mafaufauga fou mo le fa'aauuina o feau ma galuega.

O le moe ese la e pei ona fa'amatalaina i le tatou mata'upu, e le o le moe ese mai i lou aiga i le mea ua masani ona moe ai. Ae o le ave'ese o le mafaufau mai i mea leaga, ae mafaufau i le Atua. O le uiga o le tala, e ao ona tatou momoe i le Atua. A tatou momoe i le po, tatalo i le Atua mo polokalame o le aso fou. A fa'apea ona tatou fai, ona mautinoa lea o mea lelei e tutupu mai i le aso fou. Ae a tatou fa'agalo le Atua, e leai se mea lelei e tupu mai i o tatou mafaufau, ae na o mea leaga ma le inosia e tutupu mai ai.

O lenei vaitau ua tatou iai, o le vaitau o fiafiaga ma faiga filifiliga. E tatau ia i tatou ona matua va'ava'ai lelei ma filifili ma le tatau, po o fea le itu e ave iai la tatou fa'amua. O le vaitau foi lenei e fa'aigoa e nisi o le vaitau o le malosi mai o le fili. Ae o le fa'amanatu a le tatou mata'upu, ia e moe ma mafaufau i le Atua. Tatalo i le Atua ae e te le'i moe ina ia lelei le amataina o le aso fou e ala i le fesoasoani mai o le agaga o le Atua ia te oe. Manatua, aua nei pologa pe taotaomia lagona o le

isi tagata ona o ni mea leaga tatou te fafauina, ae tu'u atu o tatou olaga e fafau mai e le Atua, e taunu'u ai i le taunu'uga manuia.

### **GALUEGA FAATINO:**

Fa'aliliu mai i le faa-Samoa.

“Alas for those who devise wickedness and evil deeds on their beds! When the morning dawns, they perform it, because it is in their power.”

Tali: Silasila lau susuga i le fuai'upu muamua o le tusi faitau.

**PESE:** 303 (Pese ma Viiga)

### **A'OA'OGA:**

1. Fiafia e tatalo i le Atua e maua ai mafaufauga lelei.
2. Aua le fafauina mea leaga i o tatou loto, e afaina ai le ola o isi tagata.

.....

**ASO SA:** 8 TESEMA 2019

**MATA'UPU:** E TAUGATĀ LE FAAMASINOGA,  
PEI O LE ALOFA TUNOA  
*(Judgement is costly; like grace)*

**SINI:** Ia a'oa'oina tamaiti ia malamalama o le loloto o le ola agasala, o le tagata o le loloto fo'i lena o le alofa tunoa o le Atua.

**TUSI FAITAU:** Hosea 6: 1 – 11

## FESOASOANI MO FAIAOGA:

O le perofeta o Hosea, na amata mai lana galuega fa'a-perofeta i le TLM 753 e o'atu i le TLM 723. Sa fai o ia ma perofeta i le malo i matu po'o Iuta. O le uiga o le igoa o Hosea, o le "Fa'aolataga". Ma ua fetau lava le uiga o lona igoa ma lana galuega fa'a-perofeta, o le ta'u atu lea o le fe'au o le fa'aolataga mo le nu'u o Iuta.

O Hosea fo'i lea na fetalai i ai le Atua, e alu e aumai le fafine talitane e igoa ia Komeri e fai mana ava. Aua o le ata lava o le feagaiga a Hosea ma Komeri, o le ata fo'i lea o le feagaiga a le Atua ma lona nu'u o Isaraelu. E ui lava ua uma ona osi feagaiga Hosea ma Komeri, ae le i mafai ai e Komeri ona tu'u lona olaga faita'aga ma le avaga atu o lona loto i nisi tamaloloa. E fa'apena uma lava le feagaiga a le Atua ma lona nu'u. E ui lava ua uma ona osi feagaiga le Atua ma Isaraelu, ae e avaga pea loto o Isaraelu i atua fa'apaupau o isi malo, ae fa'agalo pea le Atua.

O le mata'upu la lea na tatou faitauina, o le vala'au mo Iuta ina ia liliu mai i le Atua e ola ai. O le valaau a le mai ia Hosea, e mai tagata o e ua naunau e sa'ili se fesoasoani mai le Ali'i ona o a latou agasala. Aua la, ua matua agasala lava Iuta ma Isaraelu i le Atua, ma ua latou le fa'amaoni i le feagaiga ua uma ona osi ma lo latou Atua.

O lea la ua fa'aleo e Hosea le loloto o le ola salamo o tagata, e fua ia latou upu e pei ona fa'alogi i ai le perofeta. Ua latou matua ta'utino lo latou salamō ma le naunau e toe fia fo'i i le Atua ina ia ola ai i latou. Peita'i, o le tali mai o le Atua, ua ia te'ena ai a latou upu, ae ua finagalo le Atua e faia lava e ia le leleiga ma i latou i lana lava auala ma le fa'aaliga o lona lava alofa tunoa. O lona uiga, o le fa'amasinoga tonu lava a le Atua, e faia lava lea ina ia matua malamalama lona nu'u i lona finagalo ma lona alofa ia i latou..

O le finagalo o le Atua, ina se'ia matua iloa e le tagata lona sese ma matua alu ifo i lalo i le loto salamo. O i'ina e iloa tino ai e le tagata le loloto o le alofa tunoa o le Atua. O le uiga o le manatu, e ao i le tagata ona matua iloa le loloto o lana agasala i le va

feagai ai ma le Atua. Ona ia iloa fo'i lea, e le fa'atusatusaina le loloto o lona ola agasala, i le loloto o le alofa tunoa o le Atua.

Aua a le iloa e le tagata le loloto o lona ola agasala, na te le lagonaina lava le maualuga ma le loloto ma le lautele o le alofa tunoa o le Atua. Ma e ono fa'atumauiina pea lona ola agasala ma lona ola femoumoua'i i le va feagai ai ma le Atua. O le uiga lea o le fe'au a le perofeta e pei ona tau fa'amatala mai i le tusi faitau o lenei aso.

O le loloto o le alofa tunoa o le Atua, lea na maliu ai Keriso ma toetu manumalo, ina ia ola le tagata agasala ua salamo ma fa'atuatua ia te ia.

## GALUEGA FAATINO:

Tusi sau tusi fa'atoese i le Atua, e tau atu ai i le Atua lou loto ua matua tumu i le salamo ona o au agasala. Ia le silia ma le afa itulau lau tusi.

## PESE 73 Pese ma Viiga.

### A'OA'OGA:

1. Ia tatou iloa le alofa tunoa o le Atua i taimi uma, ma ola ai e le aunoa.
2. Salamo ma liliu i le Atua

.....

### ASO SA

**15 TESEMA 2019**

### MATA'UPU:

**O FAAVAE ( Foundations)**

### SINI:

"Ia a'oa'oina tamaiti ina ia malamalama i le taua o le toe tepa i tua, i le amataga na fa'avae mai ai o latou olaga, ina ia fai ma

fa'amanatu mo lo latou ola aga'i i le lumana'i".

**TUSI FAITAU:** Isaia 51: 1 – 3

### **FESOASOANI MO FAIAOGA:**

O le mata'upu o lenei aso, "O FA'AVAE". A tatou mafaufau i le 'upu fa'avae, e faigofie lava ona malamalamaina ai i le tusi faitau. O le fa'avae o se mea ua fa'ata'oto mo le malosi ma le mausalī o se mea. Mo se fa'ata'ita'iga, o se fale. O le vaega muamua lava lea o le fale e muamua lava ona fa'ata'oto, o le fa'avae. E tatau ona loloto ma malosi le fa'avae, auā o le malosi o le fale, e fa'alagolago tele i lona fa'avae.

O le loloto fo'i o le tofa fetu'utu'una'i a nai tua'ā ua mavae, na ō latou fa'ata'oto ai foi le fa'avae mo Samoa, ina ia avea Samoa ma atunu'u e malosi ma mautū e o'o i le i'uga. Lea na manatu ai i latou, o Samoa e ao ona fa'avae i le Atua. Ma o le fa'avae mautū lea mo Samoa e malosi ai ma manuia ai. O i tatou fo'i, e i ai lava fa'avae na fa'avaeina mai ai o tatou olaga e o tatou matua i le amataga.

E le toe tau fa'amatalaina lea itu, aua e malamalama i ai so o se tama ma so o se teine Samoa. E leai se matua na ia fa'avaeina le olaga o sana tama i ni mea leaga ma ni uiga le talafeagai. E matuā taua lava la le toe tepa i tua i le amataga na fa'avae mai ai o tatou olaga, ina ia fa'asagatonuina ai lo tatou olaga aga'i i le lumana'i.

Ae o le vala'au lea a le perofeta o Isaia mo le nu'u o le Atua, e pei ona tatou faitauina. O lea ua fa'amanatu atu e le perofeta ia Iuta, le taua o le toe tepa i tua i le amataga. Auā o lea ua matuā olopalaina lava Iuta e le malosi o Papelonia. Ma ua foliga mai ai ua leai so latou fa'amoemoe. O le vala'au la a le Perofeta, o le vala'au alofa o le fa'amoemoe mo Iuta ma Isaraelu.

O le fe'au ma le fa'amanatu, ina ia toe tepa i tua i le amataga mai o le nu'u o Isaraelu. Le nu'u na fa'avae mai e le Atua i tagata e to'alua, ma ua matutua lava. Le ulugali'i na manatu e lē

toe maua se la tama, ae o lea ua avea ma nu'u tele. O le fa'aaliga lena o le malosi ma le mana o le Atua. Na te mafaia ona fai vavega i le olaga o le tagata ua leai se fa'amoemoe.

O le taua o le toe tepa i tua ia Aperamo ma Sara, ina ia toe fa'amalosia ai i latou ma latou toe liliu mai ai i le Atua. Aua o le Atua lea na ia faia le vavega mo Aperamo ma lana ava o Sarai, o le Atua lava lena o lo'o soifua pea. O ia foi na te faia le vavega mo lona nu'u, pe afai latou te matua liliu atu ia te ia ma le loto atoa.

O lona uiga, e leai se isi mea e mafai ona toe fa'aolaina ai i latou, se'i vagana ua latou toe tepa i tua i le fa'avae, ma toe foi atu i Lē na ia fa'ata'oto lena fa'avae, e maua ai lo latou malosi ma le fa'aolaina.

E taua tele lo tatou toe tepa i tua i mea na fa'avae mai ai o tatou olaga. E mafai ona a'oa'oina mai iina, le olaga lelei mo tatou i le lumana'i. Ua tele suiga ma ua televave foi le olaga i nei aso. Ua le masino foi le mau fa'afitauli ua feagai nei ma fanau, ona o suiga fou ua oo mai. O le upu moni, ua fa'apologaina o tatou taimi i nei mau suiga fou. Ae o le taua lea o le toe tepa i tua i le fa'avae, aua tatou te toe mafaufau ai i le pologa ma le tigaina o nai matua, lea ua tatou sapi ai nei. Tatou te toe mafaufau ai foi i le Atua na fa'asino mai e matua ia i tatou i le amataga, ma mafai ai ona fafau se isi amataga fou mo o tataou olaga.

O le Atua lea na fa'ailoa mai e nai tua'ā ua mavae, o le Atua lava lena o loo soifua pea e o'o mai i le taimi nei. O le Atua lea na ia fa'amanuia i o tatou matua i le amataga, o le Atua lava lena na te matuā fa'amanuia mai ia i tatou, pe afai tatou te lotu atu ia te ia ma fai lona finagalo. O le faia o le finagalo o le Atua, e atagia i o tatou olaga o aso uma, ina ua tatou fa'alogu ma usita'i ma faia uiga lelei uma.

O le Kerisiano fa'amaoni, na fa'avae mai lona olaga ia Iesu Keriso. O ia lena o le fa'avae papa e lelei ma manuia ai mea uma tatou te faia. Auā o le fa'avae mausalī na ia fa'ata'oto, o lona soifua na ia ofoina mai atoatoa, ina ia manuia ai i tatou uma e ala i lona alofa tunoa.



**GALUEGA FA'ATINO:** Finauga

Ia vaevae le vasega i ni vaega se lua, ona fai lea o se fa'afinauga (debate). O le isi itu e finau mai e lelei le toe tepa i tua i le amataga. O le isi itu e finau mai e lē lelei le toe tepa i tua. A mae'a, o le vaega e tele ni mea taua e lagolagoina ai le latou mau, o le vaega lena e malo. Fa'amasino pea lau susuga a le faiaoga. A uma ona fa'atoā fa'amalamalama lea o le tusi faitau.

**PESE:** 353 (Pese ma Viiga)

**A'OA'OGA:**

Tu'u le avanoa i tamaiti e fai mai ai ni a latou a'oa'oga. Saunia lava e lau susuga nisi a'oa'oga e fa'aopoopo i a'oa'oga a le fanau.



*IA MANUA LE KERISIMASI & TAUSAGA FOU*